

Дилмурод Қурунов

ТАЛҚИН ИМКОНЛАРИ

Тошкент
«Turon zamin ziyo»
2015

**УЎК:
КБК
И-**

Адабиётшунос Д.Қуроновнинг ушбу тўпламидан, асосан, бадиий асар талқини муаммоларига багишланган мақолалар жой олган бўлиб, уларда олимнинг илмий фаолиятида таянилган бадиий асарга ёндашув принциплари умумлаштирилган. Айни шу жиҳати билан китоб мутахасслар, филолог-талабалар ва адабиёт мухлисларига фойдали бўла олади.

© «Turon zamin ziyo»,

Тошкент, 2015 й.

АДАБИЙ АСАР ҲАҚИДА ҚАЙДЛАР

Мулоҳазаларимизда адабий асарга хос биттагина, бироқ наzdимизда энг муҳим жиҳатдан турткى оламиз. У ҳам бўлса адабий асарнинг, энг аввал, нутқ ҳодисаси эканлиги. Зеро, адабий асарнинг яратувчиси – нутқ ирод этаётган одам, ёзмоқ – тасаввурдаги (имплицит) ўқувчига гапирмоқ ва айтганларини сўзма-сўз ёзувда акс эттириб бормоқ демакдир. Шунга мос ҳолда адабий асарнинг ўқувчиси – тинглаётган одам, негаки, ўқимоқ ҳам асли ёзувда мангуга муҳрланган нутқни қайта жонлантириш ва шу асно тасаввурдаги (имплицит) ёзувчини тингламоқ демакдир. Бир неча йиллар илгари биз адабий асарни ГАП деб тушунган ҳолда унинг айрим жиҳатларини нутқий коммуникация бирлиги бўлмиш гап билан қиёсан тавсифлашга ҳаракат қилгандик¹. Ушбу мақола ўшанда бошлаган ишни якунлаш, айни масалага кенгроқ ва маҳсус тўхталиш истаги билан ёзилди.

I. Фарқлаш осон бўлсин деб “ГАП” ва “гап” шаклларида икки турли ифода этаётган бўлсак-да, улар коммуникатив қиммати нуқтаи назаридан тенг – иккиси ҳам биттадан коммуникатив бирлик. Шу ўринда синтактик бирлик сифатидаги гап билан коммуникатив бирлик сифатидаги гап фарқланишини таъкидлаш зарур. Коммуникатив бирлик сифатидаги гап (айни маънони руслар “высказывание” сўзи билан ифодалайди) диалогдаги репликага тенг бўлиб, унинг чегараси нутқ субъектиning алмашиши билан белгиланади. Яъни бу маънода диалогдаги ҳар бир репликани – у биргина товуш ё сўз, бир неча сўз ё бир неча гапдан таркиб топганидан қатъи назар – битта гап деб тушунамиз.

I.1. Худди биргина товуш ё сўз, бир неча сўз ё бир неча гапдан таркиб топганидан қатъи назар, диалог репликаси битта коммуникатив бирлик сифатидаги гап ҳисоблангани каби, ижодий ният рўёби бўлмиш ҳар қандай асар – бир мисра ё минглаб мисралардан, биргина эпизод ё бир неча йиллик воқеалардан, бир неча дақиқалик кўриниш ва ё бир неча пардалардан таркиб топган бўлишидан қатъи назар – бадиий коммуникациянинг алоҳида битта бирлиги, тўлақонли адабий асардир. Яъни, масалан, мумтоз шеъриятдаги фард билан достон ва ё янги адабиётдаги новелла билан

¹ Куронов Д. Чўлпон насли поэтикаси.- Т.: Шарқ, 2004

роман бу жиҳатдан ўзаро тенгдир. Диалогдаги репликанинг чегаралари нутқ субъектларининг алмашиниши билан белгиланса, адабий асарнинг чегараси ижод жараёни – ижодий ният туғилишидан то асарга сўнгги нұқта қўйилгунча ўтган вақт билан белгиланади.

1.2. Ҳар бир алоҳида олинган реплика диалог жараёнига нисбатан қисм. Зеро, диалогдаги реплика ўзидан аввалги репликаларга жавоб сифатида юзага келган, шу боис мазмуни ва руҳи улар билан боғлиқ. Репликалар орасидаги боғлиқлик табиатига кўра (бевосита ё бавосита) ҳам, мустаҳкамлигига кўра ҳам фарқли: одатда, яқин репликалар орасида бевосита, узоқлари орасида бавосита боғлиқлик кузатилади; айримларининг боғланishi ўта заиф, бошқаларини эса ажратиб бўлмайдиган даражада. Мисол тариқасида куйидаги диалогни кўриб ўтиш мумкин:

- Шаҳарга кетяпман.
- Яхши боринг.
- Борасанми?
- Ҳа.

Ушбу диалогда биринчи реплика мазмунан нисбий мустақил, қолганлари эса турли даражада бир-бирига боғлиқ. Иккинчи реплика ўз ҳолича ҳам “тилак” маъносини беради, лекин мазмунини биринчиси билан боғлиқликтагина тўла намоён этади. Учинчи реплика ҳам худди шундай: биринчи сига боғланган ҳолда “Ортимдан шаҳарга борасанми?” каби мазмунни ифодалайди. Тўртинчи реплика эса учинчи ва у орқали биринчи репликага боғланади ва шундагина мазмуни конкретлашади. Сираси, биринчи жумлани мустақил деганимиз ҳам шартли. Зеро, диалогнинг кенгайиб бориши баробари у ҳам мазмунан тўлишиб боради. Агар уни алоҳида олсак, фақат кетаётганлик хабарини уқамиз, бошқа жумлалар ўрамида эса муайян ҳаётий шароит ва ўзаро муносабатлардан келиб чиқувчи нозик психологик ҳолатлар ҳам илғанади. Кўринадики, муайян шароит ва маълум вақт оралиғида кечувчи диалог – нисбий бутунлик, шу боис ҳам у репликаларнинг ўзаро боғлиқлигини таъминлайди. Худди шу каби, маълум вақт оралиғида мавжуд ижтимоий-маданий шароитда кечувчи адабий жараён ҳам нисбий бутунлик, айни ҳол шу даврда яратилган асарларнинг ўзаро диалогик алоқасини муқаррар этиб қўяди. Фақат адабий асарларнинг диалогик алоқаси доим ҳам очиқ қўзга ташланмайди, ик-

кинчи томони, уларни ҳамма ҳам бирдек кўролмайди, чунки ўкувчиларнинг адабий жараёндан хабардорлик, унга яқинлик даражаси турличадир.

1.2.1. Адабий асарларнинг алоқалари ҳам табиати ва сифатига кўра диалогдаги репликаларнинг алоқалари каби. Масалан, юқоридаги диалогга қиёсан олсак, Чўлпоннинг “Бузилган ўлкага” шеъри билан Файратийнинг “Тузалган ўлкага” шеърлари ўзаро биринчи ва иккинчи репликалар (Шаҳарга кетяпман – Яхши боринг) орасидаги каби муносабатда. Чўлпон шеъри ғоявий-бадиий жиҳатдан мустақил, Файратий шеъри эса мазмун-моҳиятини “Бузилган ўлка”дан айри ҳолда намоён этолмайди. Ботунинг “Кел, бирга кулагилик” шеъри билан Чўлпоннинг “Тан бердим” шеъри орасидаги муносабат эса учинчи ва тўртинчи (Борасанми? - Ҳа) репликалар каби. Аввало, учинчи ва тўртинчи репликалар каби иккиси ҳам мазмунан мустақил эмас. Боту шеърининг мазмуни Чўлпоннинг “пессимиستик” дея танқид қилинган шеърларисиз (худди “Борасанми”нинг мазмуни “Шаҳарга кетяпман”сиз тўлиқ бўлмагани каби) чала, тушунарисиз бўлиб қолганидек, Чўлпон шеърининг мазмуни ҳам уларга боғланган ҳолда конкретлашади. Бундан ташқари, худди “Ҳа” диалогда “Борасанми” орқали “Шаҳарга кетяпман”га боғлангани каби, Ботунинг аниқ бир шеърига жавоб ўлароқ ёзилган шеър айни пайтда Боту ва унга ҳамфир ўзга шоирларнинг шу мазмундаги бошқа шеърларига (яъни аввалги репликаларга) ҳам жавобдир.

1.2.2. Диалогдаги репликаларни умумий мавзу (ва унга боғлиқ мавзучалар) ва суҳбат руҳий атмосфераси бирлаштиргани каби, давр адабиётида яратилган асарлар ҳам, аввало, мавзу ва ижтимоий кайфият умумийлиги билан характерланади. Дейлик, бу жиҳатдан “Кеча ва кундуз” билан “Қутлуғ қон” бир-бири билан мустаҳкам алоқада, улар битта масалада сўз юритгани ҳолда муносабат (модаллик) жиҳатидан фарқланади: бири инкор қилса, иккинчиси тасдиқлади.

1.2.3. Диалогдаги реплика спонтан эмас, аксинча, у нутқий вазият тақозосидир. Бошқача айтсак, сўзловчи оғзига келганини эмас, нутқий вазият талаб этаётган гапни айтади. Айни қоида адабий жараёнда ҳам тўла амал қилади ва бу адабий асарлар орасидаги диалогик алоқанинг яна бир муҳим омилидир. Ўтган асрнинг 60-йилларида Ойбекнинг “Болалик”, А.Қаҳҳорнинг “Ўтмишдан эртаклар” қиссалари яратилгани

ёки F.Фуломнинг “Шум бола”ни ижтимоий таҳлил томонларини кучайтириб қайта ишлаганига айни омил натижаси деб қаралиши мумкин. Зеро, буларнинг бари муаллифларининг ўзлари билган ўтмишни қайта идрок этиш ва баҳолаш эҳтиёжидан туғилган, бу эҳтиёжнинг ўзи эса, жамият Сталин шахсига сифиниш оқибатларини бартараф этишга астойдил киришган давр шароити маҳсулидир.

1.3. Диалог репликалари, табиийки, нутқ жараёнида яратилмайди, сўзловчи тайёр тил материаллари (сўзлар ва гап қолиплари)дан ўзи етказмоқчи бўлган мазмунни ифодалаш учун фойдаланади. Яъни айни пайтда кечеётган сухбат тил анъаналарининг бевосита давоми демакдир. Шунга ўхшаш, бугунги кунда яратилаётган адабий асар ҳам миллий адабий анъаналардан ўсиб чиқади ва ўзи ҳам тезда анъанага дўнади.

1.3.1. Суҳбат асносида сўзловчида ўзи қўллаган ифодалардан қониқмаслик ҳисси ва шундан келиб чиқувчи фикрини аниқроқ ва таъсирлироқ ифодалашга интилишнинг ҳамиша мавжудлиги нутқа мудом янги ифода, шакл ва услублар кириб келишининг асосидир. Худди шу сингари, адибу шоир борки, воқеликни жонли тасвирлашу фикр-туйғуларини ёрқин ифодалашни қасд этиб, эришганига қаноат қилмай қалам суради ва айни ҳол бу борадаги ижодий изланишларни бардавом этади.

1.3.2. Халқларнинг ўзаро савдо-иқтисодий, майший, маданий алоқалари, энг аввал, тилда акс этади. Зеро, бунда тил ўзга тил унсурларини ўзлаштиради, шу ҳисобга ифода имкониятларини кенгайтиради. Ўзлигини сақлаш учун тил ўзга тил унсурларидан ўз табиатига мос, руҳига сингишидиган унсурларнигина қабул қиласди, уларни ўзига мослаб ўзлаштиради. Шунга ўхшаш, миллий адабиётга ўзга адабиётлардан кириб келган адабий асар шакллари ҳам том маънода ўзлашган, ўзиникига айлангандир. Зеро, ўзлашган сўзнинг шакли (талаффузи), руҳи ва мазмуни ўзбекчалашгани каби, масалан, роман ҳам миллий хусусиятлар касб этган, шу боис ҳам тўла асос билан ўзбек романни дейилади.

1.3.3. Кишиларнинг тил воситасида ўзаро ахборот алмашишини рўёбга чиқарувчи асосий омиллардан бири уларнинг онгига тайёр гап қолип (конструкция)ларининг мавжудлигидир. Зеро, шу қолипларга тил материали – сўзларни жойлаштириш орқали фикр шакллантирилади ва ифода

этилади; таниш қолипларга тизилган сўзларнинг ўзаро муносабатларидан келиб чиқиб фикр уқилади (tinglovchi онгига қайта шакллантирилади). Шу сингари, онгимизда тайёр адабий асар конструкциялари – жанр қолиплари мавжудки, уларга ҳаёт материалини жойлаган ҳолда бадиий мазмун шакллантирилади.

II. Репликада сўзловчининг онгига айни пайтда кечаётган ҳолат акс этганидек, адабий асарда санъаткорнинг ижод онларидаги маънавий-рухий ҳолати муҳрланади. Бу ўринда иккита нуқтани таъкидлаб қайд этиш лозим: 1) нутқ моменти ҳам, ижод онлари ҳам изоляцияланган эмас, аксинча, бутуннинг қисмидир; 2) нутқ моментида сўзловчи онгига кечаётган ҳолат ҳам, санъаткорнинг ижод онларидаги маънавий-рухий ҳолати ҳам спонтан эмас, аксинча, қатор субъектив ва объектив омиллар билан белгилангандир.

II.1. Репликада акс этган нутқ моментидаги руҳий ҳолатда сўзловчи шахсияти – инсоний фазилат ва нуқсонлари, феъл-хўйи, интеллектуал савияси, маънавий қиёфаси ва ш.к.лар муҳри бор. Бироқ булар репликада тўғридан-тўғри эмас, балки нутқ моменти орқали, ундаги лингвистик ва экстралингвистик омиллар призмасидан ўтиб аксланади. Демак, репликанинг мазмуни уни ким ва қандай вазиятда айтиётганига боғлиқ конкретлашади. Шунга ўхшаш, адабий асарда акс этувчи ижод онларидаги маънавий руҳий ҳолатда ҳам, шубҳасиз, муаллиф шахсияти – унинг ҳаёт йўли билан боғлиқ характеристери, дунёқараши, орзу-интилишлари ва ш.к.лар муҳри бор. Бироқ булар ҳам адабий асарда тўғридан-тўғри эмас, ижод жараёни кечаётган вақтдаги шарроит (ижтимоий ва шахсий ҳаёт, маданий мухит, маърифий ҳолат ва ш.к.)дан келиб чиқувчи кайфият фокусидан ўтган ҳолда аксланади. Демак, адабий асар мазмунини саналган омилларга тўғридан-тўғри боғлаб қўйиш хато, улар санъаткорнинг ижод онларидаги маънавий-рухий ҳолатини тасаввур (ҳис) қилиш имконини яратиши жиҳатидан аҳамиятли. Зеро, уларнинг ёрдамида ҳосил қилинган тасаввур адабий асарнинг мазмун-моҳияти ва руҳини тўғри тушуниш ва талқин қилиш асосидир.

II.2. Сўзловчининг репликада акс этган нутқ моментидаги руҳий ҳолати том маънода бетакрордир. Зеро, у айни шу руҳий ҳолатга қайта кира олмайди, бас, репликани айни шу мазмун ва руҳда қайта олмайди. Шунга ўхшаш, муайян

асарни яратиш онларидаги маънавий-руҳий ҳолат ҳам бетакрор, айни шу ҳолатга санъаткор қайта кира олмайди. Бу эса айни маънавий-руҳий ҳолатдан чиққач, муаллиф асарни сайқаллаши мумкин ҳолос, мазмуни ва руҳига дахл қилувчи ҳар қандай ўзгартириш унга “ямоқ” бўлиб тушади деганидир.

II.3. Халқ мақоли айтилган гапни отилган ўқса қиёс қилади. Мақолнинг энг кенг оммалашган маъноси “айтилган гапни қайтариб бўлмайди” дегани, яна у “айтиб бўлган гапингнинг эгаси эмассан” деган маънода ҳам фаол ишлатилади. Ҳақиқатан, шундай. Дейлик, сўзловчи айтган гап бирорга озор етказди, у буни чиндан-да истамаган. Лекин энди кеч, айтилган гап моддийлашиб бўлди, эшитувчи уни ўз талқинида тушунишга ҳақли. Сўзловчи ҳар не куйиниб “ундай эмас, бундай демоқчийдим” десин, эшитувчи кўнглини озордан тамом фориғ этолмайди. Негаки, айтилган, яъни товушларда моддийлашган гап унингча талқин қилишга ҳам изн беради. Демак, сўзловчи талқини ҳам имкониятдаги талқинлардан бири, ҳолос, алоҳида мавқе тутмайди. Шу маънода, эълон қилинган адабий асар ҳам энди муаллифники эмас, ўқувчи уни ўзича тушунишга ҳақли, бунда ҳам муаллиф талқини охирги инстанция бўлолмайди. Демак, гоҳ-гоҳ учраб турадиган муаллифнинг танқидчиликдаги талқинларга қарши чиқиши ёки мунаққиднинг асар ҳақидаги муаллиф сўзларига бешак далил сифатида ёпишиб олиш ҳоллари тўғри эмас.

III. Айтилган гап ёхуд эълон қилинган адабий асарни тури-туман талқин қилиш имкониятлари ҳамиша мавжуд ва бу табиий ҳам қонуний бир ҳолдир. Зеро, сўзловчи фикр етказмайди, балки фикр ифодаси учун шакллантирилган гап – товушлар комбинациясини етказади; тингловчи эса, ўз навбатида, ўша товуш комбинацияларини фикрга айлантиради ва шу тариқа ахборот алмашиш содир бўлади. Яъни тингловчи шунчаки ахборот қабул қилувчи мослама эмас, балки мазмунни қайта яратувчидир. Шунга ўхшаш, адабий асар ўқувчиси ҳам пассив қабул қилувчи эмас, асар бадиий воқелигини қайта яратувчидир.

III.1. Қадимдан “ифода этилган фикр ёлғон” деган нақл келади. Бунинг асоси инсон ўйлаб ва ё ҳис қилиб турганини сўз билан тугал ифодалашга ожизлиги, демакки, ўйидаги билан тилидагининг фарқ қилишидадир. Яъни ифода ҳамиша сўзловчи ифодалашни истаганидан кўра тор, чаладир. Нутқий муроққот пайти тингловчи буни ҳис қилиб

туради, ифодадаги кемтикларни (экстравалингвистик омилларга диққат қилиш, сўзловчи билан муносабатлари контекстини хотирга келтириш ва, қисман, тасаввурини ишга солиш асосида) тўлдириб олиш пайида бўлади. Шунга ўхшаш, адабий асарда ҳам муаллиф айтмоқчи бўлганларини тўла ифодалай олмайди, бунда ифодадаги кемтиклар ўқувчининг ижодий тасаввурни тўла ишга солиши ҳисобига тўлдирилади. Жонли мулоқотдагидан кўра мураккаблиги шундаки, бунда бир қатор экстравалингвистик омиллар (ритм, темп, тон, умуман интонация) ҳам матн асосида қайта яратилиши зарур бўлади.

III.2. Диалог иштирокчиларининг барчалари мазмун яратувчи субъект экан, у ҳолда сўзловчи етказмоқчи бўлган (ва ўз наздида етказган) мазмун билан тингловчи англаған мазмун айнан бир нарса бўлолмайди. Адабий асар мисолида эса мазмун яратувчи субъектлар сони (ёзувчи + ўқиган ҳар бир ўқувчи) фоят кенг, бас, талқинлар сони ҳам шунга мутаносибdir.

III.2.1. Муайян вазиятда айтилган реплика суҳбат иштирокчиларининг айримларига бир, қолганларига бошқа бир маънени етказиши мумкин. Масалан, суҳбат жараёнида бирор иштирокчиларнинг бари танийдиган одам ҳақида “Аҳмад ака хўрозда!” деб айтди. Тингловчиларнинг бириси чўзиб “ҳа-а”, тағин бириси бош иргаб, бошқаси имою сўзсиз ушбу баҳони маъқуллади. Қизифи, бу ўринда чинакам ахборот алмашуви амалга ошмади, чунки биринчи тингловчи “Аҳмад ака тезда уришиб кетадиган, жанжалкаш одам” деб билади; иккинчиси “Аҳмад ака аёлларга ўчроқ, “юрадиган” одам” лигидан хабардор, учинчиси “Аҳмад ака – мард одам” эканига амин бўлган, ҳолбуки, сўзловчи “Аҳмад ака аёллар бригадаси бошлиғи” эканини назарда тутганди, холос. Албатта, тингловчилар англаған мазмунларда субъективлик устувор, бироқ улар обьектив асос – айтилган гапдан ўсиб чиқаётirки, уларни инкор қилиб бўлмайди. Шунга ўхшаш, адабий асар талқини ҳам муаллиф назарда тутгандан тамом бошқа бўлиши мумкин ва бунга табиий деб қарамоқ жоиз. Бу ўринда фақат биргина талаб ўринли: *талқин матндан ўсиб чиқиши шарт*.

III.2.2. Айрим ҳолларда турлича тушуниш имконияти сўзловчи томонидан атайн яратилади. Масалан, бирор баҳорда қайтариш шарти билан қарз берган одам иштирок

этотгандан сұхбатда “Мана, баҳор ҳам келди!” деса, буни қарздор “Қарзни қайтариш вақти келди!” маъносида, бошқалар ўз маъносида тушунадилар. Мазкур ҳолатдаги битта реплика билан адресатларга турлича маънолар етказилишида атаяйнлик (албатта, бундай вазият табиий равишда ҳам юзага келиши мумкинлигини инкор қилиб бўлмайди) бор, яъни сўзловчида мақсадли равишда шу тарз **гапириши** имконияти бор. Шунга ўхшаш, адабий асар ҳам муаллифнинг хос ўқувчисига бошқа, оммага бошқа мазмунни етказиши мумкин. Масалан, Чўлпон “Соз” тўпламининг биринчи шеърини “Бир неча йил қантаргач, Яна олдим созимни. Энди айтиб ийғламас, Кўнгилдаги розимни” деган сатрлар билан бошлайди. Бу билан у, бир томондан, шўроча тарбия топган ўқувчига “энди шўродан нолиб ийғлоқи шеърлар ёзмайман” дея ваъда беради; иккинчи томондан, хос ўқувчисидан “созим энди кўнгил розини айтольмайди” дея узр сўрайди.

III.2.3. Аввалги (III.2.2) бандда тавсифланган каби мазмун плани иккига ажралиши бошқа омиллар таъсирида, аниқроғи, мажбурият орқасида юзага келиши нутқий мулоқотда кўпроқ учрайди. Диалог кечаетган вазият сўзловчига доим ҳам ўйидагини эркин ифодалаш имконини бермайди: гоҳ ижтимоий-сиёсий шароитни ҳисобга олиб, гоҳ миллий ё маданий анъаналар ҳурматидан, гоҳи сұхбатдошлар андешасини қилиб битта гапдан қолишига тўғри келади. Аксига олиб, айни ҳол сўзловчидаги айтиш эҳтиёжини кучайтиради ва у бир йўлини қилиб – киноя, қиёс, мажоз каби воситалар орқали фикрини ифодалашга интилади. Айтиш керакки, бу тарз айтилган репликага сўзловчи юклаган мазмун диалог контекстидагина тушунилади. Шунга ўхшаш, адабий асар ҳам яхлит ҳолича киноя (мас., А.Орипов. “Чол ва коммунизм қиссаси”), қиёс (мас., А.Қаҳҳор. “Даҳшат”) ё мажоз (мас., Ойбек. “Наъматак”)га айланиши мумкин. Бундай асарларга муаллиф юклаган мазмун ҳам фақат контекст (асар яратилган даврдаги шароит, етакчи ижтимоий кайфият, муаллиф дунёкараши ва ш.к.) доирасида англашилади.

IV. Нутқий мулоқотга киришаётган сўзловчи ҳам, бадиий мулоқотга киришаётган ижодкор ҳам репрезентатив (тингловчи ё ўқувчига информация етказиш), экспрессив (информацияга ўз муносабатини ифодалаш) ва аппеллятив (тингловчи ё ўқувчига таъсир ўтказиш) мақсадларни кўзлайди. Шу боис коммуникатив бирлик бўлмиш репликада ҳам,

адабий асарда ҳам шу учала мақсад ҳар вақт ҳозир, фақат ҳар бир конкрет бирлиқда уларнинг салмоғи турличадир. Табиийки, коммуникатив бирлик (реплика ё адабий асар) нинг ташкилланиши (структуря) шу учала мақсадни рўёбга чиқариш учун оптималь имкон бериши лозим. Шунаقا экан, реплика (гап)нинг қурилиши билан адабий асар структураси орасида аналогиялар бўлиши табиий. Француз адабиётшunosи Р.Барт: «структуря нуқтаи назаридан ҳар қандай ривоявий матн гап моделига мувофиқ қурилади... ҳар қандай ҳикоя – бу катта гап” деб ҳисоблади¹.

IV.1. Албатта, Р.Барт фикрини мутлақлаштириб бўлмайди, лекин маълум асосга эгалигини ҳам инкор қилиш мушкул. Негаки, ҳақиқатан ҳам, ҳикояларнинг композицион қурилиши, кенгроқ қарасак, гап моделларини ёдга солади. Дейлик, “Новой қиз” (Чўлпон) ҳикояси контраст усулида қурилган бўлиб, унинг иккита қисми бир-бирига қарши қўйилгани, масалан, “Юрган дарё – ўтирган бўйра» қолипида; “Оқподшонинг инъоми” ҳикоясининг қолипи сифатида эса қўйидагича гапни тузиш мумкин: “Уста Тўхташ мукофот оламан деб, ажабтовур ковуш ясади ва уни виставкага юбориб, ўзи мукофот илинжида орзикб хушхабар кутди: оқподшодан унга катта “испасиба” келтириб беришди”. Хуллас, аксарият ҳикояларнинг қурилиши, уларнинг қисмлари ёки сюжетини ташкил қилган воқеалар орасидаги алоқаларни шу тарз гап моделлари орқали ифодалаш мумкин². Бу эса реплика (гап) ва адабий асар қурилишида умумий қонуниятлар амал қилишидан далолатdir.

IV.2. Композицион усувлар билан синтактик усувлар орасида аналогиялар кузатилиши ҳам қонуниятлар умумийлигидандир. Масалан, гап бўлакларининг одатдаги тартибини ўзгартириш – инверция усули билан сюжет воқеалари тартибининг ўзгартирилиши моҳияттан бир нарсадир. Ёки тмезис – гап ичига унга грамматик жиҳатдан боғланмаган гап ёки бўлакнинг киритилиши билан асар сюжетига бевосита боғлиқ бўлмаган воқеаларнинг киритилиши ҳақида ҳам худди шу гапни айтиш мумкин. Шунга ўхшаш, адабий асарнинг композицион қурилишида параллелизм, градация, эллипсис каби синтактик усувларнинг ҳам муқобилларини кўрсатиш мумкин.

¹ Барт Р. Введение в структурный анализ повествовательных текстов//Зарубежная эстетика и теория литературы XIX-XX вв.- М.,1987.- С.391

² Куронов Д. Бадиият сирлари// Тафаккур.- 1996.- №4.

IV.3. Адабий асар композициясида гапни мураккаблаштирувчи унсурларнинг аналоглари ҳам яқол кўзга ташланади. Дейлик, модал конструкциялар гапга мазмун ва грамматик жиҳатдан боғланмай, сўзловчининг ўзи етказаётган информацияяга муносабатини ифодалайдики, моҳияти ва вазифасига кўра улар воқеабанд асарлардаги лирик чекиниш кабидир. Ёки Р.Акутагаванинг машҳур “Чангалзорда” ҳикоясида кўлланган усул – битта воқеанинг уч иштирокчи томонидан ҳикоя қилиниши қай бир маънода уюшиқ бўлаклар билан мураккаблашган гапни эслатади.

Хуллас, нутқий жанр ва бадиий коммуникация воситаси сифатида адабий асар нутқий коммуникация бирлиги бўлмиш гап билан кўплаб умумий жиҳатларга эгадир. Буларни яна бир карра эслатишга ҳаракат қилганимиз, адабий асарга нутқий жанр сифатида ёндашганимиз ўша умумий жиҳатларни шунчаки кўрсатиб бериш учун эмас, албатта. Бизнингча, айни ёндашув адабий асар, адабий жараён, адабий асар талқини, адабий-бадиий ижод табиати каби қатор назарий муаммоларни тўғри ҳал қилишга йўналиш, андоза бериши билан аҳамиятлидир.

2014 йил

АДАБИЙ АСАР ТАЛҚИНИГА ДОИР АЙРИМ ҚАЙДЛАР

Масала юзасидан фикрларимизни бадиий коммуникация бирлиги саналувчи адабий асарни нутқий коммуникация бирлиги бўлмиш гап билан қиёслаган ҳолда баён қилиш кўп жиҳатдан ўнғай кўринди. Зеро, адабий асар – энг аввал, нутқ ҳодисаси: адабий асарнинг яратувчиси – нутқ ирод этаётган одам, шунга мос тарзда адабий асарнинг ўқувчиси – тинглаётган одам. Бундай дейишимизга асос, ёзмоқнинг моҳияттан тасаввурдаги ўқувчига гапирмок, ўқимоқ эса тасаввурдаги ёзувчини тингламоқ эканидир. Биз тўхталмоқчи бўлган масала – *талқин* эса шу иккисининг орасидаги, аниқроғи, иккисига ҳам бирдек тааллуқли ҳодисадир.

1. Аввало, *талқин* истилоҳини аниқлаштириб олишимиз зарур. Ҳозирги истеъмолда “интерпретация”нинг синоними

сифатида қўлланувчи ушбу терминнинг истилоҳий маъноси ўзга томонидан айтилган гап ёхуд ёзилган асар (илмий, фалсафий, диний, бадиий ва х.) мазмунини англаш, уни маълум яхлитлиқда тушуниш ва тушунтириш демакдир. Кўриниб турганидек, бу ўринда терминни соҳамиз, яъни адабиётшунослик доирасидан кенгроқ оляпмиз, бироқ, барибир, матн ҳудудидан четга чиққанимиз йўқ: мазкур маънода талқин деганимиз “матн герменевтикаси” чегарасида қолмоқда. Ҳолбуки, талқин (интерпретация) термини ҳозирда кўплаб фан соҳалари вакиллари илмий муомаласида ғоят фаол ва биз юқорида айтилгандан анча кенг, яъни умуман бирон нарсани тушуниш ва тушунтириш амаллари маъносида ишлатилмоқда.

1.1. Илмий муомалада кенг қўлланувчи “бадиий талқин” тушунчаси билан “адабий асар талқини” тушунчаларини фарқламоқ керак (қулайлик мақсадида амалиётда уларнинг иккиси ҳам кўпинча битта “талқин” сўзи билан ифодалангани учун баъзан аксинча ҳол кузатилади). Негаки, ушбу тушунчаларнинг биринчиси ижод жараёни билан, иккинчиси адабий асарни ўқиш (уқиш) жараёни билан боғлиқ.

1.1.1. *Бадиий талқин* дегани предметни бадиий образ воситасида идрок қўлмоқ (тушунмоқ) ва англаганини бадиий образлар орқали ифодаламоқ (тушунтируммоқ) дирки, бу амаллар ижод – яратиш жараёнидан ташқарида мавжуд эмас. Аслида, бу амаллар бадиий санъатларнинг барига ҳам у ё бу даражада хос, бироқ бошқаларига қараганда билиш имкониятлари кенгроқ бўлган бадиий адабиётда яққопроқ намоён бўлади. Зеро, адабий-бадиий ижодга туртки берувчи асосий омиллардан бири билиш эҳтиёжи дир. Масалан, Шукур Холмирзаевнинг 80-йиллар охириларидан бошлаб 90-йиллар ўрталаригача ёзган асарларига диққат қилинса, муаллифнинг жамият аъзолари онг-кайфиятида етилиб келаётган ўзгаришлар, уларнинг ижтимоий ҳаётдаги янгиликларга турлича муносабатларига айрича эътибор бераётган кўринади. Сабаби, одатланилган ижтимоий тартиботу муносабатларга дарз кетиб, эътиқоду қадриятларни қайта кўриб чиқиши тақозо этилаётган бир шароит – ўтиш даври унинг қарши сига қатор саволларни кўндаланг қилди. Адид давр ҳаёти манзараларини чизаркан, ўзи яратган образлар ёрдамида шу саволларга жавоб излади (даврни тушунишга интилди), муайян хулосаларга келди ва асарларида ўша образларни

англаганларини ифодалашга мос тартиб ва муносабатдорликда жойлаштириди (даврни *тушунтишига интилди*).

Мазкур жараённи адабиётшуносликда “Шукур Холмирзәев ижодида ўтиш даврининг бадий талқини” деб юритамиз. Шунга ўхшаш, ижодкор бирон тарихий воқеа, шахс ё миллат тақдири, бирон туйғу, инсоний хусусият ва шу кабиларни образлар воситасида бадий талқин қиласвериши мумкин, адабиётшунослик эса мос ҳолда номлайверади: “Торобий қўзғолонининг бадий талқини”, “мардикор воқеаларининг бадий талқини”, “ижодкор шахснинг бадий талқини”, “хиёнатнинг бадий талқинлари” ва ҳоказо.

1.1.2. Аввалги банд (1.1.1.)да айтилганлардан келиб чиқсан, адабий асар талқини моҳиятан “талқиннинг талқини”-дир. Зоро, ижодкорнинг бадий талқини натижаси бадий образ – белгиларда акс этган экан, энди ўқувчи (мунаққид) нинг уларга маъни бермоғи лозим бўлади. Яъни адабий асарни талқин қилиш учун бадий образлар тилини мантиқ тилига кўчириш талаб этилади. Фақат ушбу амалнинг салмоғи ўқувчи билан мунаққид талқинида бир хил эмас: ўқувчи образнинг айрим маъно қирраларини “ҳис қилиш” даражасида қолиш билан қаноатлана олади, мунаққид ўша қирраларни ҳам мантиқан асосли тушунмоқни мақсад қилади.

2. Адабий асар матн, ёзма манба сифатида яшайди. Ҳар қандай ёзма манба (матн) эса, замонавий герменевтиканинг асосчиси Ф.Шлейермахерга кўра, иккиёклама табиатга эга: бир томондан, у тил тизимиға нисбатан қисм, иккинчи томондан, муайян бир индивиднинг ижод маҳсулидир. Шунга кўра талқинчи олдида бир-бирига боғлиқ иккита вазифа туради: биринчиси – матндаги лисоний ифодани муайян тил тизимининг узви сифатида ўрганиш (“грамматик” талқин), иккинчиси – унинг ортида турган бетакрор субъектни англаш (“психологик” талқин). Мазкур вазифаларнинг иккаласини ҳам тўла уddyалаш имкондан ташқарида, шунинг учун ҳам адабий асар талқини чексиз жараёндир.

2.1. Адабий асарга, аниқроғи, адабий-бадий асарга татбиқан “лисоний ифода” дейишнинг ўзи камлик қилади. Негаки, бунда лисоний ифода образ яратишга хизмат қилади, адабий-бадий асарда ифоданинг ўзи икки қатламли. Мураккаблик шундаки, лисоний ифоданинг ўзи бевосита мазмунга эга, айни ҷоғда, бадий мазмун ўша лисоний ифода яратат-ётган образлар орқали, яъни “образлар тили”да ифодалана-

ди. Шунга кўра, тушуниш даражаси ҳам икки турли. Дейлик, лисоний ифода етказаётган мазмуннигина тушунган ўқувчи учун бадиият ҳодисаси мавжуд эмас. Масалан, “Ўғри”ни ўқиган бундай ўқувчи учун ҳикояда тасвирланган ҳаётий воқеа бор, воқеага ровий муносабати ва шундан келиб чиқадиган бевосита мазмун бор, холос. Бас, унинг учун ҳикоя воқелиги билан реал воқелик орасида фарқ йўқ, демак, реал ҳаётий воқеани мушоҳада қилиши билан ҳикояни мушоҳада қилиши орасида ҳам айтарли фарқ йўқ. Ҳикоядаги “образлар тили”да ифодаланувчи мазмуннинг юзага чиқишини гап курилиши, умуман, тил қонуниятларга қиёсан кўриб ўтамиш. Аввало, ҳикоядаги асосий образларни аниклаб оламиш, булар: Қобил бобо, амалдорлар, маҳалла ахли; бошқа образлар (деталлар)нинг бари шуларга тобеланади: изоҳлайди, аниклайди, тўлдиради. Қиёслаш учун бошланғич грамматик шаклдаги “ука”, “мактаб”, “бормоқ” сўзларини олайлик. Буларнинг ҳар бири алоҳида олинганида ҳам маънога эга, бироқ мазмун ифодалаш учун уларни бир-бирига муайян муносабатдорлиқда боғлаш талаб қилинади. Шу шарт бајарилса, масалан, “Укам мактабга боради” (ёки “Укамнинг мактабига бордим”, “Укам билан мактабга бораман” ва ш.к.) тарзидаги мазмунни ифодалаш ёки ўқиш мумкин бўлади (акс ҳолда, масалан, кўлида инглизча-ўзбекча луғат, лекин инглиз тили грамматикасидан мутлақо бехабар одамнинг инглизча гап тузиши ёки шундай одамнинг инглиз тилидаги гапни ўқишига монанд ҳол юзага келади: сўзларнинг маъносини билади, лекин аниқ бир мазмунни ифодалаш ёки ифодланган мазмунни ўқишига ожиз). Кўриб турганимиздек, мисолга олинган учтагина сўз воситасида турлича мазмунларни ифодалаш имкони мавжуд, сўзловчига шулардан биттаси керак, демак, у сўзларни ўша мазмунни ифодалашга мос тарздаги муносабатдорлиқда боғлайди. Лисоний ифодада сўзлар орасидаги муносабатни грамматик воситалар равshan кўрсатиб туради, образлар орасидаги муносабатларнинг эса бундай кўрсаткичлари йўқ, аникрофи, улар лисоний ифодадаги каби равshan кўзга ташланмайди. Айни ҳол образли ифоданинг ҳамиша талқинталаб бўлишини белгилаб, уни матнга асосланган ҳолда контекст (муаллифнинг ижодий нияти, асар ёзилган даврдаги маънавий-руҳий ҳолати; давр ижтимоий-маданий шароити, етакчи ижтимоий кайфият ва б.)лар доирасида тушуниш заруратини келтириб

чиқаради. Агар шу тарз ёндашсак, “Ўғри”нинг образлар тили омманинг томошабин мақомида тургани учун қатағон машинаси қаршисида ёлғиз қолган инсон фожиасини акс эттирган дейиш мумкин бўлади.

2.2. Ф.Шлейермахер грамматик талқиннинг энг муҳим шарти сифатида “муаллиф ва илк ўқувчилар учун умумий бўлган тил”ни кўрсатади. Агар тил мудом ҳаракатда, ўзгаришда бўлувчи ҳодиса эканини эътиборга олсак, ушбу шарт ҳақиқатан ҳам ғоят муҳимлиги аён бўлади. Дейлик, тилнинг тарихий тараққиёти жараёнида сўз маъносининг торайиши ё кенгайиши, сўзнинг тамом янги маънода қўллана бошлаши; ўзлашма сўз ўзлаштирган тилда ўзгача маъно олиши ёки луғавий маъноларидан фақат биттасинигина сақлаб қолиши; ўзга тилдаги сўзнинг турли грамматик шакллари ўзлаштирган тилда алоҳида мустақил сўзга айланиши каби ҳоллар объектив равишда мавжудлиги буни янада долзарб этади. Навоий асарларини тушуниш учун улар яратилган давр муҳитида араб ва форс тилларининг мақоми юксак бўлгани, шоирнинг ўзи ва илк ўқувчилари – даврнинг зиёли кишилари ҳар икки тилни мукаммал билганини эътиборда тутиш, яъни нафақат туркий, балки араб ва форс тилларининг ҳам ўша даврдаги ҳолатини билиш талаб этилади. Талқин қилувчиларнинг бу борадаги билимлари чуқурлашиши баробари Навоий асарлари мазмунининг ҳам янги-янги қирралари очилаверади.

Шунга ўхшаш, лисоний ифодадаги неологизмлар ҳам “муаллиф ва илк ўқувчилар учун умумий бўлган тил”га эътибор қаратишни талаб қиласди. Масалан, Чўлпоннинг “Бу дунё деб у дунёни баҳосиз пулга сотдим-ку” мисрасида “баҳосиз пул” бирикмаси неологизмдир. Негаки, то биринчи жаҳон уруши йилларига қадар пулнинг қадрсизланиши тушунчалиси халқимизга ёт бўлган: қадрсизланиш қофоз пулга хос, бундай пул эса бизга чор истилоси билан кириб келган ва то биринчи жаҳон урушигача подшолик пули қадрсизланган эмас. Шеър ёзилган давр (1920) кишиларига “баҳосиз пул” бирикмаси Керенский ҳукумати муомалага киритган ва тезда шиддатли равишда ўта қадрсизланган пулни англатган. Яъни “илк ўқувчилар”га ушбу бирикма алоқадорлик асосида 1917 йил февраль инқилоби ва юртдаги тараққийпарвар кучларнинг у билан боғлиқ орзу-умидларини эслатадики, Чўлпон шунга таянган ҳолда “февраль инқилоби туғдирган умидларга

алданиб, у дунёлигимга зиён етказдим” қабилидаги изтиробини изҳор қилади. Лисоний ифоданинг мазмунини **ан-глаб** олгач эса биографик контекстдан бу изтироб асосини тушуниб етамиз: таҳликали замонда шоирнинг отасини ўғлининг сиёсий фаоллиги ташвишга солган, унинг ёлғиз ўғли ўз ёнида, хавф-хатардан йироқ бўлишини исташи табиий. Кураш шавқига берилган ўғил эса отани ташвишга қўйиб, норозилантириб бўлса-да, ўз билганидан қолмайди. Орада маълум вақт ўтгач, умидлари саробга айланган Чўлпон энди отасини норозилантирганига ўкинади, қилмишини “у дунёни баҳосиз пулга сотмоқ” деб билади. Аён бўляптики, лисоний ифодани тушуниш образли ифодани идрок қилишнинг асоси, зеро, бусиз образларни тўлақонли тасаввур қилиш, уларни бир-бирига боғлаб турган ғоят нозик ришталарни илғаб олиш маҳолдир.

3. Аввалги бандда ҳам кўрдик, аслида, грамматик талқин билан психологияк талқиннинг ажратилишида муайян шартлилик бор. Зеро, грамматик талқин обьекти бўлмиш матн айни чоқда субъектни англашнинг илк асоси ҳамдир. Негаки, матн муаллифнинг ижод онларидаги маънавий-руҳий ҳолатини ўзида акс эттиради, демак, субъект ҳақидаги илк тасаввур ҳам матннинг ўзидан олинади ва шу тасаввур **кейинча** контекстлар орқали тўлдирилиб, аниқлаштириб борилади. Айтилганлар айрим мутахассислар “образли табиати”-ни инкор қилувчи “изҳор шеърияти”да яққол кўринади. Билганлар майли, ҳозирча муаллифини айтмай ЎзССР ташкил бўлганининг 10 йиллиги муносабати билан ёзилган шеърдан бир бандни олайлик:

**Диёрим, каттакон рўзгорда бир тансан,
Қандай жой, нима иш – хўп яхши билгансан,
Дунёга янгидан туғилиб келгансан,
Ўн йилда янгидан ясанди тарихинг.**

Синчков ўкувчи банднинг иккинчи мисраси, яъни Ўзбекистонга қаратса “Қандай жой, нима иш – хўп яхши билгансан” дейилгани шеърнинг мадҳ руҳига у қадар сингишиб кетмаётганини дарҳол сезади. Чунки оҳанг шундайки, бутун бошли мамлакатга ёш болага уқтирган каби “жойинг мана бу ер, вазифанг мана бу” дея кўрсатиб қўйилгандек таассурот қолади. Мумтоз шеъриятда мадҳ қилган бўлиб ҳажв қилмоқ ва,

аксинча, ҳажв қилган бўлиб мадҳ этмоққа асосланган ифода санъатлари борлигини билган ўқувчи бунда ҳам шу йўлдан борилмаганми деган андишага бориб, беихтиёр шеърга син-чиклаброқ қарай бошлайди. Хуллас, лисоний ифода ўқувчига муаллифнинг ижод онларидаги маънавий-рухий ҳолати ҳақида тасаввур берди, унинг мавжуд ҳолатдан қониқиб-қониқолмай турганини ҳис қилдирди. Муҳими, агар ўқувчига шеър муаллифи ким экани маълум эмаслигини ёдга олсак, унинг тасаввури бевосита матндан, лисоний ифодадан ўсиб чиққанини таъкидлаш мумкин. Энди шеър Чўлпонники эканлиги маълум ҳолатни тасаввур қилайлик: ўқувчиларнинг аксарияти Чўлпон ҳақидаги тасаввуридан келиб чиқиб аввалбошдан юқоридагича мазмунни излашга мойил бўлади, бошқа бир қисми эса “Мана, Чўлпон ҳам шўрони мадҳ қилган-ку!” деган иддаоси билан қолади. Иккала ҳолда ҳам субъективлик устувор: биринчи тоифа матнадаги юқоридагича талқинни асословчи нуқталарнинг керагидан ортиғини топади, иккинчи тоифа эса уларни мутлақо кўрмайди. Кўриб ўтилган ҳоллар адабий асар талқинида, энг аввал, лисоний ифодани атрофлича чуқур ўрганиш, шундан сўнггина матнни бошқа контекстлар доирасида олиб қараш мумкин деган фикрнинг ишончли исботидир.

4. Нутқ жараёнида айтилган гап (диалогдаги реплика) да сўзловчи онгида айни пайт (нутқ моменти)да кечаетган ҳолат, адабий асарда эса санъаткорнинг ижод онларидағи маънавий-рухий ҳолати муҳрланади. Ўша гап айтилган нутқий вазият ҳам, сўзловчининг айни пайтдаги руҳий ҳолати ҳам бетакрор – иккиси ҳам вақт дарёсида оқиб кетди. Бу ўринда “битта дарёга икки бора шунғиб бўлмайди” қоидаси амал қиласи. Шундан келиб чиқсан, бетакрор нутқий вазият ва бетакрор руҳий ҳолатда айтилган гапнинг ўзи ҳам том маънода бетакрордир. Айтилган фикрлар ижод онлари, санъаткорнинг ижод онларидағи маънавий-рухий ҳолати ва адабий асарга ҳам бирдек тааллуқли.

4.1. Нутқ моментидаги руҳий ҳолатда сўзловчи шахсияти (инсоний фазилат ва нуқсонлари, феъл-хўйи, интеллектуал савияси, маънавий қиёфаси ва ш.к.) муҳри бор. Бироқ сўзловчи шахсияти репликада тўғридан-тўғри эмас, нутқ моментидаги лингвистик ва экстралингвистик омиллар приз-масидан ўтиб аксланади. Демак, реплика мазмуни уни ким ва қандай вазиятда айтиётганига боғлиқ ҳолда конкрет-

лашади. Шунга ўхшаш, адабий асарда акс этувчи ижод онларидаги маънавий руҳий ҳолатда ҳам, шубҳасиз, муаллиф шахсияти – унинг ҳаёт йўли билан боғлиқ характери, дунёқараши, орзу-интилишлари ва ш.к.лар муҳри бор. Бироқ булар ҳам адабий асарда тўғридан-тўғри эмас, ижод жараёни кечаетган вақтдаги шароит (ижтимоий ва шахсий ҳаёт, маданий муҳит, маърифий ҳолат ва ш.к.)дан келиб чиқувчи кайфият фокусидан ўтган ҳолда аксланади. Демак, адабий асар мазмуни ҳам уни ким ва қандай вазиятда ёзганига боғлиқ ҳолда конкретлашади. Бу икки омилни – ким айтгани ва қандай вазиятда айтганини асло бир-биридан ажратиб бўлмайди.

4.1.1. Гап (адабий асар) мазмунини тўғридан-тўғри ким айтгани (ёзгани)га боғлаб қўйиш хато, бу ҳолда сўзловчи (ёзувчи) ўзгармас, қотиб қолган махлук сифатида тушунилган бўлади. Ҳолбуки, яшаётган одам мудом ўсиш-ўзгаришда, ташқи олам билан муносабати таъсирида унинг руҳ-кайфияти турланиб, турфаланиб туради. Гап (адабий асар)да эса замонда узлуксиз кечаетган айни шу жараённинг – силсила-нинг бир ҳалқаси акс этади, холос. Шунга кўра, “бу одамнинг унақа дейиши асло мумкин эмас” ёки “ушбу ёзувчи бунақа мазмунни кўзда тутган бўлиши мумкин эмас” қабилидаги даъволар асоссизидир.

4.1.2. Гап (адабий асар) мазмунини тўғридан-тўғри у айтилган нутқий вазият (асар ёзилган давр шароити)га боғлаб қўйиш ҳам тўғри эмас. Негаки, сўзловчи (ёзувчи)нинг айтганлари ҳамиша вазият моҳиятига мувофиқ бўлиши шарт эмас: у гоҳи вазиятга тамом зид келадиган гап қилиши, гоҳ ўша вазият устидан кулиши, гоҳ эса “ўзининг олами”да (яъни руҳан узлатга чекиниб) яшагани ҳолда вазиятга буткул алоқасиз гап айтавериши мумкин. Дейлик, ножӯя ишимиз учун койиш ўрнига “Баракалла!” эшитганимиз; Афандининг сомсаҳонада “Гўшт-гўшт дейсан, энағар, гўштсиз ҳам бинойидай сомса қилса бўларкан-ку!” дея хотинни сўккани; хаёлта чалғиб кетган жойимиздан қайтибоқ сухбат мавзусидан йироқ гапни ўртага ташлаб қўйиб кулгига қолганимиз – булар юқоридаги фикрларни етарлича далиллай олади. Шулардан келиб чиқсак, масалан, Ҳ.Олимжонни “зулм авж олган вақтда баҳт ва шодликни куйлаган” дея маломат қилиш тўғри эмас. Маълумки, шоирга “баҳт ва шодлик куйчиси” номини 30-йилларнинг ўрталаридан бошлаб ёзган шеърлари олиб берган. Унинг умрлик муҳаббатини учратиши, уйланиши, оталик баҳтини

туюши – хуллас, ҳаётининг энг бахтли дамлари шу вақтга тўғри келади, табиийки, ижодида ҳам ижтимоий-сиёсий лирика ўрнини интим лирика эгаллади. Мазкур ҳол моҳиятан юқорида келтирганимиз сухбат чоги ўз хаёлига чўмиб умумий мавзудан чиқиб қолган сухбатдош ҳолига ўхшаш. Агарки сухбатдошнинг ҳолини табиий деб биларканмиз, шоирнинг мазкур ҳоли ҳам шундай ҳисобланиши керак. Демак, аксинча, шоир ижодидаги мазкур фактнинг “айб” сифатида талқин қилиниши ғайритабиий, ғайриилмий деб тушунилмоғи керак. Хулоса қилиб айтганда, адабий асарнинг ўзи ёзилган давр билан муносабатлари турли кўринишларда бўлиши мумкин, улар бевосита ижодкор маънавий-руҳий ҳолати билан боғлиқ, талқинда буни назарда тутиш шарт қилинади.

5. Модомики, адабий асарда санъаткорнинг ижод онларидаги бетакрор маънавий-руҳий ҳолати акс этар экан, унинг мазмун-моҳиятини англашда ўша ҳолатни тасаввур (ҳис қилиш) ҳал қилувчи аҳамият касб этади. Тамсил қилсак, мазкур тасаввур (ҳис қилиш)нинг уруғи матн (лисоний ифода)ни ўрганиш давомида сочилади, лекин фақат контекстлар доирасидагина унади. Ижод онларидаги маънавий-руҳий ҳолатнинг яқин контекстлари қўйидагилар: 1) муаллиф ҳаётининг асар яратилган вақтни ўз ичига олувчи босқичи; 2) муаллиф шу босқичда яратган бошқа асарлар; 3) жамият ҳаётининг муайян бир даври ва ундаги етакчи ижтимоий кайфият; 4) шу давр адабиёти. Яъни талқинчи ўзининг ихтиёрида мавжуд воситалар (матн, ижодкор биографиясига доир фактлар, шу даврда яратган асарлари, давр ҳаёти ҳақидаги маълумотлар ва б.)га таяниб ўша бетакрор маънавий-руҳий ҳолатни ҳис (тасаввур) қилмоғи лозим бўлади. Табиийки, матнни ҳис қила олиш даражаси ҳам, контекстларга оид билимлардан хабардорлик ва уларни талқинга татбиқ эта олиш иқтидори ҳаммада бир хил эмас. Айни ҳол адабий асарнинг турлича талқин қилиниши, талқин имконларининг чексизлигини таъминловчи асосий омиллардандир.

6. Инсон ўйлаб ва ё ҳис қилиб турганини сўз билан тугал ифодалашга ожиз, ўйидаги билан тилидаги фарқ қилади. Ифода ҳамиша сўзловчи ифодалашни истаганидан кўра тор, чала, тугалланмагандир. Тингловчи буни ҳис қилади ва ифодадаги кемтикларни (экстралингвистик омилларга диққат қилиш, сўзловчи билан муносабатлари контекстини хотирга келтириш ва, қисман, тасаввурини ишга солиш ка-

билар асосида) тўлдириш пайида бўлади. Шунга ўхшаш, адабий асарда ҳам муаллиф айтмоқчи бўлганини тўла ифодалай олмайди, бундаги кемтиклар ўқувчининг ижодий тасаввурни тўла ишга солиши ҳисобига тўлдирилади. Бошқа томони, адабий асардаги имплицит сўзловчи нутқини тушунишнинг жонли мулоқотдагидан кўра мураккаблиги шундаки, бунда қатор экстравангвистик омиллар (ритм, темп, тон, умуман интонация) ҳам матн асосида қайта яратилиши зарур. Табиийки, бунга қобиллик ҳам, ижодий тасаввур имконлари ҳам ўқувчиларда фарқли, айни ҳол талқинлар турличалигининг яна бир омилидир.

7. Айтилган гап (эълон қилинган адабий асар)ни турли-туман талқин қилиш имкониятлари ҳамиша мавжуд. Негаки, ўзаро нутқий мулоқот (бадиий коммуникация)да биз бир-биримизга фикр (мазмун) эмас, балки унинг ифодаси учун шакллантирилган гап (матн)ни етказамиз. Тингловчи (ўқувчи), ўз навбатида, ўша гап (матнни)ни фикр (**мазмун**) **га** айлантириши лозим бўлади ва шу тариқа нутқий мулоқот (бадиий коммуникация) амалга ошади. Кўриб турганимиздек, тингловчи (ўқувчи) шунчаки ахборот қабул қилувчи эмас, балки мазмун яратувчи субъектдир. Шунга кўра, сўзловчи етказмоқчи бўлган (ва ўз наздида етказган) мазмун билан тингловчи англаган мазмун айнан бир нарса бўлолмайди. Адабий асар мисолида эса мазмун яратувчи субъектлар сони (ёзувчи + асарни ўқиган ҳар бир ўқувчи) фоят кенг, бас, талқинлар сони ҳам шунга мутаносибдир.

7.1. Мулоқот предметидан хабардорлик даражасининг фарқ қилиши туфайли муайян вазиятда айтилган гап сухбат иштирокчиларига турлича мазмунларини етказиши мумкин. Масалан, сухбат иштирокчиларнинг бари танийдиган одам ҳақида “Аҳмад ака хўрозда!” дейилди. Тингловчиларнинг ҳаммаси буни маъқуллади, фақат уларнинг бири “Аҳмад ака тез, жанжалкаш одам” лигини, иккинчиси “Аҳмад ака аёлларга ўчроқ, “юрадиган” одам” лигини, учинчиси “Аҳмад ака – мард одам” эканини билади ва ҳар бири ўз билганидан келиб чиққан ҳолда сўзловчини маъқуллади. Ҳолбуки, сўзловчи “Аҳмад ака аёллар бригадаси бошлиғи” эканини назарда тутган, холос. Тингловчилар англаган мазмунларда субъективлик устувор, бироқ улар объектив асос – айтилган гапдан ўсиб чиқяптики, уларни инкор қилиб бўлмайди. Шунга ўхшаш, адабий асар талқини ҳам муаллиф назарда

тутгандан тамом бошқача бўлиши мумкин ва бунга табиий деб қарамоқ жоиз. Бу ўринда фақат биргина талаб ўринли: *талқин матндан ўсиб чиқиши шарт*.

7.2. Турлича тушуниш имконияти сўзловчи томонидан атайин яратилиши ҳам мумкин. Масалан, баҳорда қайтариш шарти билан қарз берган одам иштирок этаётган суҳбатда “Мана, баҳор ҳам келди!” дейилса, буни қарздор “Қарзни қайтариш вақти келди!” маъносида, бошқалар ўз маъносида тушунадилар. Шунга ўхшаш, адабий асар ҳам муаллифнинг хос ўқувчисига бошқа, оммага бошқа мазмунни етказиши мумкин. Чўлпон “Соз” тўпламининг биринчи шеърини “Бир неча йил қантаргач, Яна олдим созимни. Энди айтиб йиғламас, Кўнгилдаги розимни” сатрлари билан бошлайди. Бу билан у, бир томондан, шўроча тарбия топган ўқувчига “энди шўродан нолиб йиғлоқи шеърлар ёзмайман” дея ваъда беради; иккинчи томондан, хос ўқувчисидан “созим энди кўнгил розини айтольмайди” дея узр сўрайди.

7.3. Моҳияттан 7.2. банддаги каби, фақат сўзловчи ихтиёри билан эмас, мажбурият орқасида юзага келувчи ҳолатлар нутқий мулоқотда кенг учрайди. Зеро, нутқий вазият сўзловчига доим ҳам ўйидагини эркин ифодалаш имконини бермайди: гоҳ ижтимоий-сиёсий шароитни ҳисобга олиб, гоҳ миллый ё маданий анъаналар ҳурматидан, гоҳ суҳбатдошлар андишасини қилиб битта гапдан қолишига тўғри келади. Аксинча, айни ҳол сўзловчидаги айтиш эҳтиёжини кучайтиради ва у бир йўлини қилиб – киноя, қиёс, мажоз каби воситалар орқали фикрини ифодалашга интилади. Айтиш керакки, бу тарз айтилган гапга сўзловчи юклаган мазмун диалог контекстидагина тушунилади. Шунга ўхшаш, адабий асар ҳам яхлит киноя (мас., А.Орипов. “Чол ва коммунизм қиссаси”), қиёс (мас., А.Қаҳҳор. “Даҳшат”) ё мажоз (мас., Ойбек. “Наъматак”)га айланиши мумкин. Бундай асарларга муаллиф юклаган мазмун ҳам фақат контекст (асар яратилган даврдаги шароит, етакчи ижтимоий кайфият, муаллиф дунёкараши ва ш.к.) доирасида англашилади.

8. Мақолда айтилган гапни отилган ўққа қиёс қилинадики, бунинг бир маъноси “айтиб бўлган гапингнинг эгаси эмассан” демакдир. Масалан, сўзловчи айтган гап бировга озор етказди, у эса буни чиндан-да истамаган. Лекин энди кеч, чунки айтилган гап моддийлашиб бўлди: эшитувчи уни ўз талқинида тушунишга ҳақли. Сўзловчи ҳар не куйиниб “ундай эмас,

бундай демоқчийдим” десин, эшитувчи кўнглини озордан тамом фориғ этолмайди. Негаки, айтилган, яъни товушларда моддийлашиб бўлган гап унингча талқин қилишга ҳам изн беради. Шунга ўхаш, эълон қилинган адабий асар ҳам энди муаллифники эмас, ўқувчи уни ўзича тушунишга ҳақли, муаллиф талқини охирги инстанция бўлолмайди, чунки у ҳам имкондаги талқинлардан бири, холос. Демак, гоҳ-гоҳ учраб турадиган муаллифнинг танқидчиликдаги талқинларга қарши чиқиши ёки мунаққиднинг асар ҳақидаги муаллиф сўзларига бешак далил сифатида ёпишиб олиш ҳоллари тўғри эмас.

Адабий асар талқини масаласидаги муроҳазаларимни гап билан қиёсан баён қилишга жазм этганим танқидчиликдаги айрим баҳсли нуқталарга ойдинлик киритиш, яна ҳам аниқроғи, XX аср ўзбек адабиёти намуналаридан айримларини янгича талқин қилиш йўлидаги уринишларимга нисбатан билдирилган фикрларга жавоб беришу шу баҳона қарашларимни бутлаш ва тартибга келтириш нияти билан боғлиқ. Албатта, хали етарли асосланмаган айрим хулослар, батафсилроқ ёритиш зарур бўлган жиҳатлар борлиги шубҳасиз. Шунга қарамай, адабий асар талқини борасида тўплаган тажрибам ва ўқиб-ўргангандарим асосида баён қилгандарим мутахассисларда қизиқиш уйғотар ва улар билдирилган фикрлар қарашларимни яхшироқ тартибга солишим, сайқаллашимга ёрдам берар деган умидда қоламан.

2013 йил

АДАБИЙ ТАЪЛИМДА ТАРИХИЙ-БИОГРАФИК ШАРХ-НИНГ АҲАМИЯТИ ҲАҚИДА

Шарҳлаб ўқитиш таълимдаги, жумладан, адабий таълимдаги энг қадимий ва синалган усууллардан биридир. Қадим юонон файласуфлари Афлотуну Арастуларнинг диалог шаклидаги асарларига эътибор берилса, шогирдлар билан жонли суҳбатларнинг муҳокама предметини шарҳлаш асосига қурилганини кўриш мумкин. Шарқ мударрислари эса диний ё дунёвий илмга оид фундаментал характердаги асарни маълум вақт давомида шарҳлаб тушунтирганлар ва шу асосда толибул илмларнинг бу асарлар мазмун-моҳиятини пухта ўзлаштиришларига эришганлар. Дарвоҷе, ўтмишдаги олимларнинг у ёки бу асар шарҳига бағишлиланган китоблари (масалан, Форобийнинг Арастуга шарҳлари)га, аввало, айни шу ўқитиш усулига мос қўлланмалар сифатида қараш тӯғри бўлади. Шунга ўхшаш, адабий таълим ҳам, масалан, Шайх Саъдий, Хўжа Ҳофизу Мирзо Бедил каби ижодкорлар асарлари қатида ботин маъноларни, рамзу мажозлар воситасида ифодаланган теран фалсафий, сўфиёна мазмунни очиб беришга – шарҳлашга қаратилган.

Албатта, асрлар давомида шаклланган бу анъана изсиз йўқолгани йўқ, у ҳозирги адабий таълимнинг унсур (инструмент)ларидан бири сифатида ҳамон яшаб келмоқда. Бироқ, бизнингча, ҳозирги адабий таълимда, **биринчидан**, шарҳга етарли қиммат берилмасдан, у кўпроқ “лугат билан ишлаш”, айрим фактларни қайд этиш, ўрганилаётган мумтоз адабиёт намуналаридағи сўфиёна маъноларни фрагментар тарзда очиб беришга интилиш кабилар билан чекланиб қолаётир; **иккинчидан**, янги адабиёт намуналарини ўрганишда шарҳ гўё у қадар зарур эмасдек, “шундоқ ҳам тушунарли-ку” қабилидаги ёндашув кузатилади. Ҳолбуки, шарҳ асардаги образлар тилини мантиқ тилига ўгиришdirки, шу жиҳатдан у мумтоз адабиётни ўқитишда ҳам, янги адабиёт намуналарини ўрганишда ҳам бирдек муҳимдир. Мазкур фикрларимизни, хусусан, янги адабиёт намуналарини ўқитишда тарихий-биографик шарҳнинг аҳамиятини Чўлпоннинг “Қаландар ишқи” ғазали мисолида асослашга ҳаракат қиласиз.

Ғазал 1920 йилда, Чўлпон Шарқ қурултойи муносабати билан Озарбайжон пойтахти Бокуда бўлган пайтда ёзилган бўлиб, ҳақли равишда шеъриятимиздаги ишқий лириканинг

гўзал намуналаридан бири саналади. Дарҳақиқат, ғазални ўқиганки шеърхон бу баҳо асосли эканини ич-ичидан эътироф этади. Бироқ, маълумки, шеър “образлар тили”да сўзлайди, образ эса табиатан кўпмаънолилик хусусиятига эгадир. Зеро, образ ижод онларидаги маънавий-руҳий ҳолатни ўзига муҳрлаган ҳолда тамом бошқа маънолар ифодасига ҳам хизмат қиласкеради. Шунаقا экан, ғазалнинг туб мазмунини англаш учун шоирнинг уни ёзган пайтдаги руҳий ҳолатини тасаввур қилиш лозим бўладики, бунга тарихий-биографик маълумотлар асосидагина эришиш мумкин.

Чўлпон оила муҳитидаёқ жадид нашрлари билан танишган, жадидчилик ғояларини онгию қалбига муҳрлаб, ўсмир чоғидан миллат тараққиёси ва юрт озодлиги дарди билан яшай бошлаган. 1917 йил февраль инқилобидан сўнг Чўлпоннинг ижтимоий фаоллиги бениҳоя ортади. Сабабки, ҳаммаслаклари қатори шоир ҳам юзага келган шароитда юртининг демократик йўл билан озод бўлиш имконияти мавжудлигига чин дилдан ишонади, муҳториятчилик ҳаракати умидларини қанотлантиради. Чўлпон Эски шаҳардаги ўзи мудирлик қилиб турган қироатхонада, фаол муҳториятчилар билан бирга Туркистоннинг турли шаҳарларига бориб ташвиқот ишларини олиб борди, ёниб ва ёндириб яшади. Мавжуд шароитда Русия империяси таркибидаги туркий халқларнинг мустақиллик йўлида бақамти ҳаракатигина натижা бериши мумкин деб ҳисоблагани боис туркчилик ғояларини **ҳаракат дастури**, **деб** билди: унинг Кавказ турклари билан алоқа боғлаш учун жўнаган Фарғона ҳайъати таркибида бўлиши, Қўқонда муҳторият эълон қилинмасиданоқ Оренбургга жўнашию Бошқирдистон жумҳуриятини мустаҳкамлаш орқали ўз юрти озодлигига кўшиш қилишни ният этгани ҳам шундан далолатдир. Бироқ, таассуфки, тарих ҳукми ўзгача эди: большевиклар ҳукумати Қўқон муҳториятини қонга ботирди, шоирнинг ҳаммаслаклари етакчи мавқе эгаллаган Бошқирдистон ҳукумати қувғин қилинди – осмон қадар умидлари ерпарчин бўлиб, ёниб-елишларидан ҳеч бир натижага чиқмаган Чўлпон 1919 йил бошларида юртига қайтди. Ўйлаймизки, куни-кеча орзулар осмонида парвоз қилиб юрган ёш **кўнгилга** бунинг нечоғли қаттиқ зарба бўлганини тассаввур қилиш қийин эмаски, “Қаландар ишқи” худди шу вазиятда – шоир руҳиятидаги умид ва умидсизлик курашида **кей-**

ингисининг қўли баланд бўлиб турган бир руҳий ҳолатда ёзилган.

*Мұхаббатнинг саройи кенг экан йўлни йўқотдим-ку
Асрлик тош янглиғ бу хатарли йўлда қотдим-ку.*

Агар юқоридаги биографик маълумотлар контекстида олиб қарасак, Чўлпоннинг шеър ёзилган пайтдаги ахволи руҳиясини бир сўз билан – “йўлсизлик” деб аташ мумкин бўлади. Худди шу “йўлсизлик”, ноаниқлик ҳолати уни ўртайди, ортига ўғирилиб, кечаги кунини мушоҳада қилишга ундейди. Шунинг учун кейинги байтда ўқиймиз:

*Карашма денгизин кўрдим на нозлик тўлқини бордур
Ҳалокат бўлғусин билмай қулочни катта отдим-ку.*

Бу ўринда ўқувчи диққатини “карашма денгизи” бирикмасига қаратиш ва уни яна биографик контекстда талқин қилиш мумкин. Аввало, шеър Бокуда – Ҳазар денгизи соҳилларида яратилганини, худди шу ҳол “карашма денгизи” образининг яралишига асос бўлгани эҳтимолини таъкидлаш лозим. Чўлпоннинг бир қатор шеърлари (“Пўртана”, “Ҳалқ”)да “денгиз” образидан “кураш”, “қудрат” маъноларини ифодаловчи рамзлар сифатида фойдаланилган. Шундан келиб чиқсан, биографик контекстда “карашма денгизи” ёш Чўлпонни ўзига жалб этган кураш майдонини англатади дейишга асос бор. Дарҳақиқат, февраль инқилоби умидларини **юксалтиған** Чўлпон бутун вужуди билан курашга кирди (“кулочни катта отди”), бироқ ўшандада у “ҳалокат бўлғуси” эҳтимолини хаёлга келтирмаган, энди, умидлари чилпарчин (“ҳалокат”) бўлгач, кечаги кунини ўқинч билан мушоҳада этади. Кейинги байтда шоирнинг ўқинчи янада юқори пардага кўтарилади:

*Ажаб дунё экан бу ишқ дунёси, аё дўстлар,
Бу дунё деб у дунёни баҳосиз пулга сотдим-ку.*

Ушбу байт тарихий-биографик шарҳнинг аҳамияти ҳақида юқорида айтилган гаплар нечоғли асосли эканини яқол кўрсатади. Зеро, уни тарихий-биографик контекстдан ташқарида англаш қийин. Аввало, ўқувчилар эътиборини “баҳосиз пул” бирикмасининг ўзбек тили учун ғализроқ экан-

лигига қаратиш, “бирикма қандай маънони билдиради?” тарзида савол қўйиш мақсадга мувофиқ. Албатта, ҳозирги ўкувчи “баҳосиз пул” бирикмаси остида қадрсизланган пулни тушуниши табиий ва ўкувчиларнинг жавоби ҳам шунга мос бўлади. Айни шу ўринда ўқитувчи “қадрсизланиш, девальвация” тушунчалари кўпроқ қоғоз пул билан боғлиқлиги, рус истилосига қадар қоғоз пул муомаласи бўлмаган Туркистон халқи учун ушбу тушунчаларнинг янгилигини айтиши керак бўлади. Туркистонда пулнинг қадрсизланиши I **жаҳон** уруши йилларда бошланган. Лекин февраль инқиlobидан сўнг ҳукумат тепасига келган Керенский бошчилигидаги муваққат ҳукумат чиқарган пулнинг қадрсизланиши зарбулмасал бўлгугулар даражада бўлган. Хуллас, шеър ёзилган давр кишиларига шоир “баҳосиз пул” деганида ўша Керенский ҳукумати муомалага киритган ва тезда ўта қадрсизланган пулни назарда туваётгани аниқ бўлган. Шу маълумотларни бергач, ўқитувчи шоир алоқадорлик асосида чиқарган пули орқали муваққат ҳукуматни назарда тутгани, яъни бу ўринда метонимия асосидаги кўчим мавжудлигини тушунтириши мумкин. Шундан сўнг қисқагина февраль инқиlobининг буржуа-демократик инқиlob бўлгани, Керенский ҳукумати мамлакатда демократик ислоҳотларни амалга ошириш шиорлари билан чиққанини эслатиб ўтиш жоиз. Ушбу тарихий маълумотларни баён қилгач, биографик маълумотлар берилади. Жумладан, Чўлпоннинг бошқа жадидлар каби февраль инқиlobи ғояларига, хусусан, юзага келган ижтимоий-сиёсий шароитида юртининг тинч йўл билан озодликка эришиши мумкинлигига чин дилдан ишонганини яна таъкидлаб айтиш лозим. Шунинг учун ҳам ёш Чўлпон бутун вужуди билан ижтимоий-сиёсий фаолиятга берилади. Шулардан келиб чиқсан, Чўлпон байтда февраль инқиlobига ишониб “у дунёни баҳосиз пулга сотдим-ку” дея изтироб чекаётгани маълум бўлади. Изтиробнинг асоси шуки, отаси уни бу йўлдан қайтарган. Шу ўринда ўқитувчи шоирнинг отаси Сулаймонқул баззоз шоиртабиат, маърифатли ва тараққийпарвар инсон бўлгани, жадидчилик ғояларига хайриҳоҳлиги боис 1914 йилда таъсис этилган жадид газетаси – “Садойи Фарғона”нинг Андижондаги вакили бўлиб турганини ҳам эслатиши зарур. Қанчалик илғор фикрли бўлмасин, 1917 йилда ҳаётий тажрибаси бой Сулаймонқул баззоз юрт талотўпли даврга кирганини

теран ҳис этиб турган. Табиийки, таҳликали замонда шоирнинг отасини ўғлининг сиёсий фаоллиги ташвишлантирган, у ёлғиз ўғлининг ёнида, хавф-хатардан йироқ бўлишини истайди. Бироқ “карашма денгизи”га ошуфта ўғил отани ташвишга қўйиб, норозилантириб бўлса-да, ўз билганидан қолмайди. Яъни миллый руҳда тарбия топган Чўлпон энди отасини норозилантирганига ўқинади, бу ҳолни “у дунёни баҳосиз пулга сотмоқ” деб билади.

Газалнинг навбатдаги байтида шоирнинг айни дамдаги руҳий ҳолати, умидларида алданишдан келган аламизтироблари янада юқорироқ пардада, мумтоз шеъриятимиздаги образли ифодалар орқали ўзининг ёрқин ифодасини топади:

*Унинг гулзорида булбул ўқиб қон айлади бағрим,
Кўзимдан ёшини жўй айлаб, аламлар ичра ботдим-ку.*

Агар мазкур байт билан аввалги учта байт қиёслаб кўрилса, фикримизча, бир муҳим жиҳатни сезиш қийин эмас: дастлабки учта байтда мумтоз шеъриятга хос образлилик таъсири у қадар сезилмайди, бунисида эса анъанавий образлилик кучли. Сабаби, ушбу байт кейинги байтга, унда анъанавий образлар орқали ифодаланган янги мазмунни англашга **кўприк** бўлиб хизмат қиласди:

*Қаландардек юриб дунёни кездим, топмайин ёрни,
Яна кулбамга қайғулар, аламлар бирла қайтдим-ку.*

Маълумки, мумтоз шеъриятимизда Ёр – Ҳақни излаб йўлга чиқсан солик образи кенг ўрин тутади. Агар биографик контекстдан келиб чиқсан, Чўлпон ушбу анъанавий образга янгича маъно юклаганини кўриш қийин эмас. Дарҳақиқат, юқорида айтдикки, Чўлпон ҳам йигит ёшидан Ёр – Юрт озодлиги учун кураш йўлига кирган, ёрни излаб дунё кезган (شاҳар-қишлоқларга чиқиб ташвиқот қилиши, Кавказга, **кейин** Оренбургга бориши), “ёрни топмай” бесамар кезишлардан сўнг, шеър ёзилишидан илгарироқ, қайғу-аламлар билан юртига – “кулба”сига қайтган эди. Худди шу кайфият, шоирнинг юртида юзага келган вазиятга ғоявий-ҳиссий муносабати эса ғазал мақтаъсида ўзининг гўзал ифодасини топган:

Мұхаббат осмонида гүзал Чүлпон әдим, дүстлар, Қоғамның нурига тоқат қолпомай ерга ботдим-ку.

Мақтаъда Чүлпон юрагидаги чүнг дардни ҳис қилиш, ҳамдард бўлишга қобил ҳаммаслак дўстларига, умуман, ўзини англай оладиган хос ўқувчига мурожаат этадики, бу ҳам юқоридагича контекст доирасида тушунилади. Яъни, бу ўринда шоирнинг «мұхаббат осмони» – юрт озодлиги учун кураш йўлини ёритиб турган юлдузни ерга ботирган «қуёш» – октябрь инқилобига муносабати ўз ифодасини топган.

Юқоридагича талқин, албатта, ягона ҳисоблана олмайди. “Қаландар ишқи”ни тарихий-биографик ва қисман миллий адабий анъаналар контекстида тушунишга интилганимиз, моҳияттан, шоир ёзган пайтида ғазалга юклаган мазмунни тушунишга ҳаракатдир. Иккинчи томондан, “Қаландар ишқи” каби рамзий-метафорик ифода йўсунига курилган ғазаллар ўзида аввалбошдан икки турли талқин имкони билан яралади. Яъни бундай асарларда тасвирланган нарса (тасвир плани)дан бевосита ўсиб чиқувчи маъно ҳам, контекст(лар)да намоён бўлувчи тагмаъно ҳам мустақил, бир-бирига халал бермаган ҳолда яшайверади. Демак, ғазал мазмунининг турлича тушунилиши табиий ва қонуний ҳолдир. Шунақа экан, “Қаландар ишқи” айни юқорида биз талқин қилган мазмунда тушунилиши лозим деган даъводан сақланмоқ керак. Фикримизча, **шу ҳолни** назарда тутган ҳолда ғазални ўрганишда аввал бевосита мазмуни етказилгани, яъни унинг ўқувчилар билан ишқий мавзудаги асар сифатида мұхокама қилингани мақсаддага мувофиқдир. Шундан кейингина ғазални тарихий-биографик контекстда таҳлил ва талқин қилиб берилса, бизнингча, ўқувчиларнинг адабиёт ҳақидаги, бадиий ижод табиати, бадиий асар мазмунининг серқирралиги ҳақидаги тасаввурларини бойитиш имкони юзага келади. Бундай имконлардан самарали фойдаланиш эса адабий таълимдан кўзланувчи мақсаддага эришишда ғоят мұхимдир.

2011 йил

“ГИПОТЕТИК УСУЛ” ҲАҚИДА МУЛОҲАЗАЛАР

Сўнгги йилларда XX аср ўзбек адабиётининг йирик намояндалари – Чўлпон, F.Фулом, Ойбек, А.Қаҳҳор, X.Олимжон асарларини янгича талқин қилиш йўлида тажриба ўлароқ ёзилган мақолаларим баҳсларга сабаб бўлди. Хусусан, X.O-ЛИМЖОННИНГ “Муқанна” драмаси ҳақида ёзганим мақола¹ ўз вақтида Н.Каримов, F.Мўминов каби устоз адабиётшуносларда жиддий эътиroz қўзғаганди. Албатта, баҳс ҳали тобида пайтлар кимдир каминани ёқлаб, ким эса муҳолиф мавқеда тургани ҳам табиий. Бироқ ҳозир муҳими бу эмас, муҳими, илмий баҳснинг пиравардида конструктив хуносага олиб келиши лозимлиги. Афсуски, зикр этилган баҳс бу миссияни бажара олмади, масала ҳамон очиқлигича қолаётир. Тўғри, “ҳар кимнику ўзига ой кўринар...” деган гап ҳам бор-у, бироқ шунда ҳам адабий танқид баҳснинг принципиал жиҳатлари, рационал мағзига етарли эътибор қилмагандек туюлаверадики, каминани яна шу масалага қайтишга ундан ҳам айни шу туйғудир. Демак, даставвал шу туйғуни юзага келтирган ва кувватлаб турган нуқталарга тўхталамиз.

Аввало, камина амалга оширган “Муқанна” талқинининг илмийликдан мутлақо йироқ деб топилгани. Жумладан, Н.Каримов фикрича бундай талқин X.Олимжонни “мустабид тузум билан муҳолифатда бўлган Чўлпон ва Фитратлар даврасига ҳам яқинлаштириш йўлидаги саъй-ҳаракат”, “тарихий-адабий муҳитдан узиб олиб ... бугунги қарашларимизга яқинлаштиришга уриниш”². Н.Каримов талқинда зўрма-зўракилик борлигини силлиқлаброқ айтса, F.Мўминов дангалини айтади қўяди: “Сиз “шўроларга бутун вужуди билан қарши бўлган” ясама қаҳрамон яратмоқчи бўласиз”³. Яна F.Мўминов айтадики, айрим эпизодлар талқини асосида чиқарган хуносаларим “ғирт тухматдан бошқа нарса эмас”; миямга “халқнинг миллий мустақиллигини бу адиллар (яъни шўро даврининг йирик ёзувчилари – Д.Қ.) орзу қилмаган бўлиши мумкин эмас” деган тасаввурни жойлаб олганман-да, шуни исботлаш учун “улар ижодини шағам ёқиб

¹ Куронов Д. Ҳамид Олимжонни биламизми? // Шарқ юлдузи.- 2002.- №2

² Н.Каримов. Ҳамид Олимжонни биласизми? / Ўзбекистон адабиёти ва санъати.- 2003.- 18 апрель

³ F.Мўминов. Изланишларимдан катралар.- Т., 2006.- Б.163-174

титкилаб”, “сохта ва беасос” тахминларни олға сураман. Кўриб турганингиздек, қай йўсун ифодаланганидан қатъи назар, иккала олим ҳам каминанинг талқинини “сохталаштириш” деб билади. Устозларни бу хил қарашда событ этган таянч нуқтаси ҳам битта. Хусусан, Н.Каримов фикрига кўра: “Ойбек,Faafur Fулом, Абдулла Қаҳҳор сингари забардаст адиларимизнинг совет даврида яратган асарларида мавжуд тузумда рўй берган даҳшатларни фош қилувчи ёки уларга шама қилувчи сатрлар бўлмаганидек, Ҳамид Олимжондан ҳам бундай, Сиз айтмоқчи, жасоратни топишга интилиш ўша тузумни ҳам, шу тузум даврида майдонга келган асарларни ҳам тушунмаслиқдан бошқа нарса эмас”. Худди шунга ўхшаш F.Мўминов ҳам: “бу адилар ўз юрти ва миллатининг содиқ фуқаролари сифатида шўролар сиёсатига, унинг ягона партияси шиорларига ва бу йўлда, айрим баландпарвоз оҳанглар, сохта кўтаринкилик ва таъзим маъносидаги сатрларни ҳисобга олмаганда, асосан астойдил, чин дилдан садоқат билан ижод қилганлар”, – деб билади. Кўряпмизки, иккала олим ҳам зикр этилган адилар ижоди давр сиёсати ва мафкурасига жўровоз, ўзгача оҳанглар уларга буткул ёт деб ҳисоблайди. Каминанинг тасавvuрида эса улар чинакам истеъодод эгалари, демакки, атрофида юз бераётган воқеа-ҳодисалар моҳиятини англаш ва шундан келиб чиқиб ШАҲС сифатида ўз маънавий мавқеини эгаллашга қодир кишилардир. Яъни “Муқанна”ни тушунишимизда кузатилувчи фарқлар айни шу нуқтадан ўсиб чиқкан.

Кўриб турганингиздек, баҳс анчагина кескин тус олган, асосийси, ҳар икки томон ҳам ўз фикрида событ қолди¹. Адабий танқид баҳсга, юмшоқ қилиб айтганда, эҳтиёткорлик билан, гўё “жанжал”га аралашибига истиҳола қилган каби муносабатда бўлиб, назаримда, унинг асосидаги масала моҳиятига эмас, юзада қалқиб турган томонларига эътибор берди. Жумладан, истиқлол даври адабий танқидчилигини маҳсус тадқиқ этган Қ.Қаҳрамонов томонларнинг асосий концепциясини мухтасар баён қилгач, баҳсада “асосий эътибор бадиий асарда ифодаланаётган ғояни очишга қаратил”ганини қайд этиш билан чекланади². 2012 йилда чоп қилинган “Ўзбек адабий танқиди тарихи” дарслигида баҳсга ҳакам сифатида

¹ Карапнг: Курунов Д. Мен не дейдирман / Ўзбекистон адабиёти ва санъати.- 2003.- 16 июль

² Қаҳрамонов Қ. Адабий танқид: янгиланиш жараёнлари. – Т.,2009.- Б.116-117

эмас, балки “янги босқич танқидчилик шаклланиши тадрижий такомилидаги методологик тамойилларнинг изланиши” деб қарапгани айтилган. Модомики, баҳсга анча муфассал тўхталинган экан, аниқ бир мавқеда турилса, фикримча, таълимий мақсадга мувофиқроқ бўларди. Афсуски, баҳс юзасидан чиқарилган хулоса мавхумроқ бўлиб қолган. Негаки, дарслидаги, бир томондан, танқидчиликда “шўро давридаги атоқли адиблар” асарлари “таг замира газимдан яширилган истиқлол ғоялари ёки ҳеч бўлмагандан, шўро истибодини фош этиш мақсади” борлигини кўрсатиш тамойили кузатилгани ва “бундай асарлар мавжуд бўлгани шубҳасиз” экани таъкидланади. Иккинчи томондан, “бундай мақсад ҳар бир асарга муносабатда зўрма-зўракилик ва сунъийлик билан амалга оширилмаслиги лозим” экани уқтирилади. Яна билмадим-у, каминага бу ўринда “сеники ҳам тўғри, буничи ҳам тўғри” дейилаётгандек туюлди. Тўғри, бунинг давомида айтилган фикрлар муносабатга бирмунча аниқлик киритади: “Ният нечоғлик яхши бўлмасин, бундай сунъийлик бадиий асарни нотўғри баҳолашга олиб келиши мумкин. Танқид ва адабиётшуносликдаги гипотетик усул ўзининг аниқ ва изчил таянч нұқталарига эга бўлганда гина оқлади, акс ҳолда, асар баҳсида юзаки тахминчиликни олиб келадики, у наинки бундай фикрни илгари сураётган мунаққид, балки, умуман танқидчиликка ҳурматни сусайтиришга олиб келиши мумкин”¹. Кўрамизки, биз қўллаган талқин йўсими “гипотетик” (фаразий) деб тушунилиб, унинг танқид этикасига путур етказиш эҳтимолидан огоҳ қилинмоқда. Энг муҳими, бундай тўхтамга орадан ўн йилдан зиёд ўтгач – баҳс руҳи сўнган, яъни энди субъективлик эҳтимоли кесилиб, объектив илмий хулоса чиқариш имкони туғилган вақтда келинмоқда. Айни ҳол яна мавзуга қайтиш, каминанинг талқинлари гипотетик (баҳс контекстида ушбу истилоҳ “хаёлий” маъносини касб этаётгандек туюлмайдими сизга?) эмаслигини, бинобарин, унинг “таянч нұқталари”ни яна бир карра кўрсатиб ўтиш заруратини туғдириди.

I. Аввало шуки, “Муқанна” талқини заминида тарихий-биографик асос ётади. Фақат, бунда, биринчидан, тарихий-биографик материалга Ҳамид Олимжоннинг ижод онларидаги маънавий-рухий ҳолатини тасаввур қилишга ёрдам берувчи

¹ Назаров Б. ва бошк. Ўзбек адабий танқиди тарихи.- Т., 2012.- Б.228-229:

восита сифатидагина қаралди; иккинчидан, восита экани ва кўпчиликка маълум бўлгани боис уни умумлаштирилган ҳолда эслатиш билан чекланилди. Масалан, мақолада дастлаб шоирга таъриф тарзида мана бу биографик маълумот берилган: “*мурғак ёшиданоқ шўро таъсирида шаклланган, ўзига сингдиргани ёлғон ҳақиқатларга чин ҳақиқат дея юракдан ишонган ва ўсмирларга хос ўжар фидойилик билан даврнинг зиддиятли ғоявий курашлар майдонига кирган фаол шахс...*”¹

Ушбу маълумот Ҳ.Олимжон ижодида тенденциозлик бўлиши муқаррар ва табиийлигини асослаш учун эслатилган эди. Ҳа, эслатилган эди. Негаки, мақолада қўйилган масала бошқа, уни ёритиш учун бундан ортиғи кўплик қиласи, асосий мақсаддан чалғитиш эҳтимоли бор. Иккинчидан, бу таъриф ўкувчи илгари ўқиган-билган маълумотларни хотирада тиклаши лозим эди. Модомики, бундай бўлмаётган экан, бу ишни биргаликда амалга оширишга зарурат бор, шундай қиласиз:

1) Ҳ.Олимжон 1909 йилда туғилган, яъни олам тартиботини ағдар-тўнтар қилган инқилоб юз берганида у атиги саккиз ёшда эди; тўққиз ёшидан шўро мактабида, ўн тўрт ёшидан пед билим юртида таҳсил олди... Яъни шоир оила шароитидан тўппа-тўғри шўро ғоялари ҳукмрон мухитга кўчганки, “*мурғак ёшидан шўро таъсирида шаклланган*” деганимда шу фактларга таянман;

2) мухит таъсирида шоир “*ўзига сингдиргани ёлғон ҳақиқатларга чин ҳақиқат дея юракдан ишонган*”, бундай дейишимизга педбилим юртида ўқиб юрган кезлари ёзган қатор шеърлари етарли асос беради. У ўзини “*йўқсил эл қўриқчиси*” (“Комсомоллар”) ҳис қиласи, инқилоб туфайли “Менга ҳеч эрк бермаган золим бойлар йўқ бўл”ди (“Шодлик кун”), “Хўрликлардан кутулдик, Эзувчини йўқотдик” (“Биз ким?”) деб билади; ёшлар қатори ўзини “ленинизм қиличи” санайди, “Ленин йўли энг қимматли йўллардандир бизларга, Биз ёдлаймиз унинг йўлин чин юракла ҳар ерда” (“Хозирланамиз”) дея эътироф этади. Ҳ.Олимжон бу шеърларини 16-17 ёшларида ёзган, бас, бизга ёкиш ё ёқмаслигидан қатъи назар, уларнинг чин дилдан айтилганига шубҳа қилиш ўринисиз;

3) таърифдаги учинчи нуқта – “*ўсмирларга хос ўжар фи-*

¹ Бундан кейин “Ҳамид Олимжонни биламиزم” мақоласидан олинган парчалар курсивда ажратилади.

доийлик билан даврнинг зиддиятли ғоявий курашлар майдонига кирган **фаол шахс...**” Қалбини инқилобий кураш романтикаси чулғаган ўсмир – бўлғуси шоирнинг ғайрати ичига сигмайди, майдонга талпинади. Эслант: ўн бешида комсомолга кирди, ўн олтисида билим юртида чиқадиган деворий газета ва ойлик журнал редактори; ўн еттисида инқилобий ёзувчилар шўъба мажлиси иштирокчиси, “Зарафшон” газетаси бўлим бошлиғи; ўн саккизида Ўзбек~~кситон~~ зиёлилари иккинчи қурултойида вакил; ўн тўққизида ўзбек янги алифбоси марказий қўмитаси котиби; йигирма ёшида бутуниттифоқ дехқон ёзувчилари съездига делегат... Буларнинг бари шоирнинг ўқувчилик ва талабалик йилларига тўғри келишини ҳисобга олинг-да, ижтимоий фаоллик даражаси нечоғли юқори бўлганини тасаввур қилинг! Бундай фаолликка қувват бериб турган манба, шубҳасиз, ленинизм ғояларига бешак ишонч эди. Энг муҳим жиҳати, ўсмир Ҳ.Олимжон ғояни формал қабул қилган, яъни унинг онгини “соф ғоя” – ҳали ҳаётий тажриба билан тобланмаган абстракт ғоя бор, холос. Айни ҳол ғояни мутлақлаштириш, уни бирдан-бир тўғри ғоя сифатида тушунишга олиб келади. Ҳ.Олимжон шундай фаоллик, шу рух билан шеъриятга кириб келди, илк ижодида “кураш мотиви” етакчилик қилгани шундан, зеро, улар ижтимоий фаолиятнинг давоми ўлароқ яратилгандир.

II. Инсонда ҳаётий тажриба ортиши баробари дунёқараши ҳам ўзгариб, конкретлашиб боради. Айниқса, Ҳ.О.Лимжон каби истеъодли, демак, ўткир нигоҳ ва теран фикр эгасида ўзи топинган ғоя билан реаллик муносабатини идрок этиш, ҳаққонийлик даражасини “синовдан ўтказиш” эҳтиёжининг туғилиши муқаррардир. Инсон психологияси ва аклий ривожланиши билан боғлиқ мазкур жиҳатлар ҳамда Ҳ.Олимжон ҳаёти ва ижодидаги ҳолатлардан келиб чиқиб мақолада: “... маълум вақт ҳаёт қозонида қайнаб, замонасини ва ўзини четдан мушоҳада қилиши имконига эга бўлгач, амин бўлаётирки, «эртак бошқа, ҳаёт бошқа» экан. Бу атрофида содир бўлаётган ижтимоий ҳодисалар большевикларнинг ваъдаю даъволарига мувофиқ келмаётганини, тил бошқаю дил бошқалигини кўрган, англаган одам хуласаси, ҳукмидир”, - дейилган. Шундай ўйлашга асос берувчи нуқталарни кўриб ўтамиш:

1) мукаммал асарлар тўпламининг биринчи жилди мундарижасидан шоир уч йил давомида (1932-1934) атиги

тўрттагина шеър ёзганини кўриш мумкин. Шу уч йилда яна 9 та мақола, 1 та тақриз, 1 та очерк ва 1 та достон ёзган, 2 та асарни таржима қилган. Балки, бу тарз статистика эриш туюлар, лекин дикқатингизни ижодий маҳсулотнинг жанр томонига қартиш учун шундай қилдим. Қаранг, ҳиссий муносабатни ифодаловчи лирика салмоғи ўта камайган, аксинча, мантиқ ва тафаккурга асосланувчи жанрлар салмоғи тўла устуворлик касб этган. Фикримизча, мазкур ҳол Ҳ.Олимжонда тафакур қилишга мойиллик кучайганидан дарак берадики, бунинг замирида англаш эҳтиёжи ётади. Айни эҳтиёж мушоҳада объектини мудом кенгайтириб, охир-оқибат тафакур қувватини жамиятда юз бераётган ҳодисалар моҳиятини англашга йўналтириши муқаррардир;

2) биринчи жилд мундарижаси таҳлилида давом қилсак, шоирнинг 1935-1938 йиллар лирик ижоди, асосан, интим, пейзаж ва фалсафий лирика намуналаридан иборат эканлигини кўрамиз. Зеро, айни шу йилларда ёзилган шеърлар унга “баҳт ва шодлик куйчиси” номини олиб берган. Ўтган асрнинг 80-йиллари охири 90-йиллари бошларида – мудҳиш 30-йиллар ҳақиқати кенг кўламда ошкор бўлган бир шароитда, шоир шунчалар даҳшатли йилларда “баҳт ва шодлик”ни куйлаганини тушунолмай, қабул қилолмай қолдик. Ўша йиллари Чўлпон хотирасига ўтказилган йиғинда бир улуғ шоиримиз ўз сўзида ўғрилар тўдаси билан шериқлик қилган **карнайчилар** гуруҳи ҳақидаги ривоятни келтирганди: эмишки, улар карнай-сурнай чалиб, ўйин-кулги билан одамларни чалғитиб туришган, бу вақтда эса ўғрилар бехавотир томтешарлик билан машғул экан. Нотиқ Ҳ.Олимжон мансуб авлодни шу карнайчиларга менгзаганди: улар шўрони мадҳ этиб одамларни чалғитиб турган, НКВД эса миллатимиз гулларини битта-битта териб кетган. Начора, давр кайфияти шу эдида, аксариятимиз шундай фикрда событ эдик. Шунчаларки, “ахир, бир умрлик муҳаббатини учратиши, уйланиши, оталик баҳтини туйиши – хуллас, ҳаётининг энг баҳтли дамлари шу йилларга тўғри келган ва кўнглидагини самимий ифодалаган бўлса – шоирда нима айб?” деган андиша ҳаёлга яқин йўлмаган. Фикримча, Ҳ.Олимжоннинг “карнайчилар” сирасида кўрилиши онгимиздаги хронологик силжиш туфайли, яъни у қатағон авжига минган 37-йилда ҳам айнан илк ижодида кузатилган руҳ-кайфиятда бўлган дея янглиш ўйлаймиз. Ҳолбуки, бу вақтда шоир “кураш романтикаси”дан чекиниб,

оддий ва сокин инсоний баҳтидан масрур, шу боис ижодида муҳаббат ва табиат гўзаллигини тараннум этиш, инсоннинг инжа туйғуларини ифодалаш устувор бўлган эди. Айни ҳол фикримиз мантиғига зиддай. Зеро, унга кўра шоир бу босқичда англаш эҳтиёжини қондириш йўлидан бориши керак, ҳақиқатда эса, аксинча, ижодида яна лирика салмоқдор бўлди. Ушбу эҳтиёжнинг заруратга айланмагани, бизнингча, шоирнинг “ўз олами”да яшагани билан изоҳланиши мумкин. Реалликка нисбатан мухторият мақомидаги бу оламда **Ҳ.О-лимжон** баҳтли эди, шу оламдан туриб реаллиқда ҳам ўзи каби баҳтли одамларни кўрди – баҳт ва шодликни куйлади;

3) эҳтиёжнинг қондирилмагани унинг йўқ бўлгани эмас, албатта, у бор, қондирилиш вақти кечиктирилди, холос. Юқорида айтилганлардан шоирнинг реалликка қайтгиси келмай қолгани яққол кўринади. Негаки, “ўз оламида” хатарлардан паноҳ топадигандек ҳис қилади ўзини. Зеро, маълумки, қатағон шамоли Ҳ.Олимжонни четлаб ўтмаган, кўпчилик қатори у ҳам муттасил таҳлиқида яшаган, Н.Каримов айтмоқчи, “1937 йилдан аранг омон қолган”¹. Машъум 1937 йил арафасида – 1936 йил 29 декабрда ёзилган шеърида ўлимга қаратади: “Сени қандай кутар эканман, Учрашармиз қайси бир ерда?” дегани шундан. Йигирма етти ёшли навқироннинг мудом ўлим хаёли билан яшashi, “Ўйлаганда сени (ўлимни – Д.Қ.) доимо, Юрагим орқага тортади Ва босади муздай совуқ тер, Сесканаман, ғамим ортади” дея эътироф этишидан унинг маънавий-руҳий жиҳатдан нечоғли оғир шароитда эканини тасаввур қилиш мумкин. Шу боис ҳам шоир “ўз олами”га қочади, баҳтига бурканиб яширинмоқчи бўлади гўё. Бироқ шунда ҳам бехавотир бўлолмайди, чунки елкасида машъум шарпа нафасини ҳис қилиб туради. Хавотирнинг зўридан душман эмаслигини эслатмоқча, душманлардан фарқини **таъкидлаб**, ўзини улардан ажратмоқча шошади. Хусусан, 1937 йилда ёзилган “Ўлка” шеърида “Билсингларким, йўлдошим бўлмас Кўзда ёши билан кулгандар” дея хитоб этади. Шеърнинг ўртасидаги ушбу мисраларни ургулаганимиздан сўнг бошланишидаги мана бу сатрлар ҳам, бизнингча, фикримизни қувватлашга хизмат қиласи:

¹ Н.Каримов. Ҳамид Олимжонни биласизми? / Ўзбекистон адабиёти ва санъати.- 2003.- 18 апрель

*Мен дунёга келган кунданоқ,
Ватаним деб сени уйғондим.
Одам бахти биргина сенда
Бўлурига мукаммал қондим.*

Фикримизча, аввал “кўзда ёши билан кулганлар”нинг душманлар, яъни “совет воқелигини қабул қилолмаганлар” эканини, сўнг шоир ўзини уларга қарши қўйганини эътиборга олсак, бу ерда гап “социалистик Ватан” ҳақида бораётганига шубҳа қолмайди. Шундай экан, “одам бахти биргина сенда” сатрини “одам Ватандагина бахтли бўлади” деб эмас, “инсон социалистик Ватандагина бахтли бўлади” маъносида тушунган тўғрироқ бўлади. Негаки, шоир худди шундай эканига “мукаммал қондим” дейиш билан ўзини “кўзда ёши билан кулганлар”га зид қўйиб, муҳотибига “ўзиники”лардан эканини кўрсатмоқда. Охирги банддаги “қайга десанг қайтмай кетурман” мисраси ҳам содиқлик қасамидек жаранглайди. Дарвоqe, шеър Ватанга мурожаат шаклида бўлса-да, асл муҳотиб бу эмас. Асл муҳотиб мавҳум (“Билсинларким...”) қолгандек, лекин ҳақиқатда садоқат изҳори айнан унга – инсонлар тақдирини ҳал қилиш ваколатини ўзига олган, қатағон машинасини юргизган кўринмас ёвуз кучга қаратилгандир. Мундай қараганда, Ҳ.Олимжон сиёсий жиҳатдан “айбсиз” бўлгач, хотиржам юраверса бўладигандек. Жумладан, ўша мудҳиш йилда ёзилган бир шеърида “Йўлдан озганиларга ҳеч бир бўлмадим мен қайғудош ... Шул сабабдинким Ватанда бўлмадим илҳоми хор” деганидан ўзини ҳақиқатан ҳам “айбсиз” билиши яққол кўринади. Лекин у қатағон машинаси қандай ишлаши, ёвуз куч ҳўлу қуруқни баравар ёндираверишини ҳам билади-да. Шу боис “илҳоми хор” дея қатағон қилинган ижодкорларни назарда тутгани ҳолда, уларга илк ижодидаги каби кескин муносабатда эмас, атиги ўзининг улардан эмаслигини айтмоқчи, холос. Негаки, энди у ёвуз куч қаршисида ўзининг нечоғли оқизлигини, ўша “илҳоми хор”лар каби лаҳзада қурбонга айланиши ҳеч гап эмаслигини, яъни моҳиятан уларга қисматдош бўлиб қолганини теран ҳис этиб турибди. Тўғри, Ҳ.Олимжон уларни “ғоявий душман”и деб билган, бироқ энди, қатағон нафасини ўз танасида синаб кўргач, ғояга қарши ғоя билан курашиш бошқа, инсонни жисман маҳв этиш бошқалиги, кейингиси инсонийликка зид эканлигига

имон келтирган. Айни ҳол юз бераётган ижтимоий ҳодисалар моҳиятини англаш ва уларга нисбатан ўзининг аниқ маънавий мавқеини белгилаш эҳтиёжини кучайтириб, унинг қондирилишини зарурат мақомига кўтаради.

III. “Муқанна” талқинида нафақат юқорида баён қилинган тарихий-биографик асослар, балки ижод психологияси хусусиятларига ҳам таянилган. Уларга ҳам тартиби билан батафсил тўхташга ҳаракат қиласиз.

1) мақолада “истеъдоднинг чинакам санъат асарига дўниши учун ижодкор ҳаётни гўё «четдан» эстетик мушоҳада (эстетическое созерцание) қила олиши, бошқача айтсан, руҳан «узлат» ҳолатида бўлиши даркор”, - дейилган. Қулайлиги учун бўлса керак, мутахассислар бу ҳолатни ўйинга қиёслаб тушунтиришади. Дейлик, футболчи матч вақти ўйинни мушоҳада эта олмайди – у ўйнайди, мушоҳада қилиш учун четдан кузатиш керак (шу боис ҳам ишқибозларнинг ўзларини футболни ўйинчилардан кўра яхшироқ биладигандек тутишлари жудай-ла асоссиз эмас). Демак, масалан, агар у танаффус пайтида ё ўйин тугаши билан интервью берса, айтганлари, бир томондан, ўйин ҳақида атиги конкрет бир амплуа нуқтаи назаридан чиқарилган фикр (яъни, обьектни жуда тор қамраган); иккинчи томондан, ўйин чоғидаги фикр ва эмоцияларнинг бевосита давоми (яъни, субъектив ва тенденциоз). Ҳолбуки, ўша футболчи маълум ваqt ўтиб матчни видеоёзувда томоша қилса, ўйинни ва ўйиндаги ўзини бир бутунликда кўради: энди унда обьектни тўла қамраш ва обьектив мушоҳада қилиш имкони бўлади.

Мақолада “Ҳ.Олимжонда бундай имконият кам бўлган”и, “Муқанна”га қадар унинг кўпроқ “ўзи ичида қайнаб ётгани, ҳаёт ҳақида ундан узилолмаган ҳолда ёзган”и таъкидланган. Ушбу хуносага келишимизнинг асоси шоирнинг илк ижодини (1925-31) социализм ғоясини байроқ қилган ўсмир ижтимоий фаоллигининг давоми, ижодий фаолиятидаги биз ажратган учинчи босқични (1935-38) баҳт қучогидаги инсон кўнгил изҳорлари, ўртада кузатилган (1932-34) тафаккур қилишга мойилликни эса кўпроқ ёш билан боғлиқ, яъни табиий ҳодиса деб билишимиздир. Айтиш керакки, биз “кам бўлган” деган ҳоллар шоир нигоҳи давр воқелиги ва шахсий ҳаётидан ўзга обьектга қаратилганда кузатилади, чунки нарса-ҳодиса эстетик обьектга айланиши учун субъектнинг ундан узилиши – четлашиши талаб этилади. Шундай ҳол-

ни, масалан, “Офелиянинг ўлими” шеърида кўриш мумкин. Шоир ўлмас трагедия воқелигидан ташқарида, айни чоқда, трагедия воқеалари шоирдан ташқарида, бас, персонажлар тақдири унинг учун автоматик тарзда эстетик мушоҳада объектига айланади. Шу боис у фожеа моҳиятини идрок қилишга интилади ва англаганларида ўз тақдирига уйқаш нуқтагарни кўради. Негаки, эстетик объект ижодкор Ҳолидан келиб чиқиб ва унга мувофиқ англаради, айни чоғда, ижодкор ўзини эстетик объект орқали теранроқ англаб боради. Мазкур фикрлар Ҳ.Олимжоннинг “Пушкин”, “Куйчининг хаёли”, борингки, тағин битта-иккита шеърига нисбатан муайян шарт билан айтилиши мумкин, холос. Таҳликали замонда “ўз олами”да паноҳ топган шоирдан бундан ортиғини кутиш инсофга хилоф. Сираси, ҳозир муҳими бу эмас, муҳими, мазкур муроҳазалардан Ҳ.Олимжоннинг юқорида айтганимиз англаш эҳтиёжини қондиришга интилгани ва ўз даври шароитида шунга қулай имкон берувчи объект топиш йўлида излангани кўринади. Бас, шоирда Муқанна ҳақида асар ёзиш нияти анча илгари туғилган (С.Азимов) экан, бунинг шу изланиш доирасида содир бўлгани эҳтимолдан йироқ эмас;

2) демак, гарчи ёзиш нияти илгари пайдо бўлса ҳам, “Муқанна” йиллаб ёзилмай турган. Нега? Эҳтимолдаги сабаблар сирасида қатағон йиллари камина талқин қилган тарзда тушунилиши мумкин бўлган асарнинг ёзилиши бошни қиличга тутиш билан баробар бўлганини ҳам кўрсатиш зарур. Шу жиҳатдан қарасак, уруш “Муқанна”нинг ёзилишига имкон яратди, дейиш ҳам мумкин, чунки уруш шароити уни “ижтимоий буюртма”га мос этди қўйди. Яъни уруш даврининг ижтимоий-маънавий эҳтиёжларига қаратилган қатлам муаллифнинг ўтмиш орқали замонаси ва ундаги ўзини бадиий идрок этишга қаратилган қатламни пардалади. Эътиборли томони, иккала қатламда ифода этилаётган мазмун ҳам чин дилдан, иккиси ҳам мустақил ва бир-бирига халал бермайди;

3) асарга танланган материал табиати шундайки, муаллиф “*тасвир предмети – ўтмишдан автоматик тарзда узилган, яъни, ўтмиш унинг учун биринчи галда эстетик мушоҳада объекти*”. Аввало, ўтмиш замона орқали идрок этилиши қонуният мақомидаги ҳол эканини таъкидламоқ керакки, буни муҳтасар изохлаб ўтамиз. Асарни ёзишга тайёргарлик жараёнида Ҳ.Олимжон қўзғолонга оид тарихий ман-

баларни ўрганган. Табиийки, бу манбаларда фактлар қайд этилган, холос, тарихий мавзудаги адабий асарда эса ўтмишни тўлақонли гавдалантириш, ўша фактларни жонлантириш тақозо этилади. Буни амалга ошириш учун эса унда биргина йўл бор – замонасидан андоза олиш. Зеро, у ўтмишда яшаб кўрмаган, ҳаёт ҳақидаги, инсон ва инсонлараро муносабатлар ҳақидаги тасаввурлари замонасида шаклланган. Айни шу тасаввурлар, умумлаштириб айтсак, ҳаётий тажрибани проекция қилиб ўтмиш жонлантирилади – шу тариқа ўтмиш замона орқали идрок этила бошланади. Модомики, тарихий фактлар асосида ўтмишдаги ҳаётий ҳолатлар, тўқнашувлар, турфа тақдирларни ижодкор замонасидан андоза олган ҳолда қайта яратаетган экан, айни чоғда у ўтмиш орқали замонасини ҳам идрок этаётган бўлади. Бошқача айтсак, замона билан аналогия асосида бадиий акс эттирилган ўтмиш аналогия асосида замона моҳиятини англашга ёрдам беради. Шуларни эътиборга олган ҳолда мақолада : “*фактлар шахс орқали, яъни, унинг кайфияти, ҳолати, қараашларига боғлиқ ва уларга мос ҳолда жонланади; иккинчи томондан, жонланган тарих шахснинг ҳолати, кайфияти, қараашларига зарур таҳрирлар киритади. Демак, шахснинг тарихга «мурожаат»и моҳияттан иккисиёклами жараён – мулоқот экан. Шахс онгига жонланган фактлар фаоллашгач, унинг ўзини руҳий фаолликка – ўхшашилик асосида (метафорик тарзда) замонасини мушоҳада қилишга ундейди, ўз даврини теранроқ англашига асос бўлади*”, – дейилган. Агарки мазкур психологик жиҳатлар тарихни бадиий идрок этиш жараёнига хос экан, “Муқанна”даги айрим персонажлар, кўриниш ва драматик ҳолатларни асар яратилган давр ё муаллиф шахсияти билан боғлаб талқин қилиш асло бугунги кунга мослаштириш ва ё сохталаштириш бўлмайди.

“Ҳамид Олимжонни биламизми?” номли мақолам чоп қилинганидан бери ҳам мана ўн икки йилдан ошди. (Дарвоҷе, шоир ижоди билан озми-кўп шуғулланганки одамга мақола номи эриш туюлган, балки, бироз малол келган бўлса ҳам мумкин. Рости, журнални кўлга олибоқ кўнгилда шунинг андишасини туйганман. Негаки, бу номни журналдаги дўстлар кўйганлар, биласиз, матбуот шунга ўхшаш “сенсация”ли номларни хушлайди, камина уни “Тарих сабоқлари” деб номла-

гандим.). Ўтган вақт давомида “Муқанна” талқини хусусида эшитганим фикр-қарашлар турли-туман, ҳатто бир-бирига мутлақо зид: “Кашфиёт-ку!” дея алқаганлар ҳам, “Сохта-лаштириш-ку!” дея ёзғирганлар ҳам бўлди. Эшитганда икка-ла томон ҳам оғмаслик – ҳовлиқиб ҳам кетмаслик, руҳни ҳам чўқтирмаслик ҳаракатида бўлдим. Энди, баҳс руҳидан фориғ бўлиб, масалага совуқон нигоҳ билан қарапкан, камина амалга оширган талқин тарихий-биографик ва ижодий-руҳий асосларга эга деган фикримда қатъийлашаман. Шундай экан, “Муқанна”га ёндашувимизни “гипотетик” деб ҳисоблаш ҳам у қадар тўғри эмас, зеро, бизнинг талқинни инкор қилув-чилар ҳам айни шу асосларга таянмоқда.

2015 йил

ШЕЪРЛАРИДА ТУПРОҚ ИСИ БОР

Йигирма йиллар нарида, аспирантлар уйидаги адабий сұхбат асноси гап Мұхаммад Юсуфга тақалганида, сұхбат дошлардан бири уни “қўшиқчи шоир” дея менсимайроқ тилга олди, шеърларини ҳаваскор машқ даражасида деб баҳолади. У пайтлар шеъриятимизнинг ифода бобидаги янгича изланишларига, хусусан, модернистик оқимларга маҳлиё бўлиб юрган вақтларим, бунга эътиroz қилмадим, рости, қай бир даражада ўзим ҳам шу фикрга мойил эдим. Энди ўйласам, ўшанда ўзимни “соғ санъат”ни тушуннатурган хослар қаторига қўйиб кибрға берилган, назарга илмай турганим “жўн” шеърлар муаллифининг шуҳрати муттасил ортиб бораётганига ғайирлик қилгандекман. Ҳолбуки, карвон ўтавераркан... Йўқса, адабиётни ҳеч ким бизча тушунмаслигига қатъий инонган даврамизнинг нописанд муносабатию баҳосига қарамай, Мұхаммад Юсуф шуҳрати муттасил ортиб борамиди?! Кўпчилигимиз адабиёт ҳақида ҳатто ўйлашга ҳам фурсат тополмай, энди китоб ўқийдирган одам қолмаганига деярли инониб қолган вақтлар тўпламлари минг-минглаб нусхаларда чоп қилинармиди?! Ахир, шуларнинг ўзиёқ халқнинг шоирига беқиёс меҳр-муҳаббатидан дарак эмасми?! Мұхаммад Юсуф феномени ҳикматини англашга уринаркан, беихтиёр яна ортга ўгирилавераман, яқин ўтмишдаги ўзим-

ни, ўй-қараашларимни тафтиш қилмоқча бериламан... Чорак асрлар муқаддам, иш билан пойтахтга бориб қолганда адабий гурунглар пойгагида вужудим қулоқ бўлиб ўтириш мұяссар бўла бошлаган пайтлар, биринчи марта “ер шоири” деган таърифни эшитганман. Билсам, ҳали расмий доира-лар домига тушмаган, кўнгилларида эрк соғинчи сўнмаган ёш ижодкорлар даврасида бу бир баҳо – “теран томирларидан узилмаган” дегани... “халқдан чиққанман” дея бирушта кўксига муштлашига қарамай халқдан “чиқиб қолган” шоирлардан эмас, дегани экан. Менга қолса, халқнинг шоирга меҳрини тоблаб турган бosh омил шу – то охирги нафаси қадар “ер шоири” бўлиб қолгани деган бўлардим. Ўзига ғоят қисқа вақт берилганини сезган каби, у ижодда янги йўллар қидириб юрмади – эски йўлга тушди-да, бир дарвеш мисоли аввал халқининг дард-ҳасратини, сўнг кулиб боққан толеини хиргойи қилганича охир манзил томон оҳиста бораверди...

Хуллас, Мұхаммад Юсуф “ер шоири” деган баҳога ҳар жиҳатдан лойик, десак, айни ҳақиқат айтилган бўладики, гўё эътиrozга ўрин йўқдек. Шунга қарамай, юбилей баҳона шундай ўйлашга асос берувчи омилларни яна бир сидра кўриб ўтиш бизни фикримизда событ, бошқа бировларни ҳамфикр этиши мумкинлиги жиҳатидан мақсадга мувофиқ кўринди.

Мазкур омиллар ичидаги ўрининг ҳеч иккилан-масдан шоирнинг ўз Ватани, халқига муҳабатини қўйиш лозим бўлади. Негаки, айнан шу ҳис, аникрофи, ҳар бир сатри қатига дегудек сингдирилган рух Мұхаммад Юсуф шеърия-тининг поэтик ўзига хослигини таъминлаган белгиловчи хусусиятдир. Мұхими, шоирдаги бу ҳиснинг ўзи бўлакча, яна ҳам тўғрироғи, унга доялик қилган Ватан, халқ ўзгача:

*Тупроқ юртим менинг,
Тўпори юртим.
Кўзимга тўтиё губори юртим.*

Шоирнинг илк ижодига оид ушбу сатрларда ўша пайтлари жамиятда етилиб келаётган ижтимоий кайфият зухур этади. Бу кайфият эса, дейлик, Эркин Воҳидовнинг машҳур “Ўзбегим” қасидаси ёхуд Абдулла Ориповнинг “Ўзбекистон” шеъридаги кайфиятдан фарқли, ҳатто, айтиш мумкинки, уларга

зид (албатта, бу ўринда диалектик маънодаги, яъни бутунни ташкил қилувчи зиддият назарда тутилмоқда). Зидлик шундаки, аввалги иккала шеърнинг лирик қаҳрамонлари улуғвор бир хилқат қаршисида (нуқтаи назар пастдан юқорига қаратилган) турса, кейингисида лирик қаҳрамон Ватанига мушфик нигоҳ ташлайди (нуқтаи назар юқоридан пастга қаратилган). Сабаби, аввалги икки шеърда миллий ғурурнинг қаддини ростлаш зарурати англанган давр ижтимоий кайфияти акс этган, иккинчисида – Ватан тақдирни учун масъуллик теран ҳис этила бошланган давр кайфияти. Айтмоқчимизки, аввалги икки шеър улуғ Ойбекнинг “Бир ўлқаки...” хитоби билан бошланувчи анъана йўлида – уларда Ватанинг ғуруримизга озиқ берувчи нуқталари ургуланади; кейинги шеър “Бузилган ўлқага” анъанасида: Чўлпоннинг “кел кўзингнинг ёшларини сўриб олай” хитобида шафқат тўлиб тошгани каби, Мұхаммад Юсуфнинг “тупроқ юртим менинг” сатрида ҳам шу ҳис устувордир. Албатта, “тупроқ”ни фақат “хокисорлик” маъносидагина тушуниш тўғри бўлмайди. Негаки, шеърнинг давомидаги “энг баланд тоғлардан юқори юртим” каби сатрлар “тупроқ” замиридаги “топталган” маъносига зидланмоқда. Демак, илк мисрадаги “тупроқ” сўзи, бир томондан, шоирнинг хокисор юртига мушфиқ муносабатини, иккинчи ёқдан, уни топтаганларга қарши исёнини ифодалайди экан... Сўзнинг маъно қирралари ҳақида шу айтилганлар билан кифояланса ҳам бўладигандек-у, лекин кўнгил кўнмайди, недир қониқмаслик қолади. Сабаби шоирнинг қуйидаги каби сатрларни битгани:

Шоир шундай кўпки, уларга ер тор,
Ҳаммаси машхур ва ҳаммаси номдор,
Улуғвор, уларга етмоқ кўп душвор,
Аммо улар ойга босиб юзини
Турганда самонинг бағрига илк бор
Биз олиб борамиз тупроқ исини.

Аввало, келтирилган парчада шоирнинг ижодий кредоси акс этганини айтмоқ керак. Ижодий аъмолини белгилаш учун у “юзини ойга босиб турган” шоирларга ўзини қарши қўйиб, улардан фарқланиши, фарқи “само бағрига илк бор тупроқ исини олиб чиқиши”да эканини таъкидлайди. Яъни, айтиш мумкинки, ярим асрлар кейинги воқеликда Мұхаммад Юсуф 20-йилларда урф бўлган “ер шоири” – “кўк шоири”

тарзидаги айирмага келади. Бироқ, ўз даврида Чўлпоннинг “кўк шоири” деб маломат қилинганини ёдга олсак, Мұҳаммад Юсуф бунга ўзгача маъно юклайтганига шубҳа қилмаса бўлади. Зеро, парчадаги “номдор”, “улуғвор”, “машхур” сўзлари зимнидаги кинояга қарасак, гап шеър аҳлига хос тахайюл парвози тўғрисида эмас, Ватанини “жаннатдан репортаж” қабилида таърифлаган, шундай ёзгани учун ҳар турли рағбат олган ва пировардида рағбат учунгина ёзишга одатланганлар ҳақида экани англашилади. Уларнинг талқинидаги Ватанда “инсон энг хур яшайди”, “инсон қадри ғоят юксак”... бунда дала йўқ, “мардлар майдони” бор, дўп-писига пахта тераётган болакайлар йўқ, “пахтазор полвонлари” бор... Уларнинг наздида шунчаки меҳнат йўқ, “пахта фронти” бор, бас, қурбонлар бўлиши ҳам табиий, кўз юмиб турса бўлади... Хуллас, шу тоифани “юзини ойга босиб турган”, яъни ҳаётдан узилган шоирлар деганида Мұҳаммад Юсуф айни ҳақиқатни айтган. Буларга зид ўлароқ, унинг ўзи ҳаётда бор одамларни, уларнинг асл дарду қувончларини, юртининг ҳақиқатда мавжуд манзараларини қаламга олди – Ватанини борича кўрмоқ ва бор ҳолича севмоқ ақидаси билан ижод қилди. Шу боис ҳам турғунликнинг биқик шароитида шоир мудом она қишлоғи – асл одамлару асл туйғуларни соғиниб, уларга талпиниб яшади:

*Хиёбонда лола,
Тувакда лола,
Фонтанлар қиқирлаб кулаверади.
Менинг киндик қонум тўкилган дала,
Сени эса кўргим келаверади.*

Балки, инжиқроқ ўқувчи эътиroz ҳам қилар: “хиёбону тувақда лола бўлса, фонтанлар қиқирлаб турса – нимаси ёмон? Ахир, бу ҳам гўзаллик, инсон қўли билан инсон учун яралган гўзаллик эмасми?” Мундай қараганда, эътиroz ўринлидек. Бироқ шундай деб ўйласак, шеърни сўзма-сўз ва тор (яъни “шаҳар – қишлоқ” антитетаси деб) тушунган бўлиб чиқамиз. Ҳолбуки, шеърдаги сўз луғатдаги сўзга teng эмас, у образ яратади. Сохталик одатий нормага айланиб, инсоний муносабатлар сийқалашиб бораётган мухитдаги шоир наздида тувақдаги гул ҳам, хиёбондаги гул ҳам, фаввора суви-нинг жилвасию жилдираши ҳам – бари нотабийлик тимсо-

ли. Улар сохталиқдан безган кўнгилнинг қишлоқ – шоир тасаввуридаги табиийлик ва самимият маконига талпинишини ифода этмоққа хизмат қиласди. Сохталик шунчалар одатийки, одам самимий туйғулари учун хижолат чекади:

*Тошкентда сиренлар гулласа, синглим,
Ва яна қандайдир акациялар.
Бедазорними-ей қўмсайди кўнглим,
Бирорга айтишига одам уялар...*

Аввало, бу ўринда “бедазор” шунчаки беда экилган пайкал эмас – шоирнинг она қишлоғи, яқинлари билан боғлиқ туйғу-кечинмалари, хотиралари умумлашмаси у. Шўро замонида “бедазор” билан боғлиқ ҳис-туйғуларини ошкора, яна “сирень” ва “акациялар”га зидлаб айтотгани учун ҳам истиқол йиллари “Римни алишмасман бедапоянгга” дегани шунчаки патетика эмас, самимий изҳорлигига бешак ишонамиз. Энди масаланинг иккинчи томонига қарайлик. Қизиқ-да, пойтахти азим бўлса, чор тарафдан келиб, шунда ўрнаб қолиш илинжида ҳар кўйга тушиб ётган истеъоддлар қанча... Қишлоғингга қиёсласанг комфортнинг олий даражаси, сенга яна нима кам, эй одам, шукур қилмайсанми?! Йўқ, бу асло ношукурлик эмас, соғинчнинг бошқа омилларини мушоҳада қилсак, бунга амин бўламиз. Шоир бежиз “сирень” ва “қандайдир акациялар” ҳакида гапирмаяпти, ахир. Улар мустамлака рамзлари эмасми?! Энди ўттиз йиллар нарини бир эсланг, шоирда “комфорт ким учун?” деган савол туғилиши табиий эдими ё йўқми?! Шу каби саволлар гирдобида қолган онлари “шаҳарга ўрганиб қолган” шоир қишлоғидаги ўзининг “йўлига илҳақ” боқиб, “пахта териб, ўт юлиб маъюс” умри ўтаётган қизни эслайди:

*Унинг сочи узундан-узун,
Унинг сочи товонга етган.
Лекин гулга ўхшамас юзи
Кўллари ҳам ёрилиб кетган.*

*Юрак ёнар уни ўйласам,
Буёғи ҳеч шеърга сиғмайди...*

Қаранг, ёр васф этилган банднинг дастлабки икки мисрасида поэтик анъана йўлидан борилган, учинчи мисрада ун-

дан кескин чекинилган: ёр юзи гулга ўхшамайди. Бу “ғўза яганараб завқи тошган қиз” ва ё “қўшиқ айтиб кетмон чопаётган атлас кўйлакли гўзал” қабилидаги сатрларга тўлиқ “мехнат поэзияси”га, “Шарқ аёлини чалдевордан озод қилиб” далага чиқарганларга таъна эмасми?! Кўп қатори ёр юзини гулга ўхшатиб, бечора қиз кўнглини хушлаб қўяқолса бўлмасмиди? Йўқ, бўлмас эди. Негаки, унинг узунсоҳ қизга муҳаббати аслида Ватанга муҳаббатининг ўзидир. Шоир дилидаги улкан муҳаббатни атрофидаги нарсаларга тақсим қилиб ўтирумайди, аксинча, ҳар бирини – жажжи жамбилбаргдан то беқиёс Ватани қадар – барини бирдек улкан муҳаббат билан севади қўяди. Яна ҳам тўғрироғи, унинг талқинидаги Ватан мавхумот эмас, балки ўзи учун қадри бениҳоя баланд инсонлар, жой ва нарсалардан таркиб топувчи мавжудликдир. Яъни бедазор ё жийда таги, қўллари ёрилиб кетган синглиси ё юзи гулга ўхшамайдиган қиз, таниш терак ва ё қора қумғон – **барининг тимсолида** шоирнинг Ватани, ҳалқига муҳаббати зуҳур қиласи. Шеърларидан бирида айтганидек, Муҳаммад Юсуф Ватанини “иддаолар қилмай севади”, унинг муҳаббати том маънода беғараз, бас, унинг турланмоғи имкондан ташқари, сохталиқ эса табиатига мутлақо ёт. Айни шу туйғу, назаримда, Муҳаммад Юсуф шеърларига миллионлаб диллар қулфини очиб берган олтин калитдир.

Муҳаммад Юсуф шеърларини элга манзур этган жиҳатлардан яна бири, фикримча, уларда таниш туйғуларнинг қаламга олингани ва, муҳими, бу туйғуларнинг содда бир йўсинда ифода этилганидир. Ҳолбуки, у шеъриятга кириб келган пайтлари модерн йўсинида – фикру туйғуни мураккаб услубда, рамзу ишоралар қатига жойлаб, туманли ифодалаш урфга киргандики, ҳатто мутахассислар ҳам “шеърингизни тушунтириб беринг” дея матбуотда чиқиш қилганлар. Ҳозир биз учун негалиги унча муҳим эмас, балки, дилидагилар ҳаммага бирдек тегишли деб билгандир, Муҳаммад Юсуф анъянавий йўлни танлади...

Дарвоқе, “таниш туйғулар” деганим ҳам изоҳталаб. Буюк Толстой ҳар қайси инсон қалбида мавжуд бўлиши мумкин бўлган барча қалблар имконият тарзида яшайди, деган. Тўғри гап. Лекин ҳар қандай туйғу ҳам кўнглимизга чиппа ёпишиб қолмаслиги ҳам бор гап-да. Бошқача айтсак, ўзга кўнгилдаги

айрим туйгуларни ҳеч зўриқишиз кўнгилдан кечира оламиз, айримларини қайта ҳис этишимиз эса қийин кечади: фурсатми, тажрибами, машқми... – нимадир етишмай туради. Чиппа ёпишиб қоладиган туйгулар муайян бир кўламда (умумбашарий, миллий, худудий ва б.) универсаллик касб этади. Дейлик,adolat туйғуси умумбашарий (adolat мезонларининг фарқли экани бошқа масала) характерга эга. Шу боисadolat мезони бузилган ҳолларда ҳар қандай шоир кўнгли, миллий ё худудий мансублигидан қатъи назар, исён қиласи. Муҳаммад Юсуфнинг илк ижодига мансуб “Кушлар ҳам йиғлар” номли бир воқеабанд шеър бор. Воқеа қишлоқларимиз ҳаёти учун ғоят одатий: ёзда, биласиз, “ҳаво-жаҳон яхшилигига иморатни битказай” деб ўзбекнинг жони ҳалак, aka-ука терак кесадилар. Терак қулайди, уяси бузилган она чумчук чириллаб қолади. Мана, шу дамда уканинг кўнглидан кечгани:

*Баланд бўлар уйимиз тоғдек,
Айвонида устун ул терак.
Биз яшаймиз кўнглимиз тоғдек,
Шунда қушлар йиғласа керак.*

Ўсмир нигоҳидаadolat сизлиқ содир этилди: чумчук ҳуқуқи поймол бўлди. Тўғри, катта бўлгач кўпчилик “ҳамма нарса инсон учун” ақидасига биноан бу каби ҳолларни меъёр деб **хисоб**-блай бошлайди. Бироқ биз учун бу ўринда бошқа нарса: ҳолат “мен” тилидан, шоирнинг болалик таассуроти сифатида тақдим этилгани мухим. Зоро, бу шоир ижодидан қизил ип бўлиб ўтувчи ўткирadolat туйғуси фитратидаги хислатнинг намоёнидир дейишга асос беради. Худди шу туйғу кейинроқ, масалан, “Ёкуб мерган” шеърида ҳам устуворлик қиласи. Ёкуб мерган – урушда оёғини қолдириб келган, қонунга мувофиқ унга “Запорожец” берилиши лозим. Бироқ таъмагир амалдор чолни сарсон қиласи, аризасини эътиборсиз қолдиради. Оқибат Ёкуб чолнинг ҳаммадан “кўнгли қолди, Машинасин бошқа олғир кимса олди”. Адолат топталгани етмагандек, андишасизлик шунчаларки, уруш ногиронининг ҳақига хиёнат қилган кимса “ялло қилиб юраверади”. Ана энди шоирнинг ҳолини кўринг:

*Уни кўрсам чол эсимга келаверар,
Ғилдирағи юрагимни эзваверар...
Ёкуб чолга беришмаган “Запорож”нинг.*

Эътибор беринг, Ёкуб чолга нисбатан қилинган адолатсизликни шоир шахсан ўзига нисбатан қилинган каби қабул қиласди. Бу табиий ҳам, негаки ҳар қандай адолатсизлик энг аввал ҳақиқий шоир юрагида акс садо беради. Шу боис ҳам Мұхаммад Юсуф учун адолатсизликнинг катта-кичиги йўқ – у бутун миллатга нисбатан (“Гдлян”) бўладими, гўдакка (“Турғунлик”) ё аёлга (“Тараққиёт”), элда машҳур инсон (“Шукур Бурхон”) ё оддий бир ҳамқишлоғига (“Мўминжон”) нисбатанми – бариси бирдек қалбини ўртайди. Шеърда шоир **кўнгилдан** кечирган чин туйғунинг акс этиши эса айни кечинма ўқувчи кўнглига кўчишини, демакки, кучли эстетик таъсирини таъмин этади.

Мұхаммад Юсуфнинг кўплаб шеърларида миллий турмуш тарзимиз, менталитетимиз доирасида универсал туйғу-кечинмалар қаламга олинганки, улар шоир ва шеърхон учун умумий, шу боис ҳам “тушуниш майдони” фоят кенгdir. Дейлик, миллий тарбия шундайки, фарзанд ота-она орзусини рўёбга чиқариш, хизматини қилиб дуосини олишни ният қилиб яшайди. Бироқ ҳаёт қонунлари шафқатсиз: жамиятда ўз ўрнингни топиб, энди-энди ниятларингни амалга ошириш имконига эга бўлганингда, афсус, уларнинг фоний дунёдаги сафарлари қариган бўлиб чиқади – ниятлар армонга дўнади. Бу ҳол, айниқса, Мұхаммад Юсуф сингари ўтган асрнинг 50–70-йиллари шароитида туғилиб ўсган зиёлиларнинг аксариятига хос. Негаки, бу даврда, ҳозир эътироф этиш-этмаслигимиздан қатъи назар, маданий юксалиш кузатилган – қишлоқлардан минг-минглаб ёшлар илм излаб пойтахти азимга, марказий шаҳарларга йўл олганлар. Яъни асрлар бўйи шаклланган турмуш тарзи ўзгаришга юз туттандики, бу аввало кўнгилда кечади. Мана, шундай кечимлардан бир зарра:

*Ота, гўзангизни сув босиб кетди,
Чумчук вайрон қилди жўхорингизни.
Менинг китобларим бир жамбилбаргча
Ёзолмади лекин хуморингизни...*

Демак, отага кераклигини ич-ичидан ҳис қилгани ҳолда корига ярай билмаётган фарзанднинг изтиробу армонлари кўпчиликнинг кўнглига чиппа ёпишади десак, асло янглишмаймиз. Худди шу гапни соғинч гирдобига ташлаб кетилган оналар, aka суюнчидан маҳрум сингиллар... қисқаси, шаҳар-

да яшагани ҳолда “шаҳарлик” бўлиб кетолмаётган одамнинг умумий номи *соғинчли армон* ва ё *армонли соғинч* бўлган туйғулари ҳақида ҳам айтиш мумкин.

Таниш туйгулар сирасида яна бири – армонга дўнган муҳаббатни алоҳида таъкидлаб кўрсатиш лозим. Албатта, катта бўлган сари “бизлар ёш пайти...” дея гўё ҳамма нарса ҳозиргидан яхшироқ эди деган даъвода собит бўлиб боради киши. Шу дардга йўйманг-у, у даврлар муҳаббат дегани ҳам ўзгача – аксар ёр қўлини гўё тасодифан тутишу жуда журъатли бўлса яшин тезлигидаги чала ўпичдан нари ўтмаган, балки шу боис ҳам кўнгилга чуқур илдиз отган, покизароқ ва романтикроқ бўлгандек туюлади менга. Шу боис ҳам камина йигитлик ҷоғлари бу ҳис домига тушган тенг-тўшларим лоақал бир бор, майли жуда қисқа фурсат бўлсин, кўнглида “Севиш керак, яшаш шарт эмас!” дея ҳайқирганига ёки ҳофизнинг “Кўйнимда бир ёру, кўнглимда бир ёр” деган но-ласини эшитибоқ иchlарида ажиб бир титроқ туйғуларига ишонгим келади. Менга қолса, Мұхаммад Юсуфдан олинган шу икки сатр “зиддиятлар бирлиги” қонуниятини ўзида му-жассам этган ҳолда давр учун типик “муҳаббат тақдири”ни намойиш этади деган бўлардим. Зоро, уларнинг биринчиси юксак романтикага йўғрилган муҳаббатни, иккинчиси муқаррар айрилиқни ифодалайди. Мазкур сатрлар орасига эса минг-минглаб олисларда ҳарбий хизмат ўтаётган ва ё илм эгаллаётган йигитлару “баджаҳл ота”дан ё “ўтириб қолиш” эҳтимолидан қўрқиб йиғлай-йиғлай “остонаси тилло уйлар”-га кетган қизларнинг муҳаббат тақдири битилгандек...

Ниҳоят, яна ўша “долзарблик” масаласи, ҳар не зериктирган ва ҳозирда урфдан қолган бўлмасин, бунга ҳам тўхталиш зарур. Тўғри, шўро давридан қолган асорат, лекин Мұхаммад Юсуфда бу ҳам ўзига хос: долзарб масала жайдари йўсинда муҳокама этилади-да, чапани хулосага келинади. Дейлик, миллий қадриятларни тиклаш масаласи долзарб турган палла шоир бу ҳақда умумий тарзда эмас, конкрет фикр юритади. Гапни “одамлар дўппи киймай кўйгани”дан бошлаб, пировардида “бошга лойик дўппи қолмадими ё дўп-пига лойик бош?” дея ўқувчи ҳамиятига қаратилган савонни қўяди. Ёдингизда бўлса, савон ғоят тез оммалашган – шеърни ким телевизор ё радио орқали, ким учрашув ё бошқа тад-бирда шоир тилидан эшитган-да, охирги сатрлар шундоқ хотирага муҳрланиб қолаверган. Сабаби, бу аксарият ўқув-

чиларнинг дил тубида, яна бир қисмининг тил учида турган гап эди. Бундай гапни “тотиб айтиш” учун эса ҳаёт қозонида халқ билан бирга қайнамоқ керакки, Мұхаммад Юсуф буни улдалай билган чинакам халқ шоиридир...

Ҳар не таниш туйғу ва ё тил учида турган гаплар айтилмасын, шеърга жозиб күч ато этувчи жиҳат қандай айтилгани бўлиб қолаверади. Бас, агар Мұхаммад Юсуф нима дегани билан чеклансан, уни санъаткор сифатида танимаган бўлиб чиқамиз. Ҳолбуки, ўша бироз тўпори ҳислару жайдари фалсафа чинакам санъаткорона маҳорат билан ифода этилган. Фақат бу маҳоратни кўриб олишга, нима десам экан, содалик бироз халақит қиласи. Шоирнинг илк тўпламига ном берган шеърни олайлик:

*Қўл ушлишиб турган шаддод қизлардек,
Қошда ўсма, қулоғида зираклар,
Туюлади менга қишлоққа борсам,
Таниш йўллар бўйидаги тераклар.*

Аввало, мазкур банд синтактик жиҳатдан битта гапга teng: мазмунан битта хабар, битта фикрий ва интонацион бутунлик, битта мантикий урғуга эга. Кундалик мулоқотда ушбу жумла тамом бошқача қурилиши тайин, демак, ҳозирги шакли музайян бадиий-эстетик мақсадга мувофиқ, яъни муаллифнинг хизмати. Дастрлабки икки мисранинг санаш, учинчисининг пасайиб бориш оҳангидалиги тўртинчи мисрадаги мантикий урғуни кучайтиради. Натижада ўхшатиш обьектини англатувчи “тераклар” сўзи урғули позицияга ўтади ва шеърнинг қоқ марказини эгаллаб, образнинг жавҳари бўлиб қолади:

*Бу йигит ким?.. ниқташади бир-бирин,
Сергакланиб, соchlарини турмаклаб,
Таниб секин уҳ тортади биттаси,
Қиқур-қиқур кулар бири эрмаклаб.*

Кўриб турганимиздек, энди тераклар унуптилди – қизлар қолди, холос. Зоро, тераклар вазифасини ўтаб бўлди: улар ассоциатив тарзда “шаддод қизлар”ни эслатди, хотирани ўйғотиб, тасаввурда ғоят ҳаётий бир манзарани жонлантирди. Аслида

ҳам шеър “таниш тераклар” ҳақида эмас, умрнинг улар ёдга соглан онлари, ўша онлар билан боғлиқ ҳаяжону армонлар ҳақида. Шеърда бир борагина қўлланган “тераклар” сўзи шундай жойлаштирилганки, айни ҳислар ҳеч бир зўриқишиз ўзга кўнгилларга кўчаверади, кўчаверади. Умид қиласманки. “кўриб олишга соддалик бироз халақит қиласдан маҳорат” деганда нимани назарда тутганим тушунарли бўлди.

Санъаткорона нигоҳ атрофимиздаги кўримсиз, наздимизда гўё ҳеч эътиборга лойик бўлмаган нарсаларда ҳам бир ҳикмат топиш, уларда кўнгил ва ё турмушда юзага келган чигалликлар ечимини кўришга қобил бўлади. Албатта, бундай нигоҳ эгалари ҳам оз эмас, бироқ факат ўша нарсалар билан тиллаша биладиганларгина чинакам шоирдир. Муҳаммад Юсуф, шубҳасиз, айни шу сирада. Тиллаша билгани учун ҳам у бармоқ узаттанида “эгасиз уй эшиги”нинг йиғлаганини эшитади, “занг илгак сурисла” ўз жойига эмас, юрагига “Қаерда юрибсан, эгамнинг ўғли?” деган савол бўлиб қадалади. Тиллаша билгани учун-да лолақизғалдоқ дардини олмоққа, ялпизга дардини тўкиб солмоққа шошади. Шоирнинг нигоҳи тушиб, унинг поэтик оламига кирганки нарса КЎНГИЛЛИ, яъни ҳис этишга қобил мавжудотга айланади... ҳатто, трамвайлар ҳам. Ўйласам, шу ўринда Муҳаммад Юсуфнинг айрим муҳлислари эътиroz қилишлари ҳам мумкин экан: “Ахир, трамвай ҳиссизлик тимсоли эмасми?!”. Шундай, бир қарашда трамвай ҳиссизлик тимсоли бўлиб кўринади:

*Бекатларда мен қоларман-да,
Айтар сўзим қолиб кетади.
Бодомзорга сени ҳар куни
Трамвайлар олиб кетади.*

Тўғри, ошиқнинг ҳолига, термилиб қолган нигоҳлардаги унсиз зорига қарамай трамвайлар ҳар куни ёрини олиб кетавади. Ҳа, жами тўрт бандли шеърнинг учта бандида охирги икки мисра таъкидлаб тақрорланади. Ҳа, шоир трамвайларни сўколмаслиги, уролмаслигидан афсусланиб, уларни кўролмаслигини **олам-хайқириб жаҳонга** айтади. Бироқ шунда ҳам трамвайнин ҳиссизлик тимсоли демаган бўлардим. Негаки, трамвайлар ошиқнинг ҳолига асло бефарқ эмас, ҳар куни “Темир йўлга бошларин уриб, Фидирақлар нолиб кетади”. Нега шоир трамвай ноласини эшитмайди? Ахир, у “юр деб

ўзи кетар йўлларга трамвайларни буролмаётган" бўлса, айб кимда? Трамвайдами ё унинг ўзидами? Иккисида ҳам эмас, асли ҳамма гап эътибордан четда қолиб турган темир йўлда. Трамвай нима, ахир, у ҳам шу темир издан юришга маҳкум бир ожиз-ку! Бас, бу ўринда гап тақдири азал ҳақида бормаяптими?! Шунақага ўхшайди. Севгисининг истиқболини кўролмай қийналаётган лирик ҳаҳрамонимиз – ўз даври кишиси, яъни, тақдири азал дегани унутилаёзган, бас, севгисига етишолмаганлар буни асло тақдирдан эмас, бошқа нарсалардан (мас., тушунмаган ота-она, эски урф-одатлар, ижтимоий тенгсизлик ва б.) кўришга одатланган давринг. Ахир, қатор қиссаю романлар шундан сўзлаб, фильмлар шуни кўрсатиб турса, бошқача бўлиши ҳам қийин эди-да! Шундай бир шароитда улғайганига қарамай, шоир савқи табиийси билан юз бераётган ҳар неда тақдирнинг қўли борлигига инонган бўлса, не ажаб?!

Лирик кечинмани ҳаракатга келтирган ҳаётий ҳолатни тасаввур қилиш имконияти қанча кенг бўлса, шеърнинг тушунилиш доираси ҳам шунча кенг бўлади. Лекин шеър дегани эпик тафсилотларни хушламайди, уларнинг салмоғи заруратдан заррача ошмаслиги даркор, акс ҳолда, кечинма ифодаси хираплашади. Муҳаммад Юсуфнинг маҳорати шундаки, бир-икки мисрадаёқ ўкувчини ўша лирик кечинма туғилган ҳаётий ҳолатта кўчиради қўяди. Масалан, илк севги ҳақидаги шеърларидан бири мана бундай бошланади:

*Мана шу – мен туғилган гўша,
Ўйга етдим – ариқ ҳатладим...*

Дастлабки мисраларни ўқибок, шеърхон ҳеч бир зўриқишиз маълум вақт олисда юрган одамнинг қишлоғига қайтган ҳолатини тасаввур қиласи, руҳан шунга мос эмоцияларни қабул қилишга чоғланади. Албатта, бу ўринда гап шоир тасавуридаги, у хаёлан мулоқотга киришиб, қаршисида дардини тўкиб solaётган хос шеърхон назарда тутилаётир. Шоир унга ишонади, унинг ҳаёти давомида шундай ҳолатдаги одамга хос элегиявий кайфиятга ошно бўлганини билади ва икки мисра билан ўша кайфиятни тирилтиради қўяди. Давомидан келган "Шу ерлик бир қизга ёқай деб, Узун-узун шеърлар ёдладим" мисралари эса қалб торларини ўша таниш туйғу – армонга айланган илк севги нолаларини янада

нозик пардаларда чалишга созлайди. Бу эса лирик қаҳрамон кечинмаларининг ўқувчи қалбида ҳам кечишини, яъни бади-ият ҳодисасиснинг рӯёбга чиқишини таъминлайди.

Лирик асарда қаламга олинган ҳолат драматизми нечоғли ўткир бўлса, ҳис-туйғулар ҳам шу қадар теран, таъсирчан бўлади. Негаки, яхши шеърхон ўқиш давомида беихтиёр ўша ҳолатни кўнглида, тасаввурида яшаб ўтади (ўзини лирик қаҳрамон ўрнига қўяди, унинг ролини ижро этади). Мазкур жараённи фикран реконструкция қилиб кўрмоқ учун Муҳаммад Юсуфнинг машҳур бир шеърини мисолга оламиз:

*Осмон чўкиб қолди бу оқшом,
Юлдуз бўлиб ёғилди бир сас.
Бир маҳалла нигоҳни кўрдим:
Яшаш керак, севиш шарт эмас.*

Илк мисрани ўқибоқ шеърхон мос эмоционал ҳолатни, яъни лирик қаҳрамон наздида “осмонни-да чўқтирган” недир изтиробли ҳолни қабул қилишга чоғланади. Илк мисра уйғотган кайфият оғир: лирик қаҳрамон ўзини ёруғ оламда ёлғиз сезаётир, осмон уни босиб келмоқда ва шу асно “Юлдуз бўлиб ёғилди бир сас”. Бироқ лирик қаҳрамон бу сасни эшитишни ҳам истамай нигоҳини ерга олади-да, ўзига қадалган “бир маҳалла нигоҳда” ҳам яна ўша ҳукмни ўқийди: “Яшаш керак, севиш шарт эмас”. Ҳолат драматизми шунчаларки, лирик қаҳрамон еру осмонга баравар қарши турибди, кўнглида ардоқлаган туйғу шунчаларки, еру осмонга исён ўлароқ ўзининг “Севиш керак... яшаш шарт эмас!” деган ҳукмини баралла ҳайқириб айтади. Юқорида айтилганидек, жуда кўпчилик ҳаётида лоақал бир бора, атиги бир неча лаҳзага бўлсин, шу ҳолга тушган, бас, ўқилган чоғи шеър уларнинг дил изҳорига айланади, уларнинг ўпла-ўзиники бўлиб қолади.

Муҳаммад Юсуф ҳақида гап кетганда гоҳи “қўшиқчи шоир” дея бироз менсимайроқ қарашга мойиллик сезилади. Буни аҳли қалам орасида табиий ва зарурий бўлмиш рақобатдан туғилувчи, юмшатиброқ айтсан, ноқобил фарзанд – файирликка йўйиб қўйсам ҳам бўларку-я, фақат бу ҳолда сабабни юзадан қидирган бўлиб чиқаман, чоғи. Негаки, аслида бу шеър

билан мусиқа, шеърият билан қўшиқчилик алоқалари нечоғли мустаҳкам ва аҳамиятли эканини англамасликдан келиб чиқади. Ҳолбуки, шеър – оҳанглар қанотида қалб қулоғимизга кириб боруви нутқ, қани уни мусиқийликдан маҳрум қилиб кўринг-чи: бу ҳолда шеър ҳам йўқ бўлади. Зеро, мусиқий оҳанг – шеърнинг зотий сифати. Қўшиққа келсак, у ҳам шеър, фақат унда ўша зотий сифат ғоят бўрттирилгандир... Арузий оҳанглар билан мақомларнинг нечоғли яқинлиги, ҳазрат Навоийдан тортиб Ферузга қадар кўп мумтоз шоирларимиз мусиқийда ҳам моҳир бўлганлари, шоҳ Машраб ғазалларини сетор жўрлигига хониш қилиб юрганини эслатмасак ҳам бўлар. Сирасини айтганда, кенг ҳалқ оммаси Чокар, Мискин, Оразий сингари шоирлар ўтганини асарларини ўқигани учун эмас, уларнинг шеърлари билан айтилувчи ашулалар кунда-кун ора радио ё телевизордан янграб тургани учун билади. Яқинроққа келсак, “Ўзбегим” қасидаси ёки “Биринчи муҳаббатим” шеърининг қўшиқ қилингани навқирон муаллифларини ўзбекнинг етти яшаридан етмиш яшаригача маълуму машҳур қилмадими?! Ахир, кўпчилик кўнглига чиппа ёпишган қўшиқ уларнинг сўзи билан айтилганини билгач, тўпламларини излаб қолмаганими?!

Шунга ўхшаш, Муҳаммад Юсуфнинг шоир сифатида танилиши, яшин тезлигига шуҳрат топишида қўшиқчилик санъатининг ҳиссаси улкан: ҳали илк китоби чоп этилмасидан шеърлари куйга солиниб, иқтидорли ёшлар томонидан тўй-маъракаларда айтиб юрилгани шунга далил. Янги-янги теле ва радио каналлар пайдо бўла бошлаган 80-йиллар адогидан эса шеърлари пайдар-пай қўшиқ қилиниб, телевизор экранлари, радио тўлқинларидан узукун тушмади десак, муболага эмас. Ўн минг, йигирма минглаб томошабин йиғилган стадионлар, энг катта концерт залларида кунда-кун ора берилган концертларда “Муҳаммад Юсуф шеъри билан...” дея тантанавор эълон қилиб турилганини ёдга олсак, **фикримизга** бошқа далил ҳожат ҳам эмас.

Хуллас, ҳозирда радио ва телевидение билан узвий боғлиқ замонавий қўшиқчилик шеъриятнинг энг самарали, бекиёс тарғиботчиси эканини ёқса-ёқмаса эътироф этишимизга тўғри келади. Тўғри, айни имконлар доирачи ё “усилителчи”-дан чиқсан қўлбола шоирларни ҳам майдонга чиқараётгани бор гап ва бу кўпчиликнинг ғашини келтираётгани ҳам асосли. Бироқ, ахир, айб имконда эмас, ундан қандай фойдала-

нилаётганида-ку! Бас, “қўшиқчи шоир” дея бурун жийи рувчилар шуни эътиборга олсалар тўғри бўлади. Акс ҳолда, “қўлбала шоирлар” билан Муҳаммад Юсуфни фарқламаётган бўладиларки, оппа-очиқ турган нарсани кўролмаётганлари, очигини айтганда, файирлик билан гина изоҳланиши мумкин.

Фарқ эса шуки, “қўлбала шоирлар”нинг иш-амали куйга мос slab сўз тизмоқдан иборат, Муҳаммад Юсуф эса ШЕЪР ёзади: унинг қўшиқ қилиб айтилган шеърлари ҳам, энг аввал, кўнгил ҳолининг ифодаси. Фақат ўша ҲОЛ ҳалқона шаклда, ҳалқона оҳангларда шу қадар самимий ифодаланганки, бе-ихтиёр хиргойига ўтиб кетасан, киши. Масалан, “Машраб хиргойиси” номли шеър:

*Донишни қийнаб тўймаган,
Ҳоли жонига қўймаган.
Нодон билан кулиб ўйнаган
Пихини ёрган дунёсан.*

Бир қараашдаёқ бу ўринда стилизация усули қўллангани, дарвешлар хиргойисига хос оҳанг тиклангани кўзга ташланиди. Ўқиганингда, беихтиёр бир маромда қадам босганча хиргойи қилиб бораётган дарвешлар сафи кўз олдингга келади. Худди шу шеърни Охунжон Мадалиев бир турли, Юлдуз Усмонова бошқа бир йўсинда ижро этганлар. Умуман, ҳар икки талқин ҳам ўзича яхши – иккаласи ҳам муҳлислар олқишига сазовор бўлган. Бироқ, назаримда, иккала ижрочи ҳам Муҳаммад Юсуф шеърни ёзиш чоғи кўнгилда кечирган ҳол – дарвеш ҳолини беролган эмас. Кўнгил ҳоли эса шундайки, лирик қаҳрамон дунёдан буткул узилган – руҳан узлатда, айни дамда у ўзини “Дунё ясаниб, жилва қилиб қошима келди, Турғил нари деб кетиға бир шатталаб ўтдим” дейёлган Машраб мақомида сезади. Яъни шеър айни ҳолни ифодалаш, матнда муҳрлаш мақсади билан дунёга келган, унинг қўшиққа айланиши эса – иккинчи ҳаётидир. Яна шуки, агар шеър қўшиқчиликда турли талқинларга изн берар экан, бу унинг бадиий мукаммаллиги, бутунлигидан далолатдир. Кейинги мулоҳазаларимиз шоир “стилизация усулини қўллаган” деган фикримизга таҳрир киритишини тақозо қиласди. Негаки, Муҳаммад Юсуф учун ҳалқона оҳанг ва ифода стилизация, яъни ҳалқ ижодига хос шакл ва оҳангларни шунчаки тиклаш эмас, балки унинг индивидуал услубига ҲОС хусусиятга ай-

лангандир. Яъни шоир кўнгил ҳолини кўпроқ халқона йўсинда ифодалашга мойил, тўғрироғи, ҳол изҳори шундай оҳангга йўғрилганча оқиб келади гўё. Масалан, мана бундай:

*Ғирот минган Гўрўғли
Бобом қани, айтинглар.
Кўнғиротлик Алномиши
Оғам қани, айтинглар...*

Қаранг, бунда халқ оғзаки ижоди билан боғлиқлик яна ҳам очик-ошкор кўринади. Ҳол-кайфият ҳам бошданоқ ҳис этилади: бугунидан қониқмаслик туғдирган ғоят кучли ўтмиш соғинчи. Шоир бу соғинчини “кўлда кийик овланган дала”, “кокиллари ер ўлган санам”, “куйиб кетган жон” каби халқона ифодаларда изҳор этади. Юрагидаги дард бениҳоя кучли, лекин ҳар доимгидек, тушунгувчи одам йўқ, шунинг учун:

*Кўнгалим гулдай эзилиб,
Кўзимга ёш тўляпти.
Эҳ, қуёшга осилиб,*

Ботиб кетгум келяпти, – дея нола қиласди. **Лирик қахрамон** ғоят тушкун кайфиятда, лекин уни бадбин (пессимист) деб бўлмайди. Зеро, аввало, бу ўткинчи ҳолат, иккинчидан, теран мушоҳадага ва шундан келиб чиқиб курашга ундовчи ҳолдир. Яна ушбу ҳол-кайфият ижтимоий табиатга эгалиги, у миллат тарихидаги бурилиш паллада эл-юрт тақдирини ўйлаб яшаётган одам кўнглининг аламлари бўғзига келган чоғдаги сурати эканини айтмоқ керак... Дарвоқе, ушбу шеър ҳам қўшиқ қилинган, бироқ қўшиқчи талқини юқорида мазкур талқиндан фарқли. Бу табиий ҳам, зеро, у қўшиқчилик санъати вакили ўлароқ дунёга келган ва шу мақомда яшайди – у алоҳида асаддир. Яъни қўшиқ ижро этилган онидан ўзининг шеърдан айро мустақил ҳаётини бошлаган ва шеърнинг ҳам шундай ҳаёт кечиришига халал бермайди. Икки орада бундай муносабат қарор топиши учун эса, юқорида айтилганидек, шеърнинг кўнгил ҳолининг изҳори ўлароқ дунёга келиши талаб қилинади. Таъкидлаб айтаманки, *Муҳаммад Юсуфнинг қўшиқ қилиб айтилган аксарият шеърлари ушбу талабга тўла жавоб беради*. Шунаقا экан, уни аниқ бир ижроҷи ва тайёр куйга мослаб шеър битадирган “қўшиқчи шоир”лар сирасида санаш ҳам бориб турган адолатсизлик бўлади.

Ижодида юқоридагича тамойилга таянгани учун ҳам Мұхаммад Юсуф күшиқчилигимиз бадиий савиясини бир баҳя бўлсин кўтаришга хизмат қила билди, десак, асло му- болага бўлмайди. Зеро, бу санъат гуркираб ривожланган босқич – миллий кўшиқчилигимизнинг мустақиллик даври унинг номи билан чамбарчас боғлиқдир. Миллий кўшиқчилигимиз тарихида янги саҳифа очган М.Холиқов, О.Мадалиев, Ф.Бойтоев, Ю.Усмонова, С.Назархон сингари қатор иқтидорли санъаткорлар репертуаридаги сара кўшиқлар Мұхаммад Юсуф сўзи билан айтилгани ҳам шунинг исботидир. Деганим, муваффақиятнинг муҳим омили – истеъдодли шоир шеърларига, асосан, истеъдодли композиторлар мусиқа ёзиб, истеъдодли санъаткорлар ижро этгани. Талантлар ҳамкорлигига яралган кўшиқ эса тингловчини бефарқ қолдирмайди, замонавий қилиб айтсак, хаял ўтмай “хит”га айланади, худди шоир сўзи билан мустақиллик байрамларининг бош саҳнасида туриб айтилган кўшиқлар каби...

Дарвоқе, яхши кўшиқ шеърнинг бизга кўринмай қолган жозиб қирраларини очиб ҳам беради. Ўзимдан, ўз тажрибадан айтай. Мұхаммад Юсуфнинг “Мен дунёни нима қилдим, Ўзинг ёруғ жаҳоним” сатрлари билан бошланувчи шеърининг асл қимматини Севара Назархоннинг “Фичир-ғиҷир тишимдаги Сўлиғимсан, Ватаним” деган ноласини эшитгач англадим десам, шунчаки лутф деб ўйламанг. Энди шу шеърни ўқисам, Севаранинг оҳанглари тортиб кетаётгандек туюлаверади, сатрлар қатидаги буюк мұхаббату дардни тे-ранроқ ҳис қилаётгандек бўламан.

Мұхаммад Юсуф буюклик даъвосидан йироқ шоир эди. Ҳатто ўзини “тўпори назмбоз” атагани, “шеърим шуҳратимга эмас муносиб” дея эътироф этгани ҳам бор гап. Бироқ бир нарса шубҳасиз: Мұхаммад Юсуф қисқа ижодий умри давомида даврининг, халқининг талаб-эҳтиёжларини теран ҳис этиб яшади; Ватанига беғараз мұхаббат, элининг дилидаги дард билан оғриб, тили учида турганни айтиб қалам тебратди. Биласиз, ўзбек саломни аликсиз қолдирмайди: халқимиз ўз шоири хотирасини эъзозлаб кўрсатаётган юксак эҳтиром бунинг ёрқин далилидир.

2014 йил

ИНСОН ЙҮЛИ

Турмушдаги ўзгаришлар инсонни ўзгартирадими ё инсоннинг ўзгариши туриш-турмушимизни? Сезиб турибсиз, савол бамисоли “төвүк олдин пайдо бўлганми ё тухум?” қабилида қўйилди. Яъники, бир-бирига мутлақ зид жавоб берилган тақдирда ҳам ҳар икки томон ўзича ҳақ бўлиб чиқаверади. Хусусан, “Янги инсон” достонида Улуғбек Ҳамдам инсондаги ўзгаришларни ургуламоқда, уларни турмушдаги номақбул ҳолатлар сабаби, истиқболимиздан бехайр фол дея талқин этмоқда. Айтиш керак, шеъриятимизда анчадан буён бу қадар улкан муаммони бадиий мушоҳада қилишга жазм қилинмаган эди. Мен бу ўринда Абдулла Ориповнинг “Юзма-юз” шеърини назарда тутмоқдаман. Замонасининг моҳиятини англаш учун шоир башарият тонгига назар солган, ваҳший мамонтлар тўдасини янада ваҳшийроқ оломон маҳв этганини тасвиrlагач:

Ўша кун бузилди азалий удум,
Уни инсон ўзи бузиб ташлади.
Кундузги ошкора ўғрилардай у
Ўлжасин уй-уйга торта бошлади.
Бизнинг бошимизни боғлаган зулмат,
Нотиқлар тутақиб сўккан зулм қон,
Дунёдаги неки ёмонлик, кулфат,

Барчаси бошланган эди ўша он... - **деб ёзганди**. Эҳтимол, кимларгadir бу ҳукмрон мафкура ўзагини ташкил қилган хусусий мулкка муносабатнинг акс садосигина бўлиб кўринар. Бироқ бундай тушуниш, назаримда, “ҳарфхўрлик” (буквоедство)дан бошқа эмас, зеро, сўз ва образ диапазони бениҳоя кенг: шоир ўз замонасидаги иллатлар илдизи МАНФААТдан сув ичишини таъкидлаётирки, шеърнинг азалий муаммога жўяли жавоблардан бири ўлароқ умрзоқлигини таъминлаётган омиллардан бири шудир, балки?!.. Гапни “Юзма-юз”га бурганим бежиз эмас: назаримда, “Янги инсон” достони “Юзма-юз” билан, умуман, А.Ориповнинг 60-70-йилларда ёзилган замондош ИНСОН мавзусидаги теран фалсафий шеърлари билан диалогик алоқада. Фақат шуниси борки, 60-йиллар авлодининг тийрак нигоҳию ўткир савқи табиийси элас-элас илғаган яралар бугун маддалаб етилган: шоирларимиз “Додод! Қоровул!” дея бонг урадирган ҳолат-у, ҳаммалари борига кўнган каби жим – “мангу мавзулар” тараннуимию ажабтовур

ижодий экспериментлар билан банддек. Худди шу вазиятда ўткир публицистик рух, ижтимоий пафос билан йўғрилган “Янги инсон” достонининг яралиши – кунимиз юзага келтирган эҳтиёжнинг англанаётганидан нишона. Шоядки, бу яна шеърият сўнгги йилларда тамом фаромуш этаёзган асосий миссияларидан бири – инсон қалби учун жавобгарликни ҳис эта бошлаганидан ҳам дарак бўлса...

Улуғбекнинг бугунги кун кишисига берган таърифлари бироз муболағали кўринса, эҳтимол. Ҳар ҳолда, бу таърифларни ўқиганингда, хаёлингдан, энг аввал, “Жуда бунчалик эмас-дир-ов!” деган фикр ўтади беихтиёр. Ҳа, шундай фикр ўтади, лекин изсиз кетмайди-да: истасанг-истамасанг туриш-турмушинг шу таърифга озми-кўп мослигини ич-ичингдан ҳис қилиб турасан. Ахир, шоир таърифида “ўз юрагидан отилиб кўчага чиқиб кетган”, “вужуди ташқарининг жозибаси билан аллаланиб”, ташқарини келин уйидек безаган ва:

*унинг отини КОМФОРТ қўйиб,
қаршисида тиз чўкди БУГУН,*

*ТАНГРИнинг поида сажда қилган каби КЕЧА... - дейил-*ган одам сизу биз эмасми?! Эсларсиз, ўз вақтида Абдулла Орипов кундалик турмуш ташвишларига хитобан “Биз сендан баландроқ тура олсайдик, Биз сендан баландроқ юра олсайдик, Балки ўнғаярди дунё ишлари” дея ёзғирган эди. Орада ўтган вақт давомидаги ўзгариш шунчаки, бугунги кун одамини елиб-югуртирган омилни “турмуш ташвишлари” десак айни муболаға қилган бўламиз. Зоро, оталаримиз “кун кечириш” ташвишини қилган бўлсалар, бизлар “чиroyли яшаш” ташвишига андармонмиз. Эҳтимол эътиroz қилинар: “Хўш, бунинг нимаси ёмон? Ахир, “чиroyли яшаш” ҳам, шундай яшашни орзулаш ҳам айб эмас-ку?!” Шундайку-я, лекин бунинг учун бераётганимиз эваз-чи? Ўйлаб қаранг-а, гарчи “турмуш ташвишлари” дея бир хил атасак-да, оталаримизни елиб-югуртирган эҳтиёжлар билан бизники орасидаги фарқ еру осмонча эмасми? Шундай, чунки улар озми-кўпми меъёрни сақлаган, оталаридан нималарнидир ўзига юқтирган эдилар. Оталари эса, яъни боболаримиз бугуннинг ташвиши билан “Эртага худо раззоқ!” дея умр кечиргандар. Йўқ, улар эртани кўролмайдиган калтабин эмас, бильъакс, нигоҳлари сизу биздан чандон узоққа – охиратга қаратилган, кўнгилларида Аллоҳга собит эътиқод яшаган... Худди шу ўринда минг-минг-

лаб нигоҳлар – бирида қаҳр, бошқасида кўркув, тағин бирида андиша, хуллас, турфа-туман ҳиссий ифодалар акс этган нигоҳлар ўзимга қадалганини ҳис этаман, жўровоз янграган хитоб қулоқни кар этгудек: “Биз-чи!? Бизда-чи!?..” Ҳақиқатку бир Ўзигагина маълум, аммо атрофга назар солсан, ким учундир эътиқод ҳам ўша КОМФОРТ унсурига айлангандек, кимдир уни Аллоҳга шерик қилаётган, кимдир эса билиб-бilmай унгагина топина бошлагандек... Шуларни ўйлаганда дoston муаллифининг ташвишини асосли топасан киши:

Янги Инсон

ўз юрагидан ташқарига чиқиб кетди,

майли,

мен бунгаям розилар бўлдим...

Фақат,

фақат у

ўша кўчани юракларга бошлаб келмасин,

бошлаб келиб,

инсоннинг бу дунёдаги бирдан бир қароргоҳи -

кўнгилни ғорат этмасин!

Ташвишни асосли топишимиз боиси шуки, ташқари ғорат ва ё ишғол этган кўнгилда ҳамма нарса – НАРСА, холос. Яъни унда эътиқод, имон, инсоф, мұхаббат, меҳр, оқибат каби тушунчалар автомобиль, юмшоқ мебель, чангюттич, компьютер ва ҳоказолар қаторида туради – булардан кам бўлса бордир, асло ортиқ эмас. Билмадим, бир пайтлар А.Орипов инсон қалбини кўриқхонага айлантириш керак дея бонг урганида, балки, кимларгайдир шоир ваҳимани бироз оширгандек туюлган, кўпчилик астойдил қулоқ ҳам тутмаган чиқар?! Аттанг! Оқибатга – ҳозирги ҳолатга қараганда, шоирларга қулоқ тутиш керакка ўхшайди. Оқибатни бор бўйи билан кўриб турган Улуғбек Ҳамдам талқинида кўнгил – инсонни ҳайвондан фарқловчи асосий жиҳат (шуниг учун у “балки ташқарига чиқиб кетган кишининг исми Одаму ичкарида қолганники Инсондир?..” деган саволни кўяди. Бу ҳам бежиз эмас: англанган нарса номланмоғи керак, шундагина у онг фактига айланади). Ҳазрат Навоий “инсонни сўз айлади жудо ҳайвондин” деганлар, сўнг замонлар инсон ҳайвонотдан онги билан фарқланиши урғулаб келинади. Албатта, бу иккиси ҳам ҳали фарқловчи жиҳат сифатида аҳамиятини буткул йўқотганича йўқ, аммо сўзловчи қўғирчоқлару турфа

ақлли машиналар замонида яшаётганимиз, олимлар “сунъий онг” яратиш бобида фаол изланаётганлари ҳам бор гап. Баски, кун келиб күнгил инсонликнинг асосий белгисига айланмоғи ҳақиқатга рост кўринади. Шунинг учун ҳам достон муаллифи

кўчанинг жинкўчаларида ҳайвонга эврилаёзган одам
кўнглига қайтса агар,

яна инсонга айлангуси, - **дея қатъий ишонади**. Фақат бунинг учун инсон кўнгли дахлсиз қолмоғи, уни ташқарининг хуружларидан кўриқлаш шарт қилинади.

Кўнгилни тарқ этган одам ўз наздида ташқарига ҳукмрондек, ҳақиқатда эса унинг ўзи ташқаридаги нарсаларнинг бирiga айланиб бўлган. Нарсадан эса фойдаланилади! Шуни ўйлаб шоир бугунги дунёда кечеётган жараёнлардан хавфсирайди, бани башарнинг “дунёнинг қайси бир кунжига ўрнатилган ягона комъютер” бошқарувчи тўдага айланиши эҳтимолидан огоҳлантирмоқчи бўлади. Билмадим, балки, бу ҳам ортиқча ваҳимадек кўринар. Лекин дунёни маънавиятга хуруж, ўзгача турмуш тарзини ёйиш орқали эгаллагамоқни режа қилган кучларнинг борлиги ҳақиқат эмасми?! Ҳақиқат бўлганда қандоқ! Достон муаллифи бу кучларни “манфаат бандалари”, “шайтонлар”, “дажжоллар” деб атайдики, исмлар амалларига мос. Амаллари эса бир мақсадга – **кўнгилни** тарқ этган инсонга турфа тузоқлар кўйиб ортга қайтармаслик чорасини қилишга, қайтар манзилини – **кўнгилни** ғорат этишга қаратилган. Кўнгилга элтувчи йўллар эса боболардан маълум: кўз, қулоқ, томоқ, қўл ва оёқлар. Хўп, ана, томоқ йўлини олайлик. Боболар “луқмаи ҳалол” ақидаси билан, ногоҳ ҳалқумлари булғаниб қолишидан ҳазир бўлиб яшаганлар. Янги инсонга кўйилган тузоқдаги хўрак эса “Инсон, ҳайвон ва ўсимлик геномаси бўтқасидан бино этилган гени ўзгартирилган маҳсулот – сунъий емиш...” Сунъий бўлса-да кўриниши ва мазаси табиийсидан авлороқ! Хўрак шунчалик бўлади-да: гени ўзгартирилган маҳсулот охир-оқибат мутацияга олиб келиши мумкин деган хавотирларни эшитар қулоқлар том битган. Ё ҳалқумларимиз булғанмаётганига кафолат бормикан?!.. Ёки қулоқ йўли. Дажжоллар қулоқка “хуш ёқадиган мусиқаларни пештоқи зарҳалли гипермаркетларда чалдириб қўймоқда” ва

куй қўйнида ботинга иниб,
руҳни аллалаб элитмоқда,
она алласидан фарқ қилиб эса,
бу мусиқа
ақлларни аллалайди...

Ўзлигини дахлсиз сақловчи қўрғон – кўнгилни тарк этган инсон хўракка осонгина алданади, зеро, энди унинг тафааккури мудроқ. Энди у кўзига чиройли қўрсатилган, қулогига ёқимли эшилтирилган, тилию танглайига totли этилган неки бор ямламай ютади, истеъмолчига – “Бўлгандаям юҳодек Истеъмолчига”га айланади. Достонда топиб айтилгани каби, “энди у қаршимизда, шундоқ рўпарамизда, пешонамиздаги ойнада турибди савлат тўкиб...” Ҳа, юзимизга тутилган кўзгудаги аксни танимай турган бўлсак бордир, балки, ақл кўзимиз хиralашгани боисдир, балки, кибрдан, яъни ўзимизга берган баҳоимиз баландлигидан ва танишни истамаётганимиздан. Лекин, нима бўлганда ҳам у акс, демак, унинг қайсиdir чизгилари бизда мавжуд-да...

Улуғбек Ҳамдамда илдизга назар солишга мойиллик кучли: достонда ҳам у ўзини қўйнаган муаммоларга жавобни азалдан излайди, Одам Атонинг “ман этилган мевага узатилган қўли ичкаридан ташқарига солинган илк йўл бўлгандир балки” деган тахминларга боради. Ривоят бағрида ботин маъноларни изларкан, шоир онамиз Момо Ҳавонинг Одам Ато қовурғасидан бино бўлганини эслатади ва бунда буюк ҳикмат кўради: “Биринчи Одам чинакамига ёрдамга мухтож бўлиб, ўзини баҳтсиз ҳис этганда, Роббимиз чорани ботиндан олиб қўрсатмадими?” Шундай, шоир ҳам сизу бизни Яратган йўлидан боришга, чорани ботиндан излашга ундейди:

Зеро,
Инсон Йўли
Одам Атонинг олмага узанган қўлидан
ташқарига солинган йўл эмас,
балки олмадан
Одам Атонинг ботинига -
кўнглига қараган йўл эди...

Ҳа-ҳа,
у ўша йўл эди
ва ҳамон ўша ЙўЛдир!..

2012 йил

БОБУР ВА БУГУНГИ АНДИЖОН АДАБИЙ МУХИТИ

Улуғ инсонлар яшаб ўтган ё қай бир сабаб билан уларга алоқадор жойларда ўзгача файз, ўзгача рух бўлади. Буни юртимиздаги кўплаб азиз қадамжоларни зиёрат қилганда ҳаммамиз ҳам ҳис қилиб кўрганмиз, албатта. Бобур Мирзонинг киндик қони тўкилган юрт сифатида Андижонда ҳам худди шундай файз, рух бор. Шукурким, кутлуғ фарзанд баҳона шаҳримизга йилда бир-икки бор дунёнинг ҳар бурчидан фозил инсонлар ташриф буюрисиши боис бу файз чандон ортиб, рух янада юксалиб бормоқда. Табиийки, Бобурнинг давомчилари бўлмиш Андижон қалам аҳли шу файздан баҳраманд, ижодлари айни руҳдан ҳаво олади.

Адашмасам, Бобур билан боғлиқ Андижонда чақирилган илк катта издиҳом таваллудининг 500 йиллик тантаналари эди. Ҳа, Бобур шу қадар йирик тарихий шахс, бунинг устига ҳалқимиз ҳам уйғонишга келиб қолган пайт – ҳали шўро ҳукмрон 1983 йилда шу анжуман ўтказилган эди. Тўғри, анжуман тугаб-тугамасдан “Бобур шоҳ бўлса, фотиҳ бўлса...” дея эътиrozлар қўзғалган ва кейин яна бир неча муддат қора чаплашда давом этилган. Ҳозир буни айтишдан мурод, юқорида айтилган руҳнинг илк бор ўшанда кириб келганини эслатиш. Деганим, ўшанда, анжуман арафаси ва ундан олинган таассурот натижаси ўлароқ, андижонлик шоирларнинг Бобурга бағишлиланган қатор шеърлари битилган эди. Буларнинг ичida Исмоил Тўлакнинг “Софинч” деб номланган туркум шеърларини алоҳида таъкидлаб сана-моқ лозим. Сарлавҳа остида қавс ичida “Бобур руҳиятига айрим чизгилар” дея изоҳ берилгани муаллиф ниятини англатиб туради. Менга қолса, 1982 йилда ёзилган бу туркум ўзбек адабиётидаги Бобурни янгича, дадил айтаманки, мустақиллик руҳида англаш йўлидаги илк қадамлардан биридир. Янгилик туркумнинг илк шеъриданоқ яққол кўзга ташланади:

*Чақмоқдек чақнаган исмсиз туйғу
бола ҳисларимга солмоқда сурон.
Бобом етолмаган бир армонсимон
олис уфқларга чорламоқда у.*

Этмоқ орзум эди туркни яққалам,
Алишер чорларди шеърий майдонга.
Лек бобом кўзи ла боқсам жаҳонга,
фақат шоир бўлмоқ экан жуда кам.

Бундаги талқин “шоир Бобур ўзимизники, шоҳ Бобур биздан эмас” қабилидаги шўроча талқинга тамом зид. И.Тўлак талқинида эндиғина тахтга ўтирган Бобур “фақат шоир бўлиш жуда кам” деган қатъий фикрда. Зеро, у бобокалони Темур “катта орзу-ла яшаб ўтгани”ни билади, бу орзуни рўёбга чиқаришга энди ўзини бурчли деб ҳисоблайди. Туркум ўн икки сонетдан таркиб топган, уларнинг ҳар бири ҳаётидаги муҳим палладаги Бобурнинг дил изҳори сифатида ёзилган. Масалан, “Ҳисор тогларида ғариб нотавон” кезиб юрган, хиёнатлардан безган Бобур “иссиқ оғуш, содик дўст” излайди, бундай хилқатни топиш учун дунёни пиёда кезиб излашга, бунинг эвазига шоҳпикдан кечишга-да тайёр. Ёки “кўчманчи улуснинг ваҳший овози Гўри Мир саҳнида акс-садо” бераётганини кўриб, Самарқандни забт этгач, қўшини йўл қўйган талонни ўйлаб, темурий шаҳзодалар ўзи каби “буюк орзу” билан яшаш ўрнига бир-бирига ғанимлик қилиш билан оворалигини англаб чеккан изтироблар изҳор этилган сатрларни ўқиганда, ўқувчи Бобурни бир инсон ўлароқ тасаввур қилади, дарду алами, армонларини ҳис этади.

Орадан ўн йил ўтиб – 1993 йилда озод юртда Бобурнинг 510 йиллик юбилейи катта тантаналар билан ўтказилди. Юбилей тадбирлари доирасида чол этилган “Анда жоним менинг” баёзига андижонлик ижодкорларнинг Бобурга бағишлиланган шеърлари, ғазалларига боғланган мухаммаслар, достон ҳамда драмадан парча киритилган. Баёздағи асарларнинг аксари икки юбилей оралиғида яратилгани Бобурга қизиқиши нечоғли кучайганини кўрсатади.

Хусусан, О.Холдорнинг баёзга кирган “Карвон қўнғироғи” достони Бобурга бағишлиланган илк катта ҳажмли асарлардан бўлиб, Ҳиндистон сафари таассуротлари асосида 1985–1989 йилларда ёзилган. Достон Бобур ҳаётидан ҳикоя қилувчи алоҳида эпизодлар билан шоирнинг лирик чекинишларини уйғунлаштиради. Лирик-фалсафий характердаги чекинишлар янгиланаётган тафаккурни ўзида акс эттирган. Масалан, бир ўринда шоир “Аҳси каби қанча арку қасрлар – Қулар, сўнг излаймиз изларини биз” дея инсонга хос лоқай-длигимизни эслатгач:

Мен шуни биламан бир куни келиб,
Бизлардан ранжигай янги бир авлод,
Лоқайдликда айблаб, кўнгиллар тўлиб –
Ўзгаларни ҳатто эта олмас шод,
Гоҳ у деб, гоҳ бу деб ўз боболарин

Қадрига етмаган тентаклар дерлар – **дэя огоҳлантиради**. Бошқа бир лирик чекиниша эса шоир бобурийлар Ҳиндистонда бино қилган обидаларни сайдар этар чоғи кўнглидан ўтганларни мушоҳада қиласди:

Саройларга зеб бердилар, арклар қурдилар,
Бир хотира қолдираи деб ўзга Ватанда.
Бир кун келиб менинг узоқ авлодларим ҳам
Ёдларига олсалар бас, тақдир эканда –
Ватан қилдик, Ватан қурдик, дедилар улар,
Аммо вафо қилмадилар сарой, қасрлар...

Бобур ва бобурийларнинг тарихий тақдирини мушоҳада қиласкан, шоир тугал фикр айтмайди, бу ҳақда мавжуд қарашлардан ўзгачароқ нуқтаи назар ҳам бўлиши мумкинлигига хирагина ишора қилиш билан чекланиб, ўқувчини теранроқ фикр қилишга ундаиди. Достонни ўқиган ўқувчи ҳаёлида бе-иҳтиёр бир савол айланана бошлайди: *Ватан қуриб бўладими?*

Достончиликда Бобур образини яратиш йўлидаги кейинги дадил қадам Тўлан Низомнинг “Уч сўз” достони бўлди. Бундай дейишимизга сабаб, аввало, достонда эпик кўлам кенгайгани, иккинчидан, унинг ғоят оригинал композицион қурилишга эгалигидир. Муаллиф муқаддимада мақсади “Бобур ким?” саволига жавоб топиш эканини таъкидлайди ва бунга эришиш учун қаҳрамон ҳаётидан имкон қадар кўп материалини достонга киритиш пайида бўлади. Шу ўринда аниқлик киритиш зарур: биринчидан, иккинчи боб асосини ташкил қилган Жалолхоннинг қизи Бубнанинг Бобурга муҳаббати тарихи – бадиий тўқима; иккинчидан, достонда “Бобур” романни воқелиги ҳам аксланган, ҳозирги урф бўлган истилоҳ билан айтсак, бу икки асар орасида интертекстуал алоқа мавжуд. Демак, бу ўринда дадил ижодий экспериментга дуч келаётирмиз. Достоннинг ритмик қурилиши ҳам ўзига хос: бармоқнинг турли ўлчовлари билан арузда ёзилган парчалар мазмун ва эмоционал тоналликнинг ўзгариб туриши хисобига уйғунлашади. Ёки иккинчи бобнинг ҳалқ достонлари

йўлида, сажъли наср ва назм билан ёзилгани; достоннинг айрим ўринлари драматик достон кўринишида экани; турли шеър шакллари ва бандлардан фойдаланилгани – ҳаммаси ижодий эксперимент бўлиб, буни биринчи галда ёқлаш лозим, унинг қай даражада қиёмига етгани эса бошқа масала ва алоҳида ўрганишга лойиқдир.

Андижон адилларининг Бобур образини саҳнада жонлантириш мақсади билан қалам тебратага бошлиши ҳам мустақилликнинг илк йилларига тўғри келади. З.Муҳитдинов ва М.Ҳамидовларнинг “Захириддин Муҳаммад Бобур” номли драмаси бу йўлдаги дастлабки тажриба сифатида кўрсатилиши мумкин. Агар бу асар анъанавий йўлда ёзилган бўлса, О.Холдорнинг “Севги афсонаси” асарида яна ижодий экспериментга мойиллик кузатилади. Худди “Карвон қўнгироги” достонидаги каби, О.Холдор бунда ҳам бадиий вақтни ўйнатади: саҳнада гоҳ Бобур, гоҳ унинг авлодлари пайдо бўладилар. Бундан ўн беш йиллар илгари саҳналаштирилган асарда томошабин диққатини жалб қилиши лозим бўлган нуқталар талайгина эди. Негадир, балки, томошабин қабул қилиши учун мураккаб деб ўйландими, фалсафий мазмуни ва бадиий савияси анча пишиқ бўлган бу асар репертуарда сақланиб қолмади. Ҳолбуки, унинг матнини ҳам, ижросини ҳам сайқаллаб бориш ва маҳаллий театрнинг “фирма белгиси”га айлантириш мумкин эди, назаримда.

Эътиборли томони шуки, Бобур ҳақидаги асарлар адабий ижоднинг барча турларида, хилма-хил жанрларда яратилди. Тўғри, кўп вақт давомида бадиий наср бу борада оқсоқ эди. Фарид Усмоннинг сўнгги йилларда ўқувчи эътиборига ҳавола қилинган “Туш”, “Суҳайлий-Яманий”, “Довонда”, “Сарик ва қизил гуллар юрти” ҳикоялари шу бўшлиқни тўлдиради. Мазкур ҳикоялар, таъкидлаш керак, битта муҳим марғуб жиҳатга эга: улар “Бобурнома”даги бирон-бир фактга таянади. Ёзувчи ижодий тасаввур қуввати билан фактга жон бериш йўлидан боради, шунчаки хаёлни бўш кўймайди. Буни алоҳида таъкидлашимга сабаб бор. Бобур (умуман, буюкларимиз) ҳақидаги асарларда бальзан фазилатларни ортиқча бўрттириш, баҳони ўта ошириб юборишга мойиллик кўзга ташланиб қолади. Ҳолбуки, Бобур бунга муҳтоҷ эмас, унинг шахсияти ва ҳаёт йўли, мусбат ва манфий томонлари билан бирлиқда ҳам ҳар кимнинг, беистисно, эҳтиром ила бош эгшини тақозо қиласи, шунга лойиқ.

Дурбек Қўлдошевнинг сўнгги йилларда эълон қилинган “Болаликнинг сўнгги куни”, “Таваллуд”, “Шикор”, “Хуфёна битим” каби ҳикояларида Бобурнинг болалиги қаламга олинган. Тан олиш керак, у жуда қийин мавзуни ёритишга жаҳд қилган. Негаки, Бобурнинг болалиги ҳақида материал йўқ ҳисоби. Боз устига, ўн иккисида тахтга ўтиргач, бирор унга бола деб қараган эмас. Шунга қарамай, ёзувчининг “Бобурнома”дан мисқоллаб фактик материал териб, шулардан туртки олиб, Бобурнинг болалигидан жонли ва ишонарли бадиий лавҳалар яратса олганини эътироф этмоқ жоиз.

Айтилганлардан ташқари, Қамчибек Кенжанинг катта маърифий қимматга молик сафарнома жанридаги “Ҳинд сориға”, “Аждодлар изидан” номли китобларини; Бобурга багишлиланган шеърлар ва унинг ғазалларига боғланган муҳаммаслардан таркибланган Қобил Мирзо, Замира Рўзиева, Қоражон Суҳайлийларнинг китобларини... Саноқни ҳали узоқ давом эттириш мумкин, лекин бунга ҳожат йўқ. Юқорида санаб ё муҳтасар тўхталиб ўтилган асарларнинг ўзиёқ, бир томондан, андижонлик ижодкорларнинг Бобурга меҳрини, иккинчи томондан, Бобурнинг маънавий раҳнамо ўлароқ бугунги Андижон адабий мухитини фаоллаштирувчи муҳим омиллигини кўрсатиб турибди.

Яна бир гап: бугунги издиҳом руҳига мувофиқ саналган асарларнинг фақат фазилатларига назар ташладик. Албатта, бу улар нуқсонлардан ҳоли дегани эмас. Бироқ тан олиш керакки, мавжуд камчиликларига қарамай, Бобурга сўз ҳайкал тиклаш йўлидаги ҳаракат давом этаётир. Бугунга қадар ёзилганки сатр шу ҳайкални яратиш йўлидаги тажриба, таъбир жоиз бўлса, бир зина, кейингилар уни босган ҳолда юқорилайди. Демак, андижон қалам аҳлидан яқин келажақда Бобур образи мукаммал яратилган “шедевр”ларни кутишга ҳақлимиз.

2013 йил

АДАБИЁТ БИЗ КЎНИККАН ТУШУНЧАДАНГИНА ИБОРАТ ЭМАС...

(*Ёзуечи У.Ҳамдам билан сұхбат*)

Улуғбек Ҳамдам: Сир эмас, кейинги қарийб йигирма-йигирма беш йил мобайнида давр тубдан ўзгарди. Бу дегани шуки, янги даврга хос бўлган кайфият ҳам пайдо бўлди. Демак, истаймизми-йўқми, янгиланган кайфиятни ўз асарларида акс эттирувчи авлод ҳам вояга етган бўлиши керак. Агар шундай бўлса, қани улар? Нега “манаман” дея кўзга ташланмаяпти? Бу гапни яна шунинг учун айтаяпманки, давраларда кўпинча 70-йиллар авлодидан кейин бизда бошқа адабий авлод шаклланмади, деган ёзгирикларни тез-тез эшлиб қоламиз. Чиндан ҳам шундайми? Акси бўлса, бунинг исботи борми? Чунки ҳар бир янги авлоднинг ўз ижодий кредитоси бўлади, дунёни бадиий-эстетик қабул қилишида ўзига хослик бўлади, хўш, шу хусусиятлар нималарда кўзга ташланади? XX аср ўзбек адабиёти тарихига назар ташласак, адабий авлодлар бир-бирларидан жуда кўп жиҳатларга кўра яқол ажралиб турганининг гувоҳи бўламиз. Чунончи, маърифат, ислоҳот ва озодлик ғоялари билан суғорилган ижтимоий кайфият жадидлар авлодининг; инқилоб ва шўронинг илк йилларидағи ғалабали (бунинг замиридаги қурбонлару йўқотишлардан қатъи назар) юришлари билан боғлиқ ижтимоий кайфият 20-йиллар авлодининг; социализм ғоясига ишончнинг тирилтирилиши билан боғлиқ ижтимоий кайфият 60-йиллар авлодининг ғоявий-эстетик мавқеини белгилаган. Хўш, бугун-чи? Бугунги адабий авлоднинг (агар у шаклланган бўлса!) ғоявий-бадиий-эстетик қарашлари нималардан иборат?

Д.Куронов: Сирасини айтсан, мен кўпроқ “70-йиллар авлодидан кейин бизда адабий авлод шаклланмади” дегувчилар фикрига қўшиламан. Бироқ бу фикрни ёзгириқ оҳангига ёки адабиётимизга 70-йиллар авлодидан кейин кириб келгандарни камситиш маъносига айтиш тўғри эмас деб биламан. Назаримда, Улуғбек XX аср ўзбек адабиётидаги адабий авлодларни жуда тўғри санаб ўтди, ҳар бирининг ғоявий-эстетик мавқеи, ижодий кредитосини белгилаган асосий омил – давр до-

минант ижтимоий кайфияти моҳиятини ҳам лўнда ифодалади. Ҳақиқатан ҳам саналган авлодлар ғоявий ва адабий-эстетик қарашлари жиҳатидан бир-биридан аниқ-тиниқ фарқланади. Савол туғилади: мумтоз адабиётимизда ҳозир биз назарда тутаётган маънодаги “адабий авлод”лар борми? Ўйлайманки, агарда йўқ десам, бирор эътиroz қилмаса керак. Демак, адабий авлод дегани муайян давр, шу давр юзага келтирган маълум шарт-шароитлар маҳсули экан-да! Фикримча, шундай: у шахс ижтимоийлашган, ўзининг моҳиятию тақдирини жамият билан бирлиқдагина идрок қилиб, ижтимоийликни шахсийликдан устун кўйган давр маҳсули. Ҳозирги инсон эса, буни хоҳ Farb таъсири денг ва хоҳ бошқа, тамом бошқа олам: у турмушини яхшилаш, ўзи ва яқинларида мавжуд имконларни намоён ён этишу фаровон яшаш учун зарур шароитлар яратиш... каби оддий, кундалик ташвишлар билан андармон. Илож қанча, яқин-яқинларгача адабиётимиз “мешчанча” дея қоралаб келган турмуш ва тафаккур тарзи энди одатий нормага айланиб ултурганини тан олишга тўғри келади. Айтмоқчиманки, Улуғбек, сиз айтган “янги даврга хос бўлган кайфият”, менимча, шунинг ўзидир. Тўғри, ич-ичимизда бу билан келишолмай турганимиз бор гап: ижтимоий фикрга кенг миқёсда таъсири қила оладиган адабиётни, нафақат бадиий, балки ижтимоий тафаккурнинг ҳам илғорида борадиган ижодкорларни – шу куннинг гапини айтадиган “адабий авлодни” ҳануз согинаётганимиз шундан. Ҳолбуки, “янгилangan кайфиятни ўз асарларида акс эттирувчи авлод ҳам вояга етган”, фақат ундан салафларидағи белгиларни излаш бефойда. Негаки, энди ижод аҳлининг барини бирдек ўртовчи умуммиллий дард йўқ, яъни ижтимоий дардни шахсийлантира олишнинг ўзи кифоя эмас, аксинча, шахсий дардни ижтимоий аҳамиятга молик даражада бадиий талқин қила олиш салоҳияти зарур. Энди бир ўйланг, бугунги санъаткор ҳамманинг дилига бирдек йўл топиши, ҳамманинг дилидагини аита олиши мумкинми? Фикримча, йўқ, унинг айтганлари фақат бир қисмнинг кўнглидагина акс садо беради, чунки оммадаги бадиий дид турфа, маънавий-руҳий эҳтиёжлар хилма-хил. Иккинчи томони, ижодкор бугун аввало ўзини ифодалайди дедик. Демак, бугун асарларда воқеланаётган шахсиятнинг даражаси, маънавий-руҳий имконлари-да турфа: бирида оламий муаммоларнинг ташвишли талқини, бошқасида кўнгилнинг олис пучмоқларида ботин шаҳвоний ва ё ваҳшиёна майллар муҳри... Ижодкорларнинг кимиси атрофидаги нарса-ҳодиса ва

ё воқеадан ҳикмат излайди, бошқаси тамом янги воқелик яратиш пайида, тагин бириси учун айтаридан кўра айтиш жараёнининг ўзи муҳимроқ – сўзларни, рамзу тимсолларни ўйнатиш билан овора.

Улуғбек Ҳамдам: Назаримда, бугунги кунда адабиётимизнинг энг катта хусусияти унинг ранг-баранглигидир. Ҳа, замонавий ўзбек адабиёти мавзу жиҳатидан ҳам, жанрий ўзгаришлар нуқтаи назаридан ҳам, услугуб томонидан ҳам ғоят хилма, хил кўринишга эга бўлиб бораётир. Фикримча, шу хилма, хиллик ва унга доимо эга бўлиш имкони бизнинг асл, бебаҳо бойлигимиз бўлса, ажаб эмас. Демак, аввало, шу бойликнинг қадрига етмоқ, уни асрраб-авайламоқ керак бўлади. Чунки ижод учун эркинлик дегани кўчат учун мўътадил тупроқ, сув ва ҳаводек гап. Модом шундай экан, ижод эркинлиги учун бизнинг ҳаммамиз, бутун жамият, айниқса, унинг зиёли қатлами ва айниқса, ижод аҳли масъулдир, тўғрими?

Д.Қуронов: Аввало, агар хилма-хиллик бебаҳо бойлик дея эътироф этиларкан, бугун ўзининг ғоявий-эстетик мавқеига эга адабий авлод шаклланмаяпти дея койишимиз ўринсиз. Ижод эркинлиги масаласига келсак, у бугуннинг кун тартибидан олинган десак бўлаверади. Бироқ, назаримда, бошқа бир масала – эркинликнинг ҳадлари борми ё чек-чегарасизми деган масала долзарблаша бошлади. Сираси, ижод эркинлиги ҳам демократияга ўхшаш нарса: демократия ҳуқуқ ва бурч бирлигини назарда тутади, агар бурчлар инкор қилинса, анархия юзага келади. Шунга ўхшаш, ижодкор ҳам эркин, лекин у бурчини – миллый маданият вакили эканини, қадриятлар, урф-одат ва анъаналарга ҳурмат билан қарашга бурчли эканини ич-ичидан ҳис қилмоғи керак.

Улуғбек Ҳамдам: Бошқа томондан, ранг-баранглик деганимиз авлод деган тушунчани инкор этмайдими? Ахир авлод бўлиш учун муҳитнинг бир хиллигию шунга яраша дунёқарашдаги якранглик ҳам керак бўлади-да. Ҳозир истеъмолда ҳамма “изм”лар мавжуд. Ким анъанада, ким мумтозда, ким модерн ва яна ким “супермодерн”, яъни ҳамма йўналишларнинг кесишувида ижод қиласиги. (Буни оптимистлар “синтез” дейди, пессимистлар бўлса “бўтқа”). Шундай бир вазиятда дунёни бадиий-эстетик қабул қилишдаги яқинликка таянадиган адабий авлод ҳақида гапириш қанчалик ўринли экан?

Д.Қуронов: Албатта, ўринли эмас, буни юқорида ҳам айтдим. Энди адабиётимиз қиёфаси мозаикасимон эканига кўни-

шимииз, кўникишимиз лозим. Зеро, бу табиий ва қонуний бир ҳолдир. Шунаقا экан, аввало, бугунги адабий жараёндаги ҳодисаларга муносабатни шунга мослаш, уни дунёни бадиий идрок қилиш бобидаги ҳар қандай ғояеий, бадиий-услубий изланиш яшашга ҳақли деган тамойилга қуриш керак бўлади. Яъни турли “изм”лар ҳақида баланддан туриб, бурун жийириб гапириш тўғри эмас. Аксинча, адабиёт ривожи эндилиқда ўша “изм”лар орасидаги соғлом рақобат муҳитини тақозо этади. Майли-да, ахир, бир-бирига яқин ижодкорлар ўз клублари, адабий мактабларини ташкил қилинлар, ижодий-эстетик дастурларини ишлаб чиқсинлар, ўзларининг матбуот ва интэрнет нашрларини таъсис этсинлар... Равшанки, мавжуд шароит ижодий уюшмаларда ҳам шунга мос таркибий ўзгаришлар қилиш, уларнинг фаолиятини уюшмалар уюшмаси тарзida йўлга кўйишни заруратга айлантиради.

Улуғбек Ҳамдам: Адабиёт биз кўниккан тушунчадангина иборат эмас албатта, унинг миссияси хийла теран, шунчаларки, инсоннинг аслий ва энг асосий, ичкин эҳтиёжларига ажабтовор тарзда жавоб бера оладигандек туюлади менга. Чунончи, қадимдан “Биз қайдан келдигу кетурмиз қаён?” (Умар Хайём) деган савол фикрловчи инсон учун саволларнинг саволи бўлиб келган. Бунга муқаддас китобларда жавоб айтилган. Одатда, ўлмас битикларнинг жавоби ғоят умумий тарзда бўлади. Фикр одами эса шу умумийликни ўзининг ва ўзгаларнинг ҳаёти мисолида конкретлаштиргиси, унга индувидуал либос кийдиргиси, яқиндан тушунгиси, ҳис қилгиси келади. Шу ерда адабиёт ўзининг образлар олами ва рамзий табиати билан унга ёрдамга бел боғлайди назаримда. Румий ҳазратлари “Ичиндаги ичиндадир” асарида у дунёни, руҳлар оламини бу дунё орқалигини, бу дунёдан олинган мисоллар воситасидагина тушунтириш мумкин, дейди. Бу борада Карл Густав Юнгда ҳам ажойиб фикр бор экан. Унинг “Хотиралар, тушлар, мушоҳадалар” номли асарида ўлимдан кейинги ҳаётга ишора бор, булар туш, онг ости ҳаётимиз, деган фикр илгари сурилади. Аслида, адабиёт ўз табиатига кўра худди шундай жиҳатларни ҳам қамраб олади ва қамраб олмоғи керак эмасми? Фақат уч ўлчовли оламга, бу дунёning ақидаларигагина суюниб, унинг талабларигагина малҳам бўлиши мумкин, ҳа, шаксиз, у мавжуд ҳақиқатнинг бир палласигагина бўла олади. Ҳақиқий адабиёда ҳар икки оламга ишора бўлмоғи ва энг муҳими, ҳақиқий катта адабиёт ҳар икки

оламдан маънавий туртки олиб яратилмоғи керак, деб ўйлайман. Чунки бу адабиёт бизнинг ўзимиз, кўнгил ҳолимиз, онг устию онг остидаги борлик “Мен”имиз экан, унинг “беш кунлик дунё”нинг малайи бўлиб, ундаги бирон бир ўткинчи мафкурага хизмат қилибгина “кун кўриши” ҳар қандай жиддий адабиётнинг кечирилмас нуқсонидек туюлади менга... Шу хусусда ҳам фикрлашиб опсак.

Д.Куронов: Кечирасиз-у, Улуғбек, фикрингизда ички зиддият кўярпман: агарки адабиёт “мен”имиз экан, у “беш кунлик дунё”-дан айро тушолмайди, негаки, “мен”имиз дунё билан муносабатдагина мавжуд. Бас, адабиёт ўша “мен”ни дунё билан узвий алоқада, яъни дунёдаги “мен”ни ёки “мен” орқали дунёни ўрганиди. Шунақа экан, уларни бир-бирига бу қадар кескин қарши кўймаган маъқул кўринади. Ахир, бизга шу беш кунлик дунёнигина қисман билиш имкони берилган, буни сиз Румийдан келтирган фикр ҳам тасдиқлаб турибди. Тўғри, адабиётнинг воқе-лилка бадиий иллюстрация бўлиши ҳам, мафкура хизматчиси бўлиши ҳам нораво, лекин улардан буткул ҳоли ҳам бўлолмайди. Зоро, ижодкор воқеликни бадиий идрок этаркан, у ҳақдаги муайян фикр-қарашларини ифода этади. Бас, жамиятда яшаб турган шахс сифатида ижодкорнинг фикр-қарашлари мавжуд мафкуралардан бирига яқин бўлиши ажабланарли эмас. Ҳа, биз шўроча андозадаги адабиёт ва мафкура муносабатидан задамиз, шунинг таъсирида иккисини бир-биридан тамом айришга ҳаракат қиласиз. Ҳолбуки, бир томони онг соҳаси бўлмиш адабиётнинг ички моҳиятидан келиб чиқувчи мафкуравийликни инкор қилиш зўрликнинг бошқача кўринишидир.

Улуғбек Ҳамдам: Дунё дунё бўлибдики, эзгулик ва ёвузлик курашиб келади. Кеча адабиёт эзгулик, яхшилик, ёруғликнинг ёнида туриб “жанг” қилаётган эди. Бугунчи?.. Бугун адабиёт эзгулик учун курашишдан “уялмаяптими”, “ор-номус” қилмаяптими? Кўпчиликнинг назарида кулгили аҳволга тушиб қолган эзгуликнинг ёнида, эзгулик учун “жон олиб, жон бериш” адабиётга ғалати, соғлом мантиқдан узоқ тутим, “романтика” бўлиб кўримаяптими? Хуллас, адабиёт бугун кимнинг, ниманинг ёнида ва нима учун?..

Д.Куронов: Ҳа, сиртдан қарасанг адабиёт ҳануз эзгулик томонида тургандек эса-да, афсуски, ташвишингизда асос йўқ эмас... Ҳаммага маълум, бадиий асаддаги ошкор дидактика – насиҳатбозлик қанчалик ғашга тегса, намойишкорона эзгулик байроқдори бўлиш ҳам шунчалик эриш туюлади.

Мен сариқ матбуот саҳифаларида урчигандан урчиб ётган “ибратли” ҳикояларни назарда тутяпман. Эҳтимол, ўзини шулардан фарқлаш учун чин адабиёт эзгулик учун курашишдан “уялиброк” турган бўлса бордир. Албатта, бу нотўғри, бу ўз мавқеини қўшқуллаб топшириш, жанггоҳдан ура қочишдан бошқа эмас. Умид қиламизки, чин адабиёт бу хатосини тез англайди ва яна ўз мақеини эгаллайди. Бироқ бу ўринда масаланинг бошқа бир жиҳати муҳимроқ кўринади. Айтайлик, жангари фильмларни кўп кўрганмиз – уларда қаҳрамон ҳамиша эзгулик тарафида. Лекин эзгулик тантанаси кадр ортида қолади, томошабинни эса кадрдаги муштлашувлар, отишмалар, қон тўкишлар, фаҳш саҳналар ўзига жалб этади... Албатта, бунинг инсон психологияси билан боғлиқ асослари бор, лекин ҳозир гап бу ҳақда эмас. Гап шундаки, адабиётда ҳам шу ҳол бот-бот кўзга ташланиб қолаётир. Масалан, бирор фоҳиша ҳаётини қаламга олади-да, унда-да аввало бир инсонни кўрмоқни, тақдир дегани кутилмаган эврилишларга бойлигию инсон ҳаётининг у ё бу ўзандан кетишига атрофдагилар ҳам сабабчи бўлишларини кўрсатмоқчи бўлади. Ният-ку яхши, лекин шўрлик ният фаҳш саҳналар соясида кўмилиб кетади-да! Энг ёмони, аксар эпизодлар миллий руҳга озор етказади, бадиий дидга ўтиришмайди. Қизиги, бирор буни беаёв танқид қилса, бошқаси шуни ўқимасдан адабиётшуносман деб юрганларни койииди, тағин бириси буни Чўлпон бошлаган анъаналарнинг давоми **де-йди**. Майли, Чўлпоннинг ёзганлари ўз даври учун жудай-ла ошкора, бунга қўшилайлик ҳам. Ҳолбуки, Чўлпон тасвиридаги фоҳиша ўзи тушиб қолган ботқоқдан чиқиш умидида пул йиғиб, кун санаб юрган бир мазлума, Мирёқуб бўлса ўзидағи “итлик”дан қутулиб, одам бўлишга чоғланган инсон. Чўлпон фаҳшни таназзул сабабларидан бири сифатида талқин қиласи, энг муҳими, унинг ёзганлари инсоннинг шаҳвоний майлларига эмас, онг-тафаккурига қаратилган. Афсуски, ҳозирда яратилаётган айrim асарларга нисбатан бу гапни айтиб бўлмайди. Айтмоқчиманки, ижодкорнинг ўз олдига эзгу ният қўйганининг ўзи кам, бу ниятнинг қай йўсин амалга оширилиши пировард натижани – ўқувчида қандай таассурут қолдирилишини белгилайди.

Улуғбек Ҳамдам: Истаймизми-йўқми, бугун постмодернизм ҳақида тўхталмай ўтолмаймиз. У нима, бугун дунё олаётган ҳаво-нафасми? Унинг хусусиятлари XX аср ўзбек адабиёти ми-

солида қандай ва нималарда кўринади? У бизни қаерга бошлаб кетаяпти? Аслида, модомики, постмодернистик кайфият кўнглимиизга ташриф буюрган экан, яхшиси, унинг кўлидан бизнинг етаклаганимиз беҳроқ эмасми? Ахир, унинг “манифести”да мутлақ эркинлик деган, бир қараашда хуш, моҳияттан эса инсониятни нималарга гирифтор қилиши номаълум бўлган (аслида, тахмин қилиш қийин эмас!) бош “модда” бор. Бу “модда” маддалаб кетмайдими?.. Чунки Ҳаёт (Реализм) деб аталган “Шоҳкўча”га нисбатан у (ва ҳар қандай бошқа “изм” ҳам) бор йўғи бир “ёндош кўча” бўлса-ю(ва у ўша “Шоҳкўча” туфайлигина қадриятга эга эса), бу кўчага ихтиёрини, сўнг ўзини бутунлай топшириб, ичкарига оёқ босган инсон адашиб кетмайдими?.. (Бу борада фикр билдираётганда у ёки бу “изм”га бўлган муҳаббатимиз ва ёки нафратимиз қобигидан чиқиб олсак, ҳақиқатга яқинроқ келармиканмиз, дейман).

Д.Қуронов: Биласизми, Улуғбек, адабиётимиздаги Ғарб таъсири масаласи кўтарилсаёқ, ваҳима оҳангни ўз-ўзидан баланд пардага кўтарилиб кетаверадигандек туюлаверади менга. Умуман айтаман-да, ҳозир гап келиб қолди... Ойбекни эсланг: Блок шеърияти билан танишгач шеърият ҳақидағи фикрларим буткул ўзгариб кетди дея эътироф этганди у. Жумладан, шоир Блоқдан рус символизмига хос ва кейинча импрессионизм мутлақлаштирган “оний лаҳзани” тасвирлаш манерасини иходий ўзлаштирдики, шунинг маҳсули ўлароқ 20-йилларнинг охирларида пейзаж лирикасининг гўзал на-муналари дегулил қатор бетакрор шеърларини яратди. Лекин бу билан Ойбек символист ҳам, импрессионист ҳам бўлиб қолмади – миллый шоиримизлигича қолди. Бир пайтлар Чўлпонга Фрейд талимоти таъсири ҳақида ёзгандим: адаб психоанализга хос ёндашувни Мирёқуб руҳияти таҳлилида қўллади. Чўлпон ҳам бу билан фрейдчи бўлиб қолмади – бор-йўғи миллый романчилигимизни бир одим илгарилатди, холос. Бунақа мисолларни яна келтиравериш мумкин, лекин бунга зарурат йўқ деб ўйлайман. Фақат айтмоқчиманки, миллый маданиятимиз ўзга маданиятлар билан алоқада ўзлигини йўқотар даражада ғариб эмас, аксинча, ғоятда бой ва томирлари теран маданиятдир. Бас, маданиятлараро мулоқот жараёнида у ўзига сингишадиган, ЎЗИНИКИ бўлиб кета оладиган жиҳатларнигина олиб, бошқаларини сиқиб чиқаришга қодир. Аминманки, постмодернизм ҳам бундан истисно эмас. Мазкур қонуниятнинг мудом амал қилиши учун кўп

нарса талаб этилмайди – ижодкорларимиз миллий ўзлигиги-ни, қайси ва қандай маданият вакили эканларини унутмай қалам тебратсалар кифоя.

Улуғбек Ҳамдам: Адабиётнинг табиатида ўйинлик хусусиятининг тобора тош босаётганлигини кўриб-сезиб турибмиз. Бу албатта, янги гап эмас. Қадимдан адабиётда “фойда” (мехнат) (utile) ва “ўйин” (ducle) деган икки қанот мавжуд бўлиб келган (негадир учинчи хусусият – сифиниш, илтижо ҳисси ҳақида айтилмаган. Чунки бадиий асарнинг яратилиш асносида меҳнат ва ўйин завқидан ташқари илтижо, сифиниш ҳиссияти ҳам иштирок этади). Фақат кейинги вақтларда ўйиннинг ҳиссаси кучайиб кетди. Бу дегани шуки, нимани айтишдан кўра қандай айтиш, дард айтишдан кўра, “ниманидир” бўлсаям гўзал шакллар ёрдамида ўқувчига етказиш биринчи ўринга чиқиб бораётир. Аслини олсангиз, модерн, постмодерн суянадиган асосий устунлардан бири ҳам шу: ҳамма нарсани ўйинга, санъатга айлантириш. Нима деб ўйлайсизлар, “ўйин”га берилиб, инсоннинг катта ҳарфлар билан ёзиладиган ДАРДидан узоқлашиб кетмаймизми? Бу кетишда адабиёт чиндан ҳам бошқотирма - кроссворднинг бошқачароқ хилига айланиб қолмайдими?..

Д.Куронов: Йўқ, чамаси, бу масаладаги қарашим бирмунча оптимистироқ ва у, аввало, инсоннинг, сониян, адабиётнинг табиатидан келиб чиқади. Инсон бир жиҳати ижтимоий маҳлук экан, унинг дарддан мутлақ ҳоли бўлишига кўзим етмайди. Модомики, дард бўлар экан, инсон изҳор эҳтиёжини тұяди. Изҳор воситаларидан бири адабиёт бўлса, у инсон томонидан инсон учун яратилади ва ижтимоий муносабатлар тизимида яшайди. Шуларнинг ўзиёқ, фикримча адабиётнинг кун келиб тамом ўйин бўлиб қолмаслигига кафилдир. Ўйинга келсак, у ижод табиатига ёт эмас, ўзингиз айтгандек, ижодда ўйин моменти қадимдан бор: сўз ўйинлари, ўткир қочиримлар, турфа кўринишдаги шакл ўйинлари... Ижодкор учун булар бари восита эди: фикр-ҳисни ўзига хос тарзда ифодалаш ва эстетик завқни кучайтириш воситаси. Вақти келдики, постмодернчилар воситани мутлақлаштиридилар, унга тугал мақсад деб қарай бошладилар: уларнинг ижодий изланишлари боис ижоддаги ўйин кўлами, имконлари бағоят кенгайди. Бироқ бу ҳол, фикримча, мангу қололмайди: қазисан, қартасан – аслингга қайтасан деганларидек, ўйин яна восита мақомига қайтади. Зеро, ўзни ифодалаш эҳтиёжисиз ижод йўқ, бас,

ўйин яна ўзни ифодалашга, постмодернчилар кенгайтирган имконлари билан энди янада самаралироқ хизмат қилали. Дарвоқе, бу қадар ишонч билан гапиришим бежиз эмас: бадий тафаккур тарихидаги фактлар шунга асос беради. Эсланг-а, шовқин-сурон билан майдонга чиқсан импрессионизм, экспрессионизм, онг оқими, абсурд каби “изм”лар ўз даврида ниманидир мутлақлаштирган, ўшани асосга қўйиб, адабиёт шундай бўлур деган даъвони ўртага ташлаган эди. Эътироф этиш керак, уларнинг ҳар бири ўзи асосга қўйган нарсани юксак даражада ривожлантириди. Оқибат шу бўлдики, улар ривожлантирган нарса бадий тафаккурга сингиб кетди – адабиёт эса аслича қолди, фақат уларнинг ижодий изланишлари ҳисобига имконлари кенгайди, холос.

Улуғбек Ҳамдам: Юқорида айтилган шунча мулоҳазалардан келиб чиқиб, битта гапни алоҳида урғу билан айтиш лозимга ўхшайди: бугун жиддий, оқни оқ, қорани қора деб айтишга билим, тафаккур кучи ва жасорати етадиган адабий танқид ҳар қачонгиданда зарурроқ экан. Унинг тушунирувчи, қарашларимизни тиниклаштирувчи, адабий-маънавий ўзагимизга озуқа бергувчи, унга янги руҳ ҳадя этгувчи кучига жамиятда катта эҳтиёж пайдо бўлганига ортиқ шубҳа йўқ. Шу маънода кунимизда бадий асар қайси мезонлардан туриб баҳоланаяпти: унинг сифати, янгилиги, илмийлигидан ташқари танқидчининг **ХОЛИСЛИК** даражаси қай ахволда? деган ҳақли саволлар туғилади. Чунки, кўпинча, бадий асарлар баҳоланган танқидий мақола, илмий тадқиқот ва ёки тақризни ўқиб, ўзингга ўзинг савол бериб қоласан киши: қайси бири паст, қайси бири ўртаю қайсиси баланд асар ва нима учун?.. Аксарият ҳолларда ҳаммаси бирдек дурдона ўлароқ тақдим этилади. (Ва ёки кўр-кўронা “уріб” ташланади). Назаримда бу ўринда танқидчиларимиз ўқувчилик муҳаббати (ёки нафрати) изҳоридан олим-мутахассис муносабатини билдириш даражасига ўсиб боролмаяпти. Яъни у ўзининг у ёки бу асарга ёки унинг муаллифига бўлган симпатия (ёки антипатия) сини олимнинг қараши деб ўйлаляпти. Шулардан битта ҳақли савол туғилади: бугунги ўзбек адабий танқиди мавжуд ҳақиқатни қай даражада ўзида акс эттироқда?

Д.Қуронов: Менга қолса, гапнинг пўсткалласини айтиб, танқидчилигимиз бир жойда депсиниб қолгани тобора равшан бўлиб боряпти, у ўз миссиясини бажаролмай қолди деган бўлардим. Майли, жавоби қанчалар нохуш бўлса ҳам,

аввал мана бу саволларни қўйиб кўрайлик: “Бугун адабий танқидий асарлар ўқиляптими? Ўқилса, кимлар ўқияпти?” Афсус, биринчи саволга дадил “ҳа!” жавобини беришимиз мушкул. Сир эмас, адабий танқидий чиқишларни, асосан, мутахассислар ҳамда матбуотни мунтазам кузатиб боришга ўрганиб қолган айрим катта ёшли ўқувчилар “тарки одат – амри маҳол” қабилида ўқийдилар. Мен бу гапларни педагогик фаолиятим давомидаги кузатишлардан келиб чиқиб айтаёттирман: эртага филолог мутахассис бўлиб етишадиган талабаларни оласизми ё малака оширишга келаётган тил-адабиёт ўқитувчилариними – адабий-танқидий материалилар чоп этиб бориладиган нашрларни ўқийдиганлари юздан бирни ҳам ташкил қилмайди десам, лоф эмас. Мазкур шароитда “танқид омманинг бадиий дидини тарбиялашга масъул” дегани қуруқ гап, негаки амалда “танқид – танқид учун” тамойили ҳукм сурмоқда. Тўғри, адабий танқидий ишларни чоп этадиган нашрлар ҳам, уларнинг адади ҳам кам, боз устига, уларнинг талаблари ҳам танқидчиларни бироз чеклайди. Лекин бу асосий сабаб эмас. Фикримча, танқиднинг ўзи ўзгариши зарур. Биласиз, ҳозир танқидчи ўзини аввало, адабиётшунос ўлароқ хис қилади, ёзгандарни да ҳам олимнинг назари устувор. Балки, адабий танқидий асарларни кўпроқ мутахассислар ўқишининг сабаби шундадир?! Ҳолбуки, танқид ўқувчи омма билан мулоқот қилиши, уни адабий асар моҳиятига яқинлаштириши, муҳими, унда ўқиш эҳтиёжи ва уқиш малакасини шакллантириши лозим. Бу эса, ўз навбатида, шу мақсадларга мос услугуб ва ифода тарзини тақозо этади. Айтмоқчиманки, адабий танқидий асар илмий мақоладек эмас, адабий асар каби ўқилиши, бир сўз билан айтсанак, ЎҚИШЛИ бўлиши керак. Айни чоғда, мунақид ўз фикрларини пухта адабий-назарий асосда турган ҳолда ифодалаши лозим бўлади. Фикримча, танқидчилик шу талаблардан келиб чиқиб ўзини ўзгартирса, ундаги сиз айтган муаммолар ҳам навбати билан ҳал бўлади. Буниси энди бошқа, алоҳида масала...

2012 йил

ИЖОД МАСЪУЛИЯТИ

(“Шарқ юлдузи” журнали саволларига жавоблар)

1. Бадиий асар тарбия воситасими? Яхши китоб эзгуликка, ёмони ёвузликка етаклашига ишонасизми?

Бадиий асар – тарбия воситаси дессак, балки, предмет кўламини бирмунча торайтиргандек бўлармиз-у, аммо тарбиявийлик адабиётнинг қон-қонига сингган хусусият экани бор гап. Ахир, кўхна Шарқ бежиз уни “гўзал хулқлар” маъносини берувчи “адаб” сўзи билан атамаган-да! Зеро, адабий асарлар “панднома” ва ё “дидактик” унвонларига эга бўлса-бўлмаса ҳамиша тарбия қилиб келган ва мудом шундай бўлади. Негаки, чинакам санъаткор ҳамиша эзгулик томонида, борлиқни шу мавқедан туриб акс эттиради ва баҳолайдики, асарнинг жон-жонига сингган эзгулик мутолаа давомида сездирмайгина ўқувчи қалбига инади. Шу тариқа тарбия акти содир бўлади, муаллифнинг “тарбия қилиш” ва ё ўқувчининг “тарбия олиш” мақсадини кўзла-ган-кўзламаганидан қатъи назар.

Охирги жумлаларни ўқиб, беихтиёр ўқувчидан ўзиброк ўз-ўзимга киноя қилмоққа шошдим: “Жўнгина экан-ку!”. Ҳа-да, Улуғбекнинг ёзганларию саволнинг қўйилишидан ўта мураккаб туюлган муаммони “биринчи зарбдаёқ бўйнигача...” Йўғ-а, асло жўн туюлмасин, жўн демадим ҳам. Зеро, юқорида “чинакам санъаткор” дея ургулаганим, аслида, ғайр тоифа, яъни ўзга мавқеда турадиганлар ҳам бор деганидир. Бунинг ҳам ҳеч ажабланарли жойи йўқ. Ахир, санъаткор ҳам инсон, инсонни эса Роббимиз фаришта билан ҳайвон ўртасида яратди, бас, ўй-хисларимизу амалларимиз шу икки кутб орасида тебранади. Айтайлик, қиссанавис бениҳоя гўзал ва соф ишқдан сўйлаётгани чоғ бир тойилса-ю, жажигина эпизодни яланг ҳирс кўзи билан чизса... Илож қанча, авомга муҳаббатнинг маънавий-руҳий моҳиятидан кўра бу томони яқинроқ, шу боис ҳам, афсуски, ёдида кўпроқ ўша ҳирс-ла мойланган эпизод қолади. Демак, гап бориб яна ёзувчи масъулиятига тақалади. Яъни у эзгулик ходими эканини ёдда тутган ҳолда ўзини идора қилмоғи, ўз-ўзига цензор бўлмоғи даркор. Албатта, шу ўринда эътиroz бўлиши табиий: “Унда

энди-энди эришганимиз ижод эркинлиги нима бўлади?” Асли, эътироуз ўринсиз: эркинлик, жумладан, ижод эркинлиги ҳам асло мутлақ бўлолмайди, мутлақ эркинлик ҳалокатлидир. Зеро, мутлақ эркинлик даъвосиу адабиётда аввало ўзни ифодалаш воситасини кўриш сабаб Ғарбда шайтоний руҳга тўйинган битиклар дунёга келдики, оқибати, мана, бугун “кўхна дунё” Лут қавмига эргашиб таназзулга юз тутди. Ривоятда келишича, Дажжол ҳалокатга нофора-сурнай оҳанглари остида бошлармиш. Ажаб, йўл қанчалар ҳалокатли бўлса, чорлови шунчалар жозиб! Қаранг, овруполиклар неча замондан бери “эркак, аёл тенглиги” дея “енг шимариб-енг шимариб” қилиб келаётган ишлар тенгсизликни йўқотибгина қолмай, бугун энди “эркак-аёл” тушунчаларининг ўзига-да дахл қилиб турибди-ку?! Тўғри, адабиёт инсоннинг ўзини, кўнгилни ифодалаш воситаси, бироқ бу кўнглингда борини айтавер дегани эмас-да! Ахир, кўнгил фақат эзгулик макони эмас, унинг олис пучмоқларида чиқишга йўл тополмай бижғиб ётган майллар ҳам бисёр. Яъники, ижодкорнинг ўзи ихота қўймаса, улардан ўқувчини ким ҳимоя қиласи?!..

Мулоҳазаларим ўқувчига ишончсизлик ёки уни “ҳамиша ёзувчи етовида ва шу боис ҳимояга муҳтож” деб билиш сифатида тушунилмасин. Зеро, улар ўқиш жараёнининг психологик хусусиятларидан келиб чиқади. Дейлик, ўқиш давомида ўқувчи асар бадиий воқелигида яшайди, яъни персонажларнинг бошидан ё кўнглидан кечганларни кечириб кўради. Энг муҳими, ўқувчи бадиий воқеликдаги “умри”нинг ҳар лаҳзасида унинг яратувчиси – муаллиф нигоҳи, муносабатини туйиб турари ва ўзи ҳам сезмаган ҳолда муносабатини шунга созлайди. Масалан, персонажнинг ўзгага зулм этиб хузурланаётгани тасвирланган ҳолат ўқувчи дилида мудроқ инстинктни кўзғаса, муаллиф муносабати уни қайтадан мудроққа солиб, унга нисбатан нафрат туғдиради. Аксинча, ёзувчи айни ҳолатни тасвирлаш чоғи инстинктга бўй бериб қўйса, ўқувчи дилидаги мудроқ инстинктни уйғотиб қўяди, холос.

Айтганларим адабий асар эзгулик томон ҳам, ёвузылик томон ҳам бирдек етаклайвериши мумкинлиги, ижодкор масъулияти ҳақидаги гаплар бугун ғоят муҳим аҳамият касб этаётганини кўрсатади. Дарвоқе, баъзи ижодкорлар “дилимга солганини ёзаман” дея гўё ўзларидан масъули-

ятни соқит қилган бўладилар. Асли, бундай қараваш илдизи ғоят қадим: Гесиод шоир музалар қулоғига шивирлаганни айтишади деб уқтиради. Хўп, агарда шундай, яъни ижодкор шунчаки медиум – қулоғига шивирланган ё дилига солинганни етказувчигина бўлса ҳам, шивирки бор музалардан ва ё дилига солинганки нарса Раҳмондан бўлавермайди, ахир. Ҳолбуки, ҳақиқий санъат, жумладан, адабиётнинг раҳмоний бўлмоғи шартдир.

2. Энг катта адабиёт юрагимизда яшайди. Демак, адабиёт ҳар биримизнинг, ҳаммамизнинг ичимизда. Лекин адабиётга “яқин” бўлганимиз ҳолда нега дунёда зулм бор? Инсон янги йўл қидирмоқда. Нега? “Йўлини йўқотган дунё”да адабиётнинг ўрни ва роли борми? Нега у, яъни адабиёт дунёнинг йўлини йўқотишига жим қараб тур(а)ди? Адабиёт дунёнинг равишини ўзгартириб, унинг янги, муносиб йўл топишига илҳомлантирувчи куч бўла оладими-йўқми?..

Албатта, оптимист бўлган яхши, лекин “адабиёт ҳар биримизнинг, ҳаммамизнинг ичимизда” деган фикрга қўшила олмайман. Масалага реалроқ қарасақ, адабиётга “яқин”лик ҳам орзуланганни мавжуд дея тақдим этишдан бошқа нарса эмас. Йўқса, юз йил ўтиб ҳам Чўлпоннинг “Адабиёт ўқуйлик!” хитоби долзарб бўлармиди?! Халқимизнинг бу кунги китобхонлик даражаси эътиборга олинса, адабиётнинг ижтимоий роли ҳақида гапириш ҳам асосли эмасдек. Китобхонлик маданияти, бадиий информацияни қабул қила олиш дарражасини-ку гапирмаёқ қўяйлик. Рости, кўпчилик учун “Ўтган кунлар” ҳамон “Отабек деган йигит бўлади, марғилонлик Кумуш деган қизни яхши кўриб қолади...” дан бошқа эмас. Қизиқ ҳолат: бувиларимизга бувилари “Фарҳоду Ширин”, “Лайлову Мажнун”ларни ўқишни тақиқлаган эканлар, “очилиб кетасан!” деб. Яъни бу борада ҳам жудай-ла илгарилаб кетмаган кўринамиз. Бас, аҳвол шу экан, “дунё равишини ўзгартириш” вазифаси адабиёт учун оғирлик қилмайдими?! Ҳолига қарамай унга бу қадар оғир юк ортиш инсофдан бўладими?! Назаримда, бугун жамияти-мизда китобхонлик даражаси ва маданиятини юксалтириш масалалари муҳимроқ, зеро, бу борада эришажак муваффақиятларнинг табиий ҳосиласи ўлароқ нариги муаммолар ҳам ўз-ўзидан ҳал бўлиб боради.

3. Битта асар жамиятга икки хил таъсир кўрсатадими? Нима учун?..

Ҳа, ҳеч шубҳасиз... Шу ўринда бир воқеани эслашим ўринли кўринди. Йигирма йиллар нарида Тошкент сафаридан қайтаркан, ўзим тенги сергапгина ҳайдовчига тўғри келдим. Адабиётчи эканимни билгач, айтган биринчи гапи ҳамон қулоғим остида (оҳанг жилвалари билан) жаранд-**глайди:**

– “Улуғбек хазинаси”ни зўр ёзганда, Одил Ёқубовмиди?!..
Халиги бор-у, Хуршидабонунинг “бегим... бегим...” дейишлари, воҳ...

Назаримда, ҳайдовчи йигит айни дамда ўша саҳнани илк бор ўқиган чоғдаги ҳолатни хаёлу кўнгилдан қайта ке-чираётгандек, гўё қизнинг ўтли шивирлари ошиғига эмас, нақд унинг ўзига қаратилгандек... Қаранг-а, адид талқинида ушбу саҳна – икки тақдирни боғлаган покиза муҳаббат намоёни, икки дил ва вужуд бирлашган лаҳза, гўзал туйғунинг энг юксак чўққиси; ҳайдовчи тенгдошим хаёлида эса шаҳватдан ўзгаси қолмаган. Шунга ўхшаш, кимдир Асадбек-нинг тақдиридаги чигалликларни мушоҳада этади, ким эса унинг аъмолларига ич-ичидан ҳавас, хаёлида ё ҳақиқатда уларга тақлид қиласди...

4. Хос ва омма диidi ҳамда адабиёти ҳақида сиз нима деган бўлардингиз? Ҳаммага “ҳамма нарса”ни тақдим қилиш қандай оқибатларга олиб келади? Маънавий иммунитети ҳали етарлича шаклланмаган ёш авлодга қандай асарлар тавсия этиладио қандайлари йўқ?

Сирасини айтганда, гап яна ихоталаниш, чеклову тақиқларга бориб тақалмоқда. Зеро, ҳамонки “тавсия этиладиган” ва “тавсия этилмайдиган” асарлар бўлар экан, ўз-ўзидан ўқувчиларнинг кейингилари билан танишиш имконини чеклаш зарурати юзага келади. Шўро даври чекловларидан безган муҳитда ҳар қандай чекловга нисбатан салбий муносабат шакллангани ҳам, бирон-бир чеклов жорий этилсаёқ Фарбда “демократияга таҳдид”, “инсон **хукулари** поймоли” дея айюҳаннос солувчилар, ўзимизда бўлса уларнинг ноғорасига ўйновчилар топилиши ҳам бор гап. Қизиқ-да, дажол ноғорасига шоҳ ташлаб ўйнашдан аввал ота-бувамиздан қолган “бир балоси бўлмаса шудгорда куйруқ на қилур” нақли эсланса-ку – олам гулистон. Ҳа-да,

бир танангга ўйла: “Фойданигина маслак билган кас нечук “менинг ҳукуқларим ҳимояси учун” бунчалар ҳаражатманд бўляпти? Маслагидан кечганми ва ё бошқа фойдани кўзлайдими?..” Шундай, бу нокас “юртинг дарвозаларини очиб қўй, истаган еримни топтайин!” деёлмайди – “демократ” деган оти бор ахир, бас, не-не савдолардан қолган “эркинлик” отлиф сийقا танглари билан кўнгил дарвозаларини очтироқ пайида бўлади, чунки руҳни булғай олса **булди** – **измига** олгани шу!.. Хуллас, бугунги дунё манзарасини кўз олдига келтириб, ундаги руҳимиз, маънавиятимиз, миллий ўзлигимизга таҳдидларни мушоҳада қилолганки киши улардан ихоталанишга нафақат ҳақли, балки бурчли эканига имон келтиради. Зеро, имонли одам икки-уч бўғин наридаги авлодлари бугунги Ғарбдаги каби маънавий муҳитда яшашидан ор этади, бунга йўл қўйгудек бўлса охирати куй-иб кетишини теран англайди.

Ҳеч шубҳа йўқ, “иммунитети ҳали етарлича шаклланмаган ёш авлодга қандай асарлар тавсия этиш” тарзида масала қўйилганини кўрибоқ мийиғда куладиган, шу ҳақда бош қотирувчиларни ижтимоий тафаккури қолоқ ёҳуд шўро қолдиғи – “совок”ликда айловчилар ҳам етарлича топилади. Афсуски, дажкол хизматига руҳан ҳозир бу тоифа минг йиллар давомида масала айни шу тарз қўйилиб келганини билмайди ё билса-да назарга илмайди – кибрга берилган. Афлотун дегудек бўлсан, балки, “Унинг ким бўлибди?!?” дейишдан ҳам тоймас, шундай бўлса-да айтай, қарийб икки ярим минг йиллар аввал Афлотун савол қўйган: “Болаларимизнинг дуч келган миғларни, қайсики – тайину нотайин каслар томонидан тўқилган, аксарияти биз улар улғайгандарида онгода бўлиши керак деб ҳисоблаган қараашларга зид келувчи миғларни тинглашлари, мурғак қалбларига сингдеришига осонгина йўл қўйиб бера оламизми?” Файласуф бераётган саволнинг жавоби ўзи билан бўлса-да, у суҳбат равишини шундай олганки, шогирд хулоса ясади: “Биз бунга асло йўл қўймаймиз!” Йўл қўймаслик учун эса иккита асосий чора кўрсатилади: 1) “миф яратувчиларни назоратга олишимиз керак: агар уларнинг асарлари яхши бўлса, қабул қиласиз, йўқса – рад этамиз”; 2) “тарбиячилар ва оналарни болаларга фақат тан олинган миғларни ҳикоя қилишга кўндирамиз”. Камина кун сайин амин бўляпманки,

Афлотун айтмиш чораларни замонамизга мослаган ҳолда кўллаш зарурати етилиб бормоқда. Сабр, “яна цензурами?!” дея аюҳаннос солмай туриңг, ҳозирча маҳсус назоратчи идорани назарда тутмадим. Негаки, кўзланган мақсадга ношира мұхаррирлар масъулиятини ошириш билан ҳам эришса бўладиган кўринади. Дейлик, ноширларимиз ўзларини аввали зиёли, шундан сўнггина тадбиркор деб билсалар, муаммолар ўз-ўзидан ҳал бўладигандек. Яна, мұхаррирлар юксак маънавиятли, бадий диди инжаю фаросатли бўлсалар-да, бемаза китобда “мұхаррири фалончи” қабилида ўз исми-шарифининг кўрсатилишидан ор қилсалар... Ниҳоят, бизга “адабиёт” дея тақдим этилган “нашр маҳсулот”ларини элакдан ўтказиб, хулосалари асосида нашриётлар фаолиятига жiddий тъясир қила оладиган тақдимотлар киритишга ҳақли бадий кенгаш бўлса...

Хўп, “нимани тавсия этмаслик” масаласини-ку шу тарз ҳал қилайлик ҳам, бундан-да долзарб “нимани тавсия этиш” масаласи кўндаланг бўлади. Хўш, ўша “иммунитети ҳали етарлича шаклланмаган”ларга тавсия этгулик нимамиз бор? Борингки, бизлар ўқиб катта бўлган асарларнинг бир қисми эҳтиёжни қисман қондирап ҳам. Қолганини-чи? Ахир, бугунги болалару ўсмирларнинг интеллектуал савијаси шу ёшдаги бизлардан чандон баланд, бас, эҳтиёжлари ҳам шунга яраша эмасми?! Афсус, тан олиш керак, ҳозир шу эҳтиёжларни қондиришга қодир ёзувчи-шоирларимиз йўқ ҳисоби. Негаки, “болалар адабиёти”га бироз менсимайроқ қараш урф бўлган. Энди бу ҳолни тубдан ўзгартириш, ёш авлод тарбияси билан бевосита боғлиқ соҳа ривожига жiddий, балки, давлат миқёсида эътибор қаратиш, амалий чора-тадбирлар ишлаб чиқиш зарур кўринади. Жумладан, соҳа мутахассислари иштирокида ёш хусусиятларига мос асарлар рўйхатлари тузилса; миллий адабиётимиз хазинасидаги сара дурданаларни олиш билан бирга хорижий адабиётлардан сайлаб таржималар қилинса; ниҳоят, болаларимизга мўлжалланган китоблар оммавий ададларда чоп этилса-ю энг чекка қишлоқларгача арzon нархларда етиб борса... ҳақиқий маънода адабиётга “яқин” бўлиш йўлидаги дадил одим, адабиёт макон тутмоғи учун миллионлаб қалблар эшигини очиб бермоқ ва зиммасидаги эзгу миссияни бажаришига пухта замин бўлур эди.

5. Умидбахш ва тушкун адабиётнинг ўқувчи ва жамиятга таъсири масаласида нималар дея оласиз? Замонавий дунёниг бугун қандай адабиётга эҳтиёжи бор?

Ноумид – шайтон, дейдилар. Фикримча, буни “умидсизлик шайтондан” деб тушунган тўғрироқ бўлади. Умидсизликка тушганинг шайтон куткусига берилиши осонроқ, чунки, агарки у умидсиз экан, Раҳмонга ишончи дарз кетган, ундан йироқлашган. Менга қолса, тушкун асарлар асли дилларидағи умидсизликни енгишга чоғланган муаллифларнинг мағлубияти ҳосиласидир. Яъни, масалан, Камю асарлари ёзувчи дилини чулғаган абсурд туйғусини енгишга ҳаракат бўлгани каби, фақат, бу интилиш самараси турлича. Дейлик, “Қаландар ишқи”дек дилбар ғазалда Чўлпон умидсизликни енгиб ўтолмаган. Бироқ бунинг узрли важхи бор: лирика оний кайфиятни чизади, яъни оннинг ўзи сингари кайфият ҳам ўткинчи. Шеърхон кўнглида ҳам шу оний кайфият кечиб ўтади ва ўзидан кейин аксар (некбин кишиларда) умид соғинчини қолдиради. Қолаверса, ҳаётида шу каби онлару уларни келтириб чиқарган омиллар нечоғли кўп бўлмасин, шоир дилидаги чўнг умид умидсизлик билан олишиб ва енгиб яшаган: тушкунликка бўй беражэзган кўнглига қаратा “Кўнгил, сен бунчалар нега Кишанлар бирла дўстлашдинг” деб бошланувчи машҳур хитоби бунга далил. Энди ўйлаб боқинг: тушкун руҳга йирик эпик асар, дейлик, роман йўғрилган бўлса-чи? Табиийки, бу ижодкордаги оний кайфият ифодаси бўлмаганидек, ўқувчи дилида ҳам ўткинчи эмас, аксинча, у кўнгилни тамом эгаллаш пайида. Иммунитети паст кўнгил бунга қаршилик қилишга ожиз, оқибат шайтанат учун енгил ўлжа бўлиб қолади.

Замонавий, яъники бирор “глобал исиш”дан, бошқаси “кичик музлик даври”дан, тағин бирори “астероид билан муқарарар тўқнашув”дан башорат қилиб турган дунё, ҳеч шубҳасиз, умидбахш адабиётга эҳтиёжманд. Умид – башариятнинг олисдаги нурга тиккан кўзи, адабиёт эса киприк мисоли уни чанг-губордан асрару томчидори каби ювиб равшанлантиримоққа масъулдир. Зоро, ўша нурни кўролмай қолиш хавфи қаршисида зикр этилган ваҳимали башоратлар сохта пўписачалик ҳам қўрқинч эмас.

6. Ўтмиш меросни ҳар бир замон ўз мезонлари чигириғидан ўтказиб туриши керакми? Нима учун?

Инсон ўтмиш меросига ҳамиша сайлаб муносабатда бўлади. Яъни у ўтмиш меросининг барини эмас, ундаги ўзи учун ижтимоий-шахсий аҳамият, қиймат касб этувчи нарсаларнигина қадрият санайди. Бевосита адабий меросга келсак, бунда қиймату аҳамият, биринчидан, асарда муҳранган (кодланган) МАЪНО кўлами билан; иккинчидан, ўша кодлар (белгилар)нинг МАЪНОнинг янги қирралари ни жилвалантириш ва ё янгиланган МАЪНОни ташишга қай даражада қобиллиги билан белгиланади. Бошқача айтганда, гап инсон учун аҳамиятли (кўламидан қатъи назар) ва эзгу мазмунни гўзал шаклда ифодалаш ҳақида бормоқдаки, бадиий қадриятни сайлашнинг бош мезони шудир. Агар шу мезон қўйилар экан, биринчидан, бугун ўтмишда яратилган асарларнинг бари ҳам; иккинчидан, битта ижодкор, у нечоғли улкан истеъдод эканидан қатъи назар, яратган асарларнинг бари ҳам қадрият бўлолмайди. Яъни, қиёс жоиз бўлса, адабий-бадиий қадрият мисоли тонналааб руда ичидан ажратиб олинган ёмби маъдандир. Албатта, оддий ўқувчида тонналааб рудани титкилашга на вақт, на тоқат ва на малака бор. Демак, меросимиздан дурдоналарни саралаб, гўзаллигию қийматини намойиш этган ҳолда кенг оммага тақдим этиш ва шу тариқа халқимизнинг бадиий бисотини кўпайтириш вазифаси бевосита мутахассислар зиммасига тушади. Фикримча, бу борада муваффақият қозонишнинг яна бир муҳим шарти мактаб адабий таълим мининг айни шу асарларни ўрганиш асосига курилишидир. Ҳар икки ҳолда ҳам, яъни тадқиқот ва таълимда белгиланган мезондан оғишмаслик, муносабат ва баҳода холислик ҳал қилувчи аҳамият касб этади.

7. Инсон тирик экан, ҳар доим танлов қаршисида турди. Худди учта йўл бошидан чиқиб қолган эртак қаҳрамони каби. Ҳар қанақа мулозаматни бир четга суриб қўйиб айтганда, тўғри танлов қилишда адабиётнинг роли борми-йўқми, бўлса, қай даражада?

Албатта, танловга жуда кўп омиллар, жумладан, адабиётнинг ҳам таъсири бор. Дейлик, тадбиркор қаршисида танлов имконияти юзага келди: манави ишга сармоя тиксанг ўттиз фоиз фойда кўрасан, бунисига тиксанг – юз фоиз. Фақат кейингисида сағирлар ҳақига озроқ хиёнат бор... Ёки мана бунисига тик – юз эллик фоиз фойда кўрасан, фақат эл

манфаатига озгина зид томони бор... Тез бойимоқ тиласанг, бунисига тик – уч юз фоиз фойда кўрасан, фақат ҳамюртларингга оғу тарқатишинг керак... Албатта, адабиёт танловнинг арифметик ё иқтисодий томонига таъсир қилмайди, бироқ унинг маънавий-ахлоқий томонини белгилашга жиддий таъсир қилади. Яъни, агар тадбиркор мавжуд йўллардан кам фойда келтирса ҳам ҳалолини танласа, билингки, бунда бошқа маънавий-ахлоқий омиллар қатори адабиётнинг ҳам хизмати бор. Бу адабиётнинг потенциалидаги инсонни маънан юксалтириш, жамият ҳаётини тозартириш, ижтимоий муносабатларни ислоҳ қилиш, қисқаси – одамни ўзгартириш орқали оламни ўзгартира олиш имконига бир мисол, холос. Ушбу имкон рўёбга чиқиши ва тўла куч билан ишлаши учун эса, юқорида айтдик, китобхонлик даражаси ва маданиятини юксалтириш, адабий таълимни ислоҳ қилиш каби долзарб вазифаларни уddeлаш тақозо этилади.

2015 йил

МУНДАРИЖА

Адабий асар ҳақида қайдлар	3
Адабий асар талқининг доир айрим қайдлар	12
Адабий таълимда тарихий-биографик шарҳнинг аҳамияти ҳақида	24
“Гипотетик усул” ҳақида мулоҳазалар	30
Шеърларида тупроқ иси бор	41
Инсон йўли	58
Бобур ва бугунги андижон адабий мухити	63
Адабиёт биз кўниккан тушунчадангина иборат эмас (сұхбат)...	68
Ижод масъулияти.....	78

Адабий-илмий нашр

ТАЛҚИН ИМКОНЛАРИ

Муҳаррир:
Дилшод Ражаб

Мусаххих:
Нодира Эгамқулова

Бадиий муҳаррир:
Хуршид Иброҳимов

Техник муҳаррир:
Дилмурод Жалилов

«Turon zamin ziyo» нашриёти
Лицензия: АI № 171. 2010 йил 11 июн
Тошкент ш. Юнусобод-14. 27/35

Теришга 2014 йил 20 февралда берилди.
Босишга 2015 йил 25 февралда рұксат этилди.
Бичими: 84x108 1/32. «Cambria» гарнитурасыда
офсет босма усулида оффсет қоғозида босилди.
0000 шарт. б.т 00000 ҳисоб нашр. таб.
Адади 5000 нұсха. -сон буюртма.

“Үқитувчи” НМИУ босмахонасида чоп этилди.
Тошкент шаҳри, Юнусобод тумани, Янгишахар күчаси, 1-үй.